

## Mateu Deuxu Rybe Wihikỹ Tỹmyra, Mateu Tyyritidỹỹdu

<sup>1</sup> Kaheka Jesuisi Kristu labiehekỹ rare. Juhuu tahe Abraõ heka Davi labiehekỹ rare. Iribi tahe Davi heka Jesuisi Kristu labiehekỹ rare.

<sup>2</sup> Ibutumy ilabiebohonimy arelyykre. Juhuu tybynimy arelyykre idi iriðrenimy: Abraõ, Ijai, Ijaò,

<sup>3</sup> Juda, Peresi, (Peresi seriðre tahe Zera inire. Isereny tahe Tamara inire.) Esraõ,

<sup>4</sup> Araõ, Aminadabe, Nasaõ, Salmaõ,

<sup>5</sup> Boasi, (Raabe, Boasise rare.) Obede, Rute, Ijese, Kie.

<sup>6</sup> Davi hãwyy heka Uria hãwyy juhUU raremyhỹ. Iribi Davi-wana roire. Salomaõ iriðre rare. Tii heka Roaboaõ tyby rare.

<sup>7</sup> Idi Abia reare.

<sup>8</sup> Idi Asa, Josafa, Joraõ,

<sup>9</sup> Uzia, Jòtaõ, Aka, Ezekia,

<sup>10</sup> Ezekia, Manase, Amo,

<sup>11</sup> Josia, Jekonia, taseriðre-wana.

<sup>12</sup> Babilonia-ribi rohonyreu tahe tiiboho reare, Jekonia riðre wahe: Salatieli (Tii Babilonia-ki reare.) Zorobabe,

<sup>13</sup> Abiude, Eliaki, Azo,

<sup>14</sup> Sadòki, Aki, Eliude,

<sup>15</sup> Eliaza, Matỹ, Ijaò,

<sup>16</sup> Ijaò tahe Jyje tyby rare, Jyje tahe Marie hãbu. Jesuisi tahe Kristu Deuxu deòdỹỹna rare.

<sup>17</sup> Kia labiehekỹ sōwe tahe 14my rare, Abraõ-ribi Davi-ò wahe. Tule labieboho 14my rasõwerenyre Davi-ribi Babilonia hãwã-ò ridyreny ixideewimy aõkõ ròte-ò. Ixyby 14my rasõwerenyre. Iribi tahe Jesuisi reare.

<sup>18</sup> Kawese heka Jesuisi Kristu reare. Juhuu Marie Jyje-wana roikremy rare. Tii ijadõmaule tahe Deuxu Tyytybytyhy ribõtõnyre.

<sup>19</sup> Jyje hãbu òbiti rare. Tai tahe riixãwididỹnykemy rõhõtinyre. Kia õmo-ò rarybeõlere tuu.

<sup>20</sup> Kiau ýju tamy rarybere tarasina-ki: –Jyje, Davi riõre riõre. Ahãwyy, Marie, biteõnyõke. Tuu bexihãwyynykre. Iriõre dori Deuxu Tyytybytyhy riõre rare.

<sup>21</sup> Jesuisimy raninykre. Kiani tahe irybereny rare: tarasadu. Ibutumy iny dori iòraruna-ribi ritakre.

<sup>22</sup> Iwese Deuxu rybe ihetxiu rarybere wese tahe tii wiji riwinyre. Kia wese ihetxiu rybe rare:

<sup>23</sup> –Ijadõma rabõtõnykre. Iriõreni heka Emanueli rarekre.

Kiani tahe irybe-ki kia rare:  
Deuxu iny-wana ratxireri.

<sup>24</sup> Iribi tahe Jyje dexixade tarasina-ribi. Iwese Inynyrỹreny tuu tamy rarybere wesemy heka tii riwinyre. Tii-wana ratxiõre. Tii aõhe risỹnyõre.

<sup>25</sup> Uladu reare xiery tii aõhe rira. Tamy niõ riwahinyre, Jesuisi wahe.

## 2

<sup>1</sup> Belẽ hãwã-ki Jesuisi reare, Judeia bedeki wahe. Iòlò Herodi iòlòmý raremyhỹ. Iu reareu,

Hābu Erytyhy mahādu taina tỹmyramy robirenyre. Tai tahe iòlò mahāduõ doidenyde biura-ribi Jerusalē hāwā-ò.

<sup>2</sup> Tiiboho rỹraxyre: —Iule judeu mahādu iòlò aõbo kaki reare. Jiarỹboho itainamy rabirenyre tahe nadoidenyde riwowydynyrenykemy. Kai-boho teerytenyde aõbo titxibo ratxireri?

<sup>3</sup> Tahe inyõ Herodiko relyyrenyde. Herodi kia roholareu sõwemy riòtiinyre. Tule ibutumy Jerusalē hāwā mahādu riòtiinyrenyde.

<sup>4</sup> Tahe Herodi ibutumy dinodu mahādu ributumyde: Xiwena wahidỹdu dinodu, bede ywina tyyriti erydu mahādu tule. Tahe tamyreny rỹraxyre: —Titxibo Kristu reakemy timybo tyyriti-ki ròritidỹmy roire?

<sup>5</sup> Tiiboho tamy rarybere: —Judeia bede-ki, Belē hāwā-ki wahe. Kia tahe ihetxiu rybedu riritinyre.

<sup>6</sup> —Kai Belē hāwā mahādu. Judeia bede hāwāõ. Kai hāwā yja iny rōhõtinyre. Tahe inatyhy aõkõ rare. Kai hāwā nihikỹre. Aribi dori dinoduõ ròhònykre. Wamahādu iòlòmý ronykre. Idinodumy rarekre, judeu mahādu dinodu wahe.

<sup>7</sup> Tahe Herodi heka biura mahādu ributumyde ibutumy iny-ribi wasimy. Tamy rỹraxyre: —Tiutxubo taina ròhònyre? Tahe rirawònyre.

<sup>8</sup> Tamyreny rarybere: —Kaiboho boibenyke Belē hāwā-ò. Idi tahe uladu-ki mahabenykre. Iu wadee manarybebedenykre. Jiarỹ tule tamy arakre ariwowydynykre.

<sup>9</sup> Biura Hābu Erytyhy mahādu roholarenyde. Tahe roirenyre. Ryki ixityre tainamy robirenyre. Uladu tyrehekỹle ritoosònyre.

10 Iu tahe sōwemy reysarenyre.

11 Heto-ò rehemynyre. Tahe ralorenyre. Uladu rare Marie-wana. Tahe tatiowotimy reserenyre riwowydynykemy. Isaureny riraynyre tamy riwahinykremy: womati tÿrÿrÿhÿkÿ, hee aderòna, aderònatyhy wana.

12 Idi tahe Biura Hābu Erytyhy mahādu rarasyre. Deuxu tamy rarybere: —Kaiboho Herodi-ò bōðsebenyōke. Tai tahe rywixira-di tasubedereny-ò ròðserenyre.

13 Biura mahādu tahe ròireny rahudi tahe Inynyryÿ ÿju nade Jyje-ò rybemy, irasina-ki tamy rarybere: —Ariòre, ise-wana bidyke Egito bede-ò. Herodi dori uladu rubudÿÿmy ratxireri. Adee tiu ararybekreule kaò bōðòðeke.

14 Tai Jyjeboho rummy rahenyrenyre Egito bede-ò.

15 Herodi rubusÿtybymy tahe dòðsedenyde. Tii riwinyre iwese ihetxiu tyyriti rarybere wese, Deuxu rybedu rybe wahe:

—Wariòre Egito bede-ribi nadidyde.

16 Herodi reburere. Biura Hābu Erytyhy mahādu dori tii riitxenanyre. Tai ibutummy uladu rirubunyre Belē hāwā-ki, tule ijō iòhò hāwā-ki. Ibutummy howÿtòdu rirubunyre inataō beòra ijōdikeki tahe rirubunyōre. Tai Jesuisi rirubunykemy risÿnyre, iwese tii rareu Biura Hābu Erytyhy mahādu tamy rarybere.

17 Kiamy ta rÿire iwese Deuxu rybedu rarybere wese, Jeremia wahe:

18 —Rama hāwā-ribi ibru-ò iny roholamyhÿre. Rakeli rare. Tii robumyhyre. Ibutummy

iriòre ituere. Tai robumyhÿre. Inyõ riteysanyõtyhy iriòre rurureki.

<sup>19</sup> Herodi tahe rurureu, Inynyrÿ ÿju heka Jyje rasina-ki tamy nade.

<sup>20</sup> Tamy rarybere: —Bòòsebenyke judeu bede-ò. Uladu ise-wana bidyke. Kia rirubunykemy risÿnymyhÿré tahe, rurure.

<sup>21</sup> Tahe Jyjeboho ròirenyre judeu bede-ò.

<sup>22</sup> Akelau tahe Herodi riòre ronyre iòlòmý, tyby deròwomy. Tai kowa-ò Jyje ròirenyõre sÿmy. Rasina-ki rybeõ rieryre Kalileia-ò ròirenykemy. Tai tahe ròirenyre kowa-ò.

<sup>23</sup> Nazare hãwã-ki rasÿnyrenyrene. Kia tahe riwinyre iwese Inynyrÿ rybedu ihetxiu rarybere wese: —Nazare ludu tii rarekre.

### 3

<sup>1</sup> Kiau Judeia bederahy-ki Joaõ Sebedÿÿdu heka iny-ò rarybemyhÿre:

<sup>2</sup> —Deuxu Iòlòna bededÿÿnana iòhòmý ratxireri. Aòraruna-ribi biixãwibenyke, bexirãhÿke!

<sup>3</sup> Joaõmy heka Isaia ihetxiu riritinyre kawese: Inyõ bederahy-ki ryryreri: —Inynyrÿ dee ryòbiti biwinyke. Biywinyke ryõ tamy kanakemy.

<sup>4</sup> Joaõ kamelo radetyy ityy rare. Iròdutyy iwereysanare. Seihikÿle bidi-wana irÿsÿna rare.

<sup>5</sup> Ibutumy iny tamy ròirenyre irybe-ò roholakemy iòhò hãwã-ribi, Jerusalê, Judeia, Jordaõ bero-ribi wahe.

<sup>6</sup> Tamy òrarunamy relyyrenyrene rabadewomy tamy relyyrenyrene. Tai tahe Joaõ heka bero Jordaõ-ki tii riratysebenyrene.

<sup>7</sup> Fariseu mahãdu, saduseu mahãdu doide tamy riratysebenykemy. Kiau Joaõ tamyreny rarybere: — Hemylala mahãdu! Deuxu aõhõkỹmydỹỹnana-ribi mahenybenyõtyhy. Aõhe inatyhy?

<sup>8</sup> Juhuu aõwiihikỹ widỹỹna biwinybeny. Tai tahe iny rierykre kaiboho aõraru-ribi inatyhymy texihutenyte.

<sup>9</sup> Fariseu mahãdu, kaiboho tahõtinytenyte: Abraõ heka inylabiehekỹreny rare. Rikirãhĩõtyhy. Deuxu-ò kia aõ aõkõ rare. Tamy wikeki mana-ribi Deuxu heka Abraõ riòkõreõ riwinykre.

<sup>10</sup> Woma tahe òwòru-ribi iòhòmỹ rỹira. Òwòru bederaty wiwihikỹ ihoõkeki, kedesekre. Rasõkre. Woma heka Deuxu aõhõkỹmydỹỹnana wese rare.

<sup>11</sup> Jiarỹ bedi araratisebedỹỹnyra aõraruna-ribi texirãhĩteki. Jesuisi tahe Deuxu Tyytybytyhy-di ròratisebedỹỹkre heòty-wana riratysebenykre. Tii waratyre awityhymy ratxireri. Jiarỹ riwaixỹrunymy watxireri iwa ariwykeki.

<sup>12</sup> Tii maixõmo risykre. Maixõmo ributunyre tahyna-ò. Irỹnysi heòty-di riworonykre. Heòty itueõna heka rare.

<sup>13</sup> Idi tahe Kalileia bede-ribi Jesuisi nade bero Jordaõ-ò. Tii Joaõ-ò nade riratysebenykremy.

<sup>14</sup> Joaõ aõkõmy rarybere: —Jiarỹ tahe aõ aõkõ rare. Kai biwaratysebenyke.

<sup>15</sup> Jesuisi tahe tamy rarybere: —Deuxu deewina heka kia rare. Rikiwinykre. Tahe Joaõ riratisesebedỹỹre.

<sup>16</sup> Ròratisebenymy rahudi tahe Jesuisi ròtuòra. Biuwetty rarayre Jesuisi tahe bòtòenimỹ robire, itxi dobehede, Deuxu Tyytybytyhy wahe. Rybeõ

biu-ribi narybede:

<sup>17</sup> —Kia heka Wariòre rare. Jiarỹ heka sōwemy tukure. Idi wadeysareri.

## 4

<sup>1</sup> Idi tahe Deuxu Tyytybytyhy heka Jesuisi ridyre bederahy-ò. Tai Satanasi riurihikemy tamy rehemnyre.

<sup>2</sup> Jesuisi heka 40 txumy, 40 rummy heka aõ rirỹsỹõhy bedede idi rỹire. Sōwemy heka rama risamy tai raremyhỹ.

<sup>3</sup> Taile Satanasi tamy nade. Tahe iurihiximy tamy rarybere:

—Kai inatyhy Deuxu Riòre ahãte wana heka mana-di orotxumy biwitxiranymy biwinyke ahinamy.

<sup>4</sup> Tahe Jesuisi dirawyònyde: Deuxu Ritidỹỹna-ki kiamy roire: —Iny heka orotxudile aõkõ irumy rỹirakre. Ibutumy Deuxu rybedile iny irumy rỹirakre.

<sup>5</sup> Idi Satanasi heka Jesuisi ridyre Jerusalẽ hãwã-ò. Templo heto ratyre tahe ritidire.

<sup>6</sup> Tahe tamy rarybere:

—Kai inatyhy Deuxu Riòre ahãte wana heka katyre-ribi ixi-di behukre bedede-ò. Buruõtyhy heka besekeki. Deuxu taỹju kiditeònykre aramykemy. Bedede-ò aõkõ beseke.

Ijõ tyyriti rarybere:

—Deuxu araywinykre taỹju-di. Tii ỹju kiditeònykre tebò-di ariijekemy. Awa ritõmonyõtyhy manatyre-ki.

<sup>7</sup> Jesuisi rirawyònyre: —Tyyriti tule rarybere:

—Deuxu uritere biurihiōke.

<sup>8</sup> Iribi Diabo heka Jesuisi ridyre hāwālōō-ò. Tamy ibutumy bede iòlòna riteòsinyre.

<sup>9</sup> Tahe tamy Satanasi rarybere: —Beseke atiwotimy tahe biwawowydynykeki, adee kia ibutumy iòlòna wiwihikỹ ariwahinykre.

<sup>10</sup> —Make Satanasi, Jesuisi rarybere: —Tyyriti rarybere:

—Deuxu-ò sohojile deàlana, wowydyna biwahinyke. Tiile bityhinykre. Deòdu tamy sohojile mabeke.

<sup>11</sup> Satanasi tahe Jesuisi-ribi rexitare. Ÿju mahādu rehemynyre iyrubudỹmy.

<sup>12</sup> Joaō òludu heka ròtenawo-ki ritidira. Kia Jesuisi roholareu, Kalileia bede-ò ròsere.

<sup>13</sup> Nazare-ribi rare Kafanaō hāwā-ki rasỹnykremy rare. Tii aho-ki iòhòre, Kalileia aho wahe. Zebulō bede, Natali bede tahe inatxi hāwā ibiōwa rare.

<sup>14</sup> Kia tahe Isaia Tyyriti rarybere wese:

<sup>15</sup> —Zebulō bede, Natali bede, Jordaō bero kowawe-ribi ijà-ò. Ahohokỹry-ki. Kai judeukōdu mahādu bede rare, Kalileia wahe.

<sup>16</sup> Iny kowasỹ mahādu bede luru-ki rasỹnymyhỹre. Tahe tiiboho loosònahakỹmy robirenyre. Bede lurusỹ mahādu-ki tahe Deuxu loosòna ritoosònyre.

<sup>17</sup> Iribi tahe Jesuisi ritelenyre Deuxu rybe ritỹnynykemy. Tii rarybere: —Aòraruna-ribi bexirāhīke. Deuxu iòlòna bededỹnana dori iòhòmỹ ratxireri.



<sup>18</sup> Kalileia aho ijàti-ki Jesuisi rariamy ratximyhỹ. Tahe inatxi waxidu seriòremy robire, Simaõ Pedro, tule Andre ijõre. Rià-di utura rimymyhỹreny.

<sup>19</sup> Jesuisi tamyreny rarybere: –Bodoike wahemy. Iny wadee bimykre. Iwese araery-nanykremy bimyke.

<sup>20</sup> Aõwesele tahe tarià ririrenyre. Jesuisi-wana roirenyre.

<sup>21</sup> Roirenyre tahe inatxi ijõ seriòre-ki Jesuisi robire. Txiau ijõni rare. Joaõ ijõre. Tiiboho Zebedeu riòre roire. Tiiboho talawo-ki ronyrenyire rià riywinyrenymy. Jesuisi tamyreny rarybere: – Wahemy bòdòike.

<sup>22</sup> Tai tahe tybyreny ririrenyre. Jesuisi hemy ròirenyre.

<sup>23</sup> Ibutumy Kalileia bedey-ki Jesuisi rariamyhỹre. Tii judeu dohodỹỹna heto-ki rarybemyhỹre. Deuxu Iòlònamy ritỹnynymyhỹre, Rybe Wihikỹ Tỹmyra wahe. Sõwemy webinadu mahãdu riteytenyire.

<sup>24</sup> Jesuisimy iny relyyre ibutumy hãwã hãwã-ki Siria bedey ibutumy. Tai tahe sõwemy webinadu mahãdu didydenyde tamy, iny tyytybybina-di, iny iumy imyremyrehẽkỹ wahe. Jesuisi ibutumy iny riteytenyire.

<sup>25</sup> Iny sõwehekỹ riheludunyire, Kalileia bedey-ribi, Debòwiò hãwã-ribi, Jerusalẽ-ribi, Judeia bedey-ribi, tule Jordaõ bero kowa-ribi.

## 5

<sup>1-2</sup> Jesuisi inymy sõwemy robireu, raòwònyre hãwãlò ratya-ò, Ierydỹỹna mahãdu tamy doidenyde. Taile rierynadỹỹnymy ronymyhỹre.

<sup>3</sup> Deuxuko-ki iny ibinamy r̃imyh̃yre. Kia iny tuu rexierymyh̃yre, teysatyhy rare. Tii deysana s̃owemy tai ratximyh̃yre, Deuxu Iòlòna heka ih̃or̃orenymy rarekre.

<sup>4</sup> Robumy r̃yirakeki teysamy heka r̃yirakre. Ibede-wona wiòhed̃ỹna rybe-di heka tamy kanakre.

<sup>5</sup> Kia inytyhy-di widee ratxireri, tii heka teysahyymy ratximyh̃yre. Ibutumy heka iny ih̃or̃olehek̃yle r̃yirakre. Bede bede heka ih̃or̃omy rarekre teysamy rarekre.

<sup>6</sup> Inyõ-ò òbitinamy lobiximy rurukeki tahe teysamy rarekre. Deuxu tamy òbitina riwahinykre.

<sup>7</sup> Inyõ ruxetòena-di ratxireri. Deuxu heka tamy ruxetòena-di rarekre.

<sup>8</sup> Inyõ irayky òbitimy ratxikeki tii heka teysamy rarekre. Tii dori Deuxumy robikre.

<sup>9</sup> Inyõ ywina-di wiwana r̃yirake teysamy rarekre. Ywinaõ-di rarekré, teysamy rarekre. Tii dori rarinikre: Deuxu riòremy.

<sup>10</sup> Inyõ aõh̃ok̃ỹmy d̃ỹnana reuròkeki, tii dori òbitimy rurukeki, tii tules̃y teysamy rarekre. Deuxu Iòlòna dori ih̃or̃omy rarekre.

<sup>11-12</sup> Inyõ umyreny relyykeki uritere hek̃yle. Rui rybe-di umyreny relyykeki, aõh̃ok̃ỹmyd̃ỹnana adee riwahinykre wana, tai tahe beysakre. Awimy moh̃otinykre. Kai dori biu-ò mahenykre. Tai tahe beysakre kai awimy noh̃otykre. Uritere noh̃oti rosarenyõmy. Kia wese tule Deuxu rybemy rybedu aõh̃ok̃ỹmy rot̃ỹnyre.

<sup>13</sup> Kaiboho heka saawesemy atximah̃atenyete, jyyra wesemy wahe bede mah̃adu iny-ò, kai dori kiamy bede mah̃adu tewiòhenanyete. Auri tahe

urihimyò biõnonykeki tahe aurihixina heka urihimyòlemy releke. Kaa jyyra urile idi adehu rÿikre iny ityre rariakremy. Awiõhedÿÿna biõnonykeki tahe aõma aõkõ beleke.

<sup>14-15</sup> Kai loosõna wesemy atximahãte kabede mahãdu iny-ò. Hãwãõ hãwãlò ratyy-ki roikeki, tiu heka rexiwòõtyhy itÿnyhy roimyhÿke. Loosõnaõ iny ritoosõnykeki, tule heka tiu heka hyna rawoõ-ki roiõtyhy roosòmÿ. Aõma roosõnanymyhÿre ibutu heto jurajuramy heka ibutu ritxuxanymyhÿre. Aõma tamana-ki rÿimyhÿreki wahe.

<sup>16</sup> Kaiboho tule amahãdureny awiwihikÿmy ro-bikeki tahe Deuxu-ò wowydyna riwahinykre.

<sup>17</sup> Jiarÿ heka anaõde bedede ywina tuededÿÿmy. Anade aõ Deuxu dee rybedu tuededÿÿmy aõkõ heka anade. Anade ibutumy aõmybo rarybere widÿÿmy. Timybo rarybere wese heka ibutumy tuu rotÿÿnymy rarekre.

<sup>18</sup> Inatyhymy adeereny ararybekre bedede ywina tyyritiy-ribi tiu ijõ iõõtyhy ijõ sohoji ritiwedena yreõ reseõhykre. Ibutumy roikre aõhebo rotÿÿnymyhÿreò bedede konanako-txi.

<sup>19</sup> Inyõ tõhõti urihimyò bedede ywina rosakeki rexidelenymyhÿre iny ribedeerynyõkemy iny ritozonyõmyhÿkemy. Hãbu tahe iyjamy Deuxuko-ò rarekre, Deuxuko-txi. Inyõ rityhynymyhÿre irybe iny rybedeerynymyhÿre. Tii tahe Deuxu Iõlõna-ò nihikÿmy rarekre.

<sup>20</sup> Kaiboho aõma fariseu mahãdu-ribi awityhymy ixi-di mohõtinybenykeki. Tiu heka Deuxu Iõlõna-ò arõterenyõmy. Kaiboho heka awi toite aõma fariseu mahãdu judeu mahãdu

wedu ratyre heka awi boibeke. Kia aõkõkeki tahe malòbenyõt̃yhy.

<sup>21</sup> Ihetxiu bede ywina Tyyriti kawesemy rare:

—Kai inyõ birubunykeki heka iòwynamy iny akanarubunyke. Kia heka bede ywina heka rare.

<sup>22</sup> Tahe warybe urihimyò iwitxira bede ywina-ribi. Kai inyõ-ò maraykynykeki. Tai tahe brebunahakỹ-ki tate. Abiòwa-ò bininikeki itxỹtemy. Tamy kai marybekeki: —Kai aõki awiõre. Tai tahe akỹnadykre heka aõma ywisidỹỹduko-ò araòwynykre. Inyõ-ò kai makyaranynykeki kai brebuna-ki texilòròm̃y tate. Kai inyõ deramy mabekeki uriteremy nodu tamy marybekeki, tai brebuna-ki tate. Inyõ òsỹny aradykre wisidỹỹdu mahãdu-ò. Inydee ratyhymy mabeke wana aõkõ raremy marybekeki, heòty kònana bede-ò make lau brebuna-ki tate. Iòhãrure kai heòty bede-ò makemy.

<sup>23</sup> Kaki aõma nieru xiwena wahidỹỹna-ò behemynykeki inyõ-wana aõhe widee botỹỹnykeki õhõti rosaõlemy ahãte wana.

<sup>24</sup> Deuxu heka axiwena tewahinyõhyymyhỹte aõma xiwena bire-ki heka birike. Tahe biijeke aseriòre juhUU. Aõma wana biòbitinybenyke widee marybebenyke. Iribi tahe tamy bedehemynyke xiwena wahidỹỹna-ò wahe tadevenymy atximahãte wana hãbuõ-ò.

<sup>25</sup> Aõma tai tahe iòraru-ki aòludumy relera wana. Tamy behemynyke aõma timybo tii-wana widi biywinykemy timybo adeve biòwynykemy tamy heka bitobiny òrale heka aõma rieryke urenana. Aradyhemy aõma ywisidỹỹna ube-ò,

idi ywisidỹyna mahãdu, idi soldado. Tai tahe bitobinyke bede rierykemy.

<sup>26</sup> Inatyhy heka adee ararybekre røtenawo-ki malòkeki. Tiu heka aòlòkòmy aõma iòwy mahumy adi røhõtinykre. Idi mohõtinyke xiery heka bòhònnyke.

<sup>27</sup> Juhuu ihetxiu heka kaweselemy Tyyriti-ki rarybere:

—Òtaõmy!

(Bede ywina tyyriti-ki wahe.) Kawesemy heka jiarỹ rebedeerynywãhãre.

<sup>28</sup> Òtamy røhõtinykeki hãwyy-ò retehekeki òtamy rexinohõtinykeki. Tai heka tii òta òraru riwinymyhỹre. Iwese iwitxira hãwyy-wana roireri yrubule taheka òta òraru riwinymyhỹre.

<sup>29</sup> Arueõ òraruna-txi araatykeki, bitake. Awityhymy biu-ki malòke kawesekile heka awire, Deuxusỹ-ò malòke wahe. Arue wiòmy tahe awiõmy biu-txi arue yremy heòty bede-ò make tahe ibinatyhyre.

<sup>30</sup> Tule eraõ bitake iurelemy era-di make biu-txi. Aumy ibutuhukỹlemy heòty bede-ò rakehãrele tahe awiõre.

<sup>31</sup> Bede ywina heka kawesemy røhònnyre iny-ò juhuu wahe:

—Inyõ tahãwyy ixi-ribi riteònykeki rixãwididỹỹnyra tamy tyyritiõ riritinymyhỹre.

<sup>32</sup> Iwitxira rybe-di jiarỹ arukile tahe hãbu tahãwyy riatyra. Inyõ uritere òta òtana òraru-ki ixi-ribi tahãwyy riteònymyhỹre. Tai tahe hãwyy roimyhỹre hãbu witxira hãbuõ-wana. Tai tahe òta òtadumy kia hãwyy rininire. Adỹỹwe òraru-ò riteònyre

tahāwyy riteònyre uritere òhyynaòle. Tai tahe tii adỹỹwe òrarunaòle heka riteònyre. Taile heka hāwyy hābu wixiramy heka roimyhỹre ahābuò tahāwyy uritere hyynaòle riteònymyhỹre mahādu hābu heka. Tii heka tule òtadumy relemyhỹre hāwyy òta òtaduò heka roireki wahe.

<sup>33</sup> Juhuu heka ihetxiu kia wesemy Deuxu tamyreny kia rarybere:

—Taholatenynte kiamy Deuxu heka uritere ruiòmy atximahābenyke Deuxu-ò biwinybenykemy marybemy bimyekeki biwinybenyke.

<sup>34</sup> Tahe jiarỹ heka kiamy adeeremy ararybekre. Aòwidỹỹmy ixi-di nohõtirenyòmy ryberenyòmy iwidỹỹmy. Ixinohõtidiỹỹmy ryberenyòmy ariwinykre biwawiòhenanyke wana biu-ribi wawiòhenanykre wana. Uritere heka tuu ryberenyòmykre kia wesemy biubrò-ki aòkò biu dori Deuxu rynana rare.

<sup>35</sup> Kiamy uritere rybeòmy bedebrò-ki aòkò aò biwinykemy aòmy mabekemy. Bede dori Deuxu idi ratximyhỹre rare. Deuxu waa elehyna dori bede rare. Jerusalé hāwābrò-ki tule aòkò, tii dori Iòlòtyhy hāwā rare.

<sup>36</sup> Tule arade-di widỹỹmy uritere dori rybeòmy kai dori awitxiranyòtyhy arade iura-ò ilyby-ò urile araykywydynakile tuu ratxike.

<sup>37</sup> Aòma araykywydynakile heka tuu riwitxiranykemy idi tahõtinyinmyhỹte. Kiamy heka tarybemahāte iwidỹỹnamy teuremy tarybemyhỹte: —Kohe, kiale ariwinykremy marybeke ada aòkòre, ariwinyòtyhymy aòbo. Kiamy marybekeki iratylemy kohe, aòkòre myỹ

aõbo. Sõwemy marybekeki tahe aõbina binahakÿle heka ròhònykre.

<sup>38</sup> Ihetxiu bede ywina ròhònyre.

Inyõ wixira rueõ ribinadÿÿnykeki, iny wixira tule iwesele riwinyke. Kia widÿÿdu rue heka ribinadÿÿnyke. Rue heka wilemy raòwynyrene rueõwilemy. Juhu tasÿ ÿjuõlemy raòwynyrene. Jiarÿ tahe rebedeerynyre kawesemy.

<sup>39</sup> Inyõ aõbinamy adee riwinykeki, aõ aõkõ tamy biwinyke. Inyõ aòsÿny rihetenyekeki, tule iwyo-di beake rehetenykemy.

<sup>40</sup> Uritere aòludu-ò ixioðwydÿÿõmy. Aõma ijõ atyy ritakeki heka tule tamy arahana biwahinyke. Inyõ sohoji urixinamy adee ixidinomy reake wana. Inatximy heka tii-wana beake.

<sup>41</sup> Inyõ ixitoedÿÿmy aõ aribi riwykeki tamy biwahinyke tule inyõ aribi aõ huòtemy riwyke wana.

<sup>42</sup> Abròrò itue-di tamy òkeseõmyke iwòde-ki ihuòtemy biwahinyke.

<sup>43</sup> Ihetxiu heka taholatenynte kawesemy:

—Kai heka aõ hãwã ludu mahãdu luomy heka madònymyhÿke.

Aòludomy aki ratxike wana tukumy atxike teramy atximahãke.

<sup>44-46</sup> Tahe iwixiramy ararybekre. Aòludu heka arabedeerynyke. Tukumy mabekemy inyõ aõhòkÿmydÿÿnana rotÿÿnyreri wana tamy rexitòenyke. Kia wese-ki heka inytyby riòremy mabeke, Deuxu riòremy wahe. Tii dori juu riòlòdÿÿnymyhÿre inybina tyre-ki wahe. Tule iny wiwihikÿ tule-ki aõma biu heka tule riteònymyhÿre. Aõma iny òbitikõdu mahãdu tule-ò. Tule òbiti mahãdu tule riteònymyhÿre. Aõma

tukumy ahāte sohoji ratximyhÿre sohojile kai itukukeki. Kia heka awi aōkō rare ibutumy òraru mahādu heka tule riwinyremyhÿre kia wese. Aōma urile rybedÿÿ azry mahādu, Aseriòre mahādu.

<sup>47</sup> Tulesÿ kia aōma aōkō rare aōma tule heka judeukōdu mahādu dori tule riwinyke, tii Deuxu rierykōre.

<sup>48</sup> Òbitityhymy kaiboho boibeke. Aōma jiarÿ heka arabedeerynyrenyleri biu-ki inytybyreny ratximyhÿre dori òbitityhy rare.

## 6

<sup>1</sup> Wahisidÿÿna wiwihikÿ kai hāburu-ki iwahisidÿÿōmy iny-ò. Kai itxerenaōnamy biwahinymyhÿ. Aōkōkeki tii inytybyreny-ribi bitaōtyhy aōwy awahisidÿÿna.

<sup>2-4</sup> Kai biwahinykeu iny adee aōmybo rurumyhÿreó. Uritere ibutumy iny itxerenamy iwahidÿÿōmyhÿ. Inyō-ò òbiti mahādumy riwisÿnymyhÿre mahādu, kia wesemy heka tii riwinymyhÿre heka. Dohodÿÿmy heto-ki tuu riwinymyhÿre kia wesemy tule ibutumy hāwāhākÿ ruetyawetyamy tuu riwinyrerimy ihÿre. Inatyhy dori adee rarybereri: —Aōma wahisidÿÿnatyhymy heka adee rarybereri: — Wahisidÿÿnaō ixidee ritamyhÿre. Aōbo Deuxu wahisidÿÿnaō heka adee riwahinyōtyhy. Tai heka Deuxu wahisidÿÿnatyhy riwahinyōtyhy tamyreny. Iny-ò aō biwahinykeki, abiōatyhy-ò belyyōke. Wasilemy tamyreny awiòhedÿÿna biwahinyke. Iny tybyreny dori ibutumy aōna aōna ròtena rieryre aōwahisidÿÿna adee kidiwahinykre.



5 Iwese budu mahādu riwinymyhỹre wese uritere iwidỹỹōmyke. Kia wesemy aōkō heka bexitōenyke. Ibuturu-ò rexitōenymyhỹre dohodỹỹna hetowo-ki heka lamamy rexitōenymyhỹre. Hāwāy-ki dori rexitōenymyhỹre ibutu itxerenakemy. Inatyhymy heka adee rarybere: –Atarasana ibutumy ritare.

6 Inatyhy dori ritare.

–Bexitōenykeu malòke aheto jurawo-ò. Ixi-di biijòtòbònyke. Ierykōnamy boo ratximyhỹreò heka bexitōenymy myike. Ibutumy heka boo aōbo wasimy iny riwinyriwinymyhỹremy robimyhỹre. Tai-ki tahe bedede ywina wihikỹ heka adee kidiwahinykre.

7 Tule rexitōenymyhỹreu uritere irehemy idi lamaōmy uritere ixityre ixityremy tamy ixitòedỹỹōmy wiwesewesehyyle. Judeukōdu mahādu dori kawesemy riwinymyhỹre. Kiamy heka raraykywydynanymyhỹre aōma rexitōenyre ehehekỹkeki heka roholatyhykemy rohōtinymyhỹrenyre uritere widỹỹōmy iwese tii riwinymyhỹre wesemy.

8 Inytybyreny dori rierymyhỹre aōmybo iny raraykynymyhỹré. Inyboho heka rexitōenymyhỹreu rierymyhỹre aōmybo inyboho rurumyhỹrenyre. Iny sōwemy rarybemyhỹrele aōkō heka tii roholamyhỹre. Aōmybo iny rurumyhỹrenyre, heka bexitōenybenyke. Kia wese:

9 Wahareny, biu-ki atximahāte. Anityhy iny ibutumy rityhynkemy idi rierykemy watxireri.

- 10 Aiòlòna heka wymy kanake. Iny adeewile ri-winykemy iwese biu-ki relemyhÿre wese.
- 11 Wadeereny txuõ txuõ rÿsÿna bidiwahinyke.
- 12 Waòrarunareny òhòti-ribi bitosadÿÿnyke. Iwese jiarÿ inyõ òraruna wanohòti iribi aritosadÿÿnymyhÿre wese.
- 13 Isiratyhy urihixina-ribi heka biwayrubunyke, òraruna-txi reseke lau. Aõna aõna bina-ò bidiwaijebenyke. Iòlòna, ruru, loosòna heka ahòròhy rare. Kie.
- 14-15 –Inyõ ariixãwidinykeki iaõbina-ribi. Tule inytybyreny riwaiixãwididÿÿnyke. Deuxu iòraruna-ribi riixãwididÿÿnyke. Beinareheke wana.
- 16 Uritere aòsÿny bedètiidÿÿõmy iwese budu mahãdu rÿira wesemy. Tai heka byreõmy iny-di txuu rÿimyhÿremy widi retehemyhÿre. Wiji òhòtirenny reake. Heka raòwynyra inarehena irareny.
- 17 Tai narehereheu tainarehenyeteu. Atarina-di ahãtemy beake aòsÿny bisuhòke.
- 18 Inywitxira heka anaeryòtyhy kai tenarehemy atxiteri. Inytybyreny sohojile heka rierymyhÿre. Inyõ tuu robiòtyhy. Tii tahe ibutumy aõna aõnamy robimy wasimy rÿiramy. Iribi tahe tii araòwynyrenyke.
- 19 Aõna aõna butudÿÿõmy tyy, nieru, aõna aõna wiwihikÿ butudÿÿõmy kabede-ki. Txudòera dori ibutumy kabede-ki tuu riroxike aõna aõnamy. Aõma rararÿÿnyke iaõmydÿÿna ibutumy rararÿÿnyke rahuke. Wasidu tamy ralòke. Iaõmydÿÿna-ò sòweò wyremy rasinyke iaõmydÿÿna-di.

20 Kaki ibutudỹylemy heka biu-ò bibutunye. Tai heka txuddera aõ riròõtyhy tule rararyõtyhy. Tule wasidu aõkõ rare.

21 Titxibo aõmydỹnana ratxireri iwesele taheka arayky ratximyhỹre. Biu-ki aõbo ada bedeki aõbo. Aõma bedeki araykywydyna ratxireri wana heka kakile taraykywydynante. Biu-ki araykywydyna ratxireri wana heka biu-ki heka arayky aõmydỹna butuna raykywydyna ratximyhỹre.

22 Arue heka loosõna wesemy rare. Aumy dee itỹnykeki heka aumy ibutumy loosõna-di tỹximy rarekre.

23 Aumy ibinakeki tahe bedeki loro-ki matxike. Aumy bedeki lorohokỹ-ki ratxikeki ibinatyhymy matxike aõma butunale-di iny rõhõtinykeki heka tiu Deuxu iny riwiõhenyõtyhy. Deõdumy heka releõtyhy.

24 Inatxi wedu-ki dori inyõ rityynyõtyhy. Tule heka tii roholamyhỹre ijõ-ribi tahe tõhõti rosamyhỹre. Inyõ Deuxu deõdumy releõtyhy tii aõna aõna butunadile rõhõtinyhỹreki.

25 Tai heka tuu rarybereri adeereny. Uritere nohõtiyreõmy arỹsỹnamy tule atyymy, idi matykynykemy. Aumy dori rỹsỹna ratyre aõnityhymy ratximyhỹre. Tule aumy tyky ratyre aõnimy ratximyhỹre.

26 Nawii-di inihe betehibenyke. Tiiboho heka aõðworumy aõkõ ròbròmyhỹreny. Aramyre heka aõma tarỹsỹna wydumy bederahymy tarỹsỹna riyrubunyõhyymyhỹre heto nihikỹ-ò. Deuxu biu-ki ratximyhỹre heka nawii riyrubunymyhỹre irỹsỹna tamy riwahinymyhỹre. Kaiboho tahe iratyretyhy toite, Deuxu-ki wahe.

27 Sōwetyhymy maraykywydynanykeki aōbohe, arumy aōbo arirarehemy mariake. Aōkōre.

28 Uritere nohōtiyreōmyke atyymy. Betehemyhỹ inihe noijasa-di. Aōma tiiboho heka raaōmysỹdỹōhykymyhỹre. Tai tyky wihikỹ-di rexytyynyke. Tyy ixidee riwinyōtyhy. Ihāre tahe Deuxu rityynywihikỹre heka tyy wihikỹ tamy riwahinyreri.

29 Salomaō heka itykynihikỹra. Ihāre tahe ityky heka awityhy aōkō rare. Noijasa heka iratyre ityky wityhyre.

30 Deuxu heka noijasa ritykynymyhỹre aōma noijasa heka wijilemy idi ihỹre. Biurasōmy tahe ixāwilemy reamyhỹre, risōra. Tii heka tyky adee kidiwahinykre. Nohōtiyreōmy tahe. Tii dori adee kidiwahinykre tykyō. Aityhyna dori ibutetyhyre heka.

31 Tahe raykyōmy nohōtiōmy titxiribibo arỹsỹna bidiwykré, atyky amona.

32 Tyhydỹỹdukōdu mahādu heka kiaōle heka ritōhōtidỹỹnymyhỹre. Inytybyreny heka rierymyhỹre aōmybo tarumahāte. Ibutumy heka araerymyhỹre aōmybo taruterimahāte.

33 Tii Deuxu aōma dỹỹnana sohojidile. Manaykynykeki heka tii ibutumy adee riwahinykre.

34 Uritere nohōtiyreōmy aōbo biurasō kia aōmydỹỹnana-ò. Rỹire dori sōwemy wiji biaōmysỹdỹnanykremy biwinykré. Iwitxiramy bidiwinykre iwitxira aōmydỹỹnanaō.

## 7

1 Iny witxira witxira-di ywisidỹỹōkeki. Aywisidỹỹna wesemy heka Deuxu ruxetōena-di

ywisidỹmy araywinykre.

<sup>2</sup> Iny teywinyamahâte wesemy heka Deuxu araywinykre.

<sup>3</sup> Kai heka òwòru nihikỹereõ arue-ki ijõdikeki, aõherekibo bederarasi sõmo-di inywitxira rue-ribi bitakemy atxiteri.

<sup>4</sup> Tai heka kai bobiõtyhy itarasa-ki wahe. Arue-ki dori òwòruere ijõdireki heka bobiõtyhy. Òwòru ere dori aòraruna sõwemy rỹire wesemy heka atximahâte.

<sup>5</sup> Kai texibõnyteri. Aòraruna-ribi juhoo bexiòbitinykre. Idi tahe aseriõre òraruna-ki biwiòhenanykre. Aòraruny-di rierymy idi òbitimy betehekre iòraruna-ribi iixitarasadỹmy biwiòhenanykemy.

<sup>6</sup> Inyõ heka utura rati mana wiwihikỹ-di rehuõtyhy aõma ixỹni herina-txi. Ixỹni dori ityre rariake tahe riõnonyke adee heka kanakemy wahe. Iwese tule heka ijòròsa-ò biwahinydỹõmyke. Rybewiwihikỹ hãbu òrarudutyhy-ò iwahisidỹõmyke.

<sup>7-9</sup> Rexitòenykeki tahe bitake kia. Biekeki tahe tai mahake. Bihetenyekeki heka iny adee riraynyke ijòtòbòna. Inyõ heka Tyby-ò rỹsỹnaõmy rexitòenykeki, mana heka tyby tamy riwahinyõtyhy.

<sup>10</sup> Uturaõmy rexitòenykeki tahe hemylala binahakỹ tamy tiu riwahinyõtyhy.

<sup>11</sup> Kai aõna aõna wiwihikỹ biwahinyke heka teerymyhỹte auladu-ò wahe, hãbu òrarudu hãrele wahe. Aõbo heka tule Deuxu inytybyreny inydeereny riwahinyke aõna aõnaõ wihikỹõ. Rexitòenykeki tahe tamy ariwahinyke. Inytybyreny heka tamy riwahinyke. Iwese

iny witxira teyrubunymahãte wesele heka iny araywinymy ixi-di tahõtinymahãte wese.

12 Tule kai aõwiwi inyõ ixidee aõhebo rotỹỹnymyhỹkemy taruterí, kiaweselemy tamy botỹỹnymahãke. Kia heka Moisesi bedede ywina tyyriti-ki roire. Kiale Deuxumy rybedu mahãdu ribedeerynyre.

13 Biu bedede wiwihikỹ kia ryỹijõhỹtỹdile malokre. Heõty ijõ bederyijõ heka nihikỹ rare. Iny kia ryhykỹ irumy rakre heka isirare iny ibute kowa ralore.

14 Irumy nonona ijõ tahe ihỹtỹre. Ryy heka ihỹtỹre heka ibutere iny ryhỹtỹ-di ròtedu timy bedede erydỹỹkõdu-ò.

15 Bexiihebennyke kia mahãdu lau Deuxu rybe rybedu mahãdu tyhymy aõkõ lau wahe. Budoeni wese ratximyhỹre inytyhy wesemy. Tawo-ki tahe inatyhy rare ahola debore wesemy heka ratximyhỹre.

16 Teeryte wesemy ibederaty-ò betehekeki. Hede-ò heka uvamy figomy tule tiu iratyõna. Iaõmydỹỹna-ò bierybennyke tibo roiré.

17-18 Tii heka bierybennyke aõhebo rotỹỹnyre wana teerytenyte. Tii heka riitxenanyõtyhy kia aõma matyty matynimy heka tiu biitxenanyõtyhy. Tule betehekeki, bierybennyke aõwesele heka õwõruõ bierybennyke. Aõma bederatyõ birỹsỹkeki tiu heka bederaty wihikỹõ arỹsỹõna õwõru ratyy-ò, bederatybinahakỹ tule rierykre.

19 Õwõruõ bederaty wihikỹmy raratynyõkeki heka hemy raòròròke rokoke.

20-21 Kia weselemy heka iny teerytenyte. Aõhebo

iny rotỹnyke wahe. Tai tahe terytenyte heka, tetehtenyterikile wahe. Òbiti mahādu wesemy rarybemyhỹre. Tahe òbitimy aōkōre ihỹre. Sōwemy heka iny tawedumy riwaninire. Ihārele tahe biu-ò ralòōtyhy. Deuxu tyhydỹdũle tahe ralokre. Ywisidỹnatxu heka kawesemy wadee rarybekre.

<sup>22</sup> Sōwemy iny wahe: –Wanyrỹ, Wanyrỹ, jiarỹ hewa iny iwitxira sōwemy aijyy rarybemy rare wahe. Tule heka tyytybybina reteònymy rarewāhā. Tule deytana wiwihikỹ heka ani-di rewinyhỹre.

<sup>23</sup> Tai tahe jiarỹ tamy ararybekre heka: –Kōrehe, kaiboho aō wamahādumy aōkō atximahāte. Umy reerykōre. Waribi bexitake. Aòraruna dori sōwere.

<sup>24</sup> Kawesemy heka iny bede eryna ratximyhỹre. Warybe-ò roholamyhỹreu heka aōwesele riywinymy rityhynymyhỹre. Kia hābu hetowidỹdu wesemy heka rare. Iheto heka manatyre-ki riwinyre. Tii heka ibedeery sōwemy ihỹre.

<sup>25</sup> Biu heka beòra heka rariamyhỹre. Iu tahe biu rejuxunymyhỹre, yhy rebonyre. Tahe tiu re-seòtyhy manatyre-ki dori riwinyre.

<sup>26</sup> Warybe ijohonadu tahe iwitxiramy ihỹre. Hābu itxỹte tahe warybe-ribi aōwesele tōhõtireny rosamy reamyhỹre. Kaiboho aōbedeeryhykỹ aōkōre roire. Tii heka iwese hābu ŷnarakile heto riwinymyhỹ wese rare.

<sup>27</sup> Biu risebenykeu, beòra rareareu, yhy rebonyreu tahe iheto reseke, ibutumy iōre, rahura.

<sup>28-29</sup> Ibutumy heka Jesuisi rybe erysydỹna-ò bede riòtiinyre. Tii heka hābu erysydỹdu wesemy

tii ribedeerymyhỹre. Aõ judeu wedu wesemy aõkõ ribedeerynyre.

## 8

<sup>1</sup> Tiu hãwãlò-ribi dobehedeu, sõwemy heka iny ihemy doidemye webinadu, tybina heka tamy nade.

<sup>2</sup> Wowydyna rybe-di heka tamy rarybere: — Adeewikeki heka kai biwateytenyke. Jesuisi dirawyònyde:

<sup>3</sup> —Wadee awire, arateytenykre. Tahe tamy tebò ritytere tamy reerimy. Ityybinana riteytenyre.

<sup>4</sup> Tahe Jesuisi tamy rarybere: —Boholakre, iny-ò uritere rybeõmy.

Kai tahe makre xiwena wahidỹỹdu-ò xiwenaõ biwahinykre. Idi tahe Moisesi bede ywina raryberewesemy xiwenaõ biwahinykre. Kai tahe iny rierykemy heka yteny ratximyhỹre.

<sup>5</sup> Jesuisi Kafanaõ hãwã-ò rehemynyreu heka hãbu soldado weduõ tamy rehemynyre. Tii tahe Jesuisi-ò rexitòenyre:

<sup>6</sup> —Wadeòdu biteytenyke raterenymy ratxireri waheto-ki. Sõwemy aõhõkõmy rotỹỹnyreri. Ibinatyhymy roireri rexisiranymy raratykõhykylemy.

<sup>7</sup> Tai tahe Jesuisi tamy rarybere: —Rakakre, tai ariteytenykre.

<sup>8</sup> Idi soldado wedu rariwyònyre: —Aõkõre, Kai hãbu wiwihikỹ tate. Jiarỹ tahe hãbu aõ aõkõmy jiarỹ watxiwãhãre. Waheto-ò manalòõtyhy. Kari-bile marybekre tamy taile taile tahe wadeòdu reytekre.



<sup>9</sup> Jiarỹ dori reyryre. Jiarỹ heka tule hãbu we-duõmy watxiwãhãre. Soldado heka sõwemy ri-watyhynymyhỹre. Iny sohoji-ò aõma rakremy rarybemyhỹré heka, ramymyhỹre. Tule ijõ dee rarybemyhỹre: –Manake, tai tahe namyhỹde. Ijõ dee rarybemyhỹre wana: –Kai biwinyke, idi ri-winymyhỹre.

<sup>10-11</sup> Tai tahe Jesuisi ribedeòtiidỹnyre irybe-ki wahe. Tahe rarybere erydỹna mahãdu-ò: –Judeu mahãduy-ki tai rahaõre ijõ-ki kahãbu wesemy inatyhynana sõwerekí. Sõwemy heka judeukõdu mahãdu ritynykre kia weselemy. Ijõ txu aõ wiji aõkõ heka riroxirenyke: Abraõ, Ijai, Ijaò-wana biu-ki heka riroxirenyke bede ludu iny mahãdu-wana.

<sup>12</sup> Judeu mahãduõ ròirenyõkre tamy. Tule kai-bohoõ tahe aõhetykrebo. Ijõ mahãdu dori bede lorohokỹ-txi resekre. Taiki tahe irynamy rurykre aõkõmydỹnana-ò.

<sup>13</sup> Taita Jesuisi soldado dinodu-ò rarybere: –Makre, timybo wiji tahõtínymy tetyhynyte wesemy heka rarekre. Iurele teòdu reytère.

<sup>14</sup> Iribi tahe Jesuisi Pedro heto-ò ralòre. Iriòre lahi heka aõma rubuna nihikỹ roimyhỹ.

<sup>15</sup> Tahe Jesuisi rimyre tebò-di tamy rerire. Idi tahe irubuna iribi ròhònyre. Tai tahe tii ronyre. Ronymy tahe rỹsỹna riwinymyhỹ tamyreny.

<sup>16</sup> Txiorotyhymy inyõ didyde aõma tyytybybina nihikỹ-di ratximyhỹõ. Iu Jesuisi sohoji rybeõmy rarybereu tahe aõwesele iribi ròhònyre. Kia webi-nadu didyde, tule reytère.

<sup>17</sup> Iwese ihetxiu Isaia ryberiti rarybere wesemy heka tule riwinyre:

Jesuisi riwinyre. Kiamy wahe. Wabinanareny waribireny riwyre. Inatyhyre.

<sup>18</sup> Iny sōwemy ributunyreu. Tai tahe taerydỹỹna mahādu-ò tii rarybere: –Rokoirenyhe kanawe-ribi ijà-ò.

<sup>19</sup> Tai judeu mahādu, bede ywina bederydỹỹduõ tamy rarybere: –Awana arakre titxibo makreu heka ahekile anakre.

<sup>20</sup> Tahe Jesuisi dirawyònyde tamy heka rarybereri: –Ijòrò heka ihāloo dire, ibỹtỹ dire, nawii bỹtỹ isỹ dire. Tahe jiarỹ, Deuxu Riòre Hābutyhyhykỹ wahe, wahetoõre, waherinaõre.

<sup>21</sup> Ka ijò iheludu mahāduõ tamy rarybere: –Wanyrỹ, waha heka rurura. Tai heka juhuu aritu-nykre.

<sup>22</sup> Tamy rarybere: –Manake, wijile biwahe-ludunyke. Rubuõmy rỹira, rubu mahādu heka rituunykenyke idi ratxireri.

<sup>23</sup> Jesuisi hāworo-ki ronyre tahe reurore. Ieryredỹỹna mahādu riheludunyrenyrene kia lawokile.

<sup>24</sup> Ahobetya-ki tahe yhy debore nihikỹ tamyreny rehemynyre. Tahe òbò nihikỹmy resemyhỹre. Uritereribile yhyhykỹ bee riòbònyra hāwò rilỹmynyke iòhòtyhyre. Jesuisi tahe rōrōmy roimyhỹ iu.

<sup>25</sup> Tai tahe ierydỹỹna mahādu heka riixix-adỹỹnyre. Tamy raryberenyre: –Biwayrubunyke, Wanyrỹ. Aõkõkeki, rukururenykre.

<sup>26</sup> Jesuisi tamyreny rarybere: –Aõherekibo kai-boho taberutenyteri? Aityhyna sōwe aõkõ atx-itenyteri. Jesuisi tahe rỹimy reare. Yhy debure-ò,

òbò-ò rarybere: –Biyryke, bede binahakỹ. Tahe aõwesele ibutumy riyryra.

<sup>27</sup> Ierydỹỹna mahãdu urile ribedeòtiinyre. Tii-boho raryberenyre: –Aõhãbubo tii ihỹre. Òbò, tahe yhy-wana tamy roholare. Iwese tii rarybere wese rityhynyre. Irybemynale riwinyre.

<sup>28</sup> Kalileia aho ijõ weribi ijana-ò ritehemynyre. Kowa bede heka Kadara inire. Tule hãbu inatxi heka tyytybybina-di tai rasỹnyrenyre wabedewo-ki. Kiary-ki tahe ibutumy iny ruberure. Iribi tahe ròhònymy reare.

<sup>29</sup> Aõwesele heka ryrymy roirenyre Jesuisi-ò rarybekremy: –Aõwe wadireny tate, Deuxu Riòre? Kai aõbina binahakỹmy wahõrõdỹỹõmykre.

<sup>30</sup> Tahe kowa-ki ixỹni juramy riroximy rỹimyhỹ.

<sup>31</sup> Tyytybybina tahe Jesuisi-ò rexitòenyre: –Biwatòenybenykeki, ixỹni jurawomy aralorenkemy biwateònyke.

<sup>32</sup> Tahe Jesuisi rarybere: –Bòibenyeke hãbuwo-ribi. Tahe ròirenyre ixỹniwo-ò. Ixỹni jura tahe ibutumy rejuxunyre ijõtira-ribi. Berawo-txi tahe rabòròròre.

<sup>33</sup> Ixỹni-di itxeredu mahãdu tahe hãwã-ò roirenyre ijyymy.

<sup>34</sup> Kia hãwã ludu mahãdu tahe roirenyre Jesuisi-ò itxeremy. Tai tahe tamy rarybere ibede-ribi ròhònykemy.

## 9

<sup>1</sup> Ribererenyre aõma hãwò nihikỹro-ò reuròrenykremy kanawe-ribi ijà-ò. Tai tahe Jesuisi tahãwã-ò rehemynyre.

<sup>2</sup> Tai tahe didydenyde weryrybòò byre-di idi be-tyky-di ramyremyrenymy roimyhÿre. Tahe hãbu mahãdu inatyhyna Jesuisi rieryreu heka hãbu dee rarybere: –Waexi, beysake, aõraruna dori reixãwididÿÿnyra.

<sup>3</sup> Tai tahe ritidÿÿna bederydÿÿdu mahãdu retehereri. Ixideele heka rarybemahã: –Kia heka ibinamy Deuxumy rarybereri.

<sup>4</sup> Iyky Jesuisi rieryre tahe tamyreny rarybere: –Kai aõbo ibinamy waki tahateri arayky-ki.

<sup>5</sup> Timybo heka kaiboho tahõtinyteri. Aõma iõraruna ariixãwidinyke aõbo ada iumy ariteytenyke aõbo? Aõbohe isiratyhyre wadee tahõtinyte wahe.

<sup>6</sup> Deuxu-ribi waruru dire. Kabede-ki heka õraruna ariixãwididÿÿnyke jiarÿ heka Deuxu Riõre Hãbu tyhyhykÿ rareki wahe. Tamy rarybekre: –Myike, abyre bimykre ta mariakre asÿ-õ.

<sup>7</sup> Tai tahe hãbu aõwesele rÿimy reare. Tahe taheto-ò rare.

<sup>8</sup> Tahe bedede inysõwetyhy heka ribedeòtiidÿÿnyre. Deuxu heka wowydyna riwahinyre. Tii iny-ò ruru riwahinyreki wahe.

<sup>9</sup> Jesuisi iribi rariamy rare. Tai tahe tii Mateu-wana heka witxi reare ryki: –Jiarÿ heka nieru butudÿÿna heto-ki ranymahã. Jiarÿ rebutunymahã aõma inyòwydÿÿna heka rebutunymyhÿre. Iu Jesuisi wadee rarybere: –Manake waerydÿÿnaõmy heka beleke. Tai tahe jiarÿ tii-wana heka rare aõwesele heka ihemy rare.

<sup>10</sup> Tai jiarÿ retobinyre kanakemy waheto-ò. Waheto-ki roxikemy taerydÿÿna mahãdu-wana. Tai

tahe sōwemy heka iny waery mahādu dōidenyde, òrarudu nihikỹ mahādu wahe.

<sup>11</sup> Tule heka fariseu mahāduō tai ratximyhỹ. Tahe Jesuisi erydỹỹna mahāduō kiaō-ò heka rarybere: —Aōherekibo Jesuisi òrarudu nihikỹ mahādu-wana riroxireri?

<sup>12-13</sup> Tai Jesuisi roholarehe tamy rarybere: — Aōma òhotibedu heka, webinadu mahādulemy aōnityhymy rarumahāre. Òhotibedu-ò kanakemy. Binadu mahādu-ò tahe tiu ararariòwyōtyhy aōma òbiti widỹỹdu mahāduòle heka anade. Warurumy rurumyhỹle mahādu ariwiòhenanykemy anade. Aō awihikỹmy ixi-di rōhōtinyreriò aōkō wahe. Deuxu Ryberiti-ki tahe kaweselemy roire:

Ixiwe heka wadee awiōre aruxetòena wadee awire.

Kaiboho bierybenyke aōbo katyyriti rare.

<sup>14</sup> Tahe Jesuisi-ò rarybere Joaō eryna mahādu: — Aōherekibo Joaō Sebedeỹỹdu kia erydỹỹna mahādu renarehemyhỹre rexitòenykreu. Fariseu mahādu erydỹỹna heka tule heka renarehemyhỹre. Ihārele taheka aōherekibo abedeerydỹỹna mahādu heka tiu iwesemy riwinymyhỹre. Aōherekibo ka.

<sup>15</sup> Taita Jesuisi dirawyònyde: —Iu iny inyhāwyymy roimyhỹreu heka iny reysamyhỹre. Aōma kia weryrybò hāwyy kialiina heka teysamy ratxirerimy ihỹre. Tiu rirubunyōhymyhỹre teti-ò. Tahe aōutxumy tahe weryrybò hāwyymy heridu heka inyō ritakremy ratximyhỹre. Iu tahe renarehekre heka.

<sup>16</sup> Uritere inyō deratyby ritòbònyōtyhy tyytỹmyra-di. Inyō itòbòna tỹmyra-di ritòbònykeki, raykake heka iura ranihikỹke. Aōma iwesele rare

aõma vîĩ tỹmyra iròdutyy tỹmyrahakỹle ritidikreu. Aõma itỹmyra-ò heka iròdutyy itỹmyrahakỹle raykake.

<sup>17</sup> Aõhe tiu vîĩ tỹmyra iròdutyy tyby-ò rihynyõtyhy. Inyõ kia wesemy riwinykeki taheka raykake heka rejuxunykre irube. Ihyna heka rabinake. Vîĩ wihikỹ taheka aõma iròdutyy tỹmyra hyynawo-ki ka awimy rỹike.

<sup>18</sup> Iu dohodỹỹdu hetoõ bede erydỹỹduõ heka Jesuisi-ò nade tariòre rurureki wahe. Tai ta Jesuisimy reàlàre tamy heka rarybere: —Aõma wariòre rarurura wahirari wahe. Kai waheto-ò manake wariòre ruru-ribi biixixanykremy.

<sup>19</sup> Tahe Jesuisi taerydỹỹna mahãdu-wana roirenyre tii wana wahe.

<sup>20-21</sup> Tahe hãwyy rõhõtynyre heka: —Jikarỹ heka ityky reroti-kò karirikrekule karekytekre. Tii dori ihãlubu rihyõhy raremyhỹre waò inatxi reurò beòramy. Iõhõmy iribi reare. Ireroti wereysanakile rimymy resere.

<sup>22</sup> Taita Jesuisi ròòsemy reare. Tuu robire tamy rỹraxire: —Lerỹ, awi heka rare. Aityhyna heka arateyteynyre. Inatyhymy teyteta. Tai tahe hãwyy aõwesele reytemy reare.

<sup>23</sup> Idi tahe aõwesele rehemynymy reare. Judeu wiuna bedeerydỹỹdu heto-ò rehemynyre. Tai heka hãwyy sõwemy robumy rỹimyhỹ rubura-ki rawiunymy rỹimyhỹ.

<sup>24</sup> Tai tahe Jesuisi tamyreny rarybereri: — Bòibenyke hewahe. Hirarihakỹ heka ruruõhyky roireri. Urile heka rõrõmy roireri. Tahe iny rutxuenyrene.

<sup>25</sup> Tai iny sõwemy ròhònnyre iribi. Tahe Jesuisi ralòre

titxibo hirarihikỹ roireriò. Debò-ki rimyre tahe riteytenyre. Rexixare ixyby.

<sup>26</sup> Ibutu bedede bedemyhe inina-ò roholare. Kia deytena riwinyràò.

<sup>27</sup> Tahe hãbu ruetà inatxi Jesuisi riheludunyre heka. Kia hetoy-ribi wahe. Tamy heka raryberenyre: —Kai heka iòlò Davi riokore tate. Tai tahe ruxetòena-di biwawotòenyke.

<sup>28</sup> Idi tahe Jesuisi taheto-ò ralore tai rasỹnyny ratximyhỹò. Iny mahãdu ihewomy rare tahe ralòre. Tamy rarybere: —Inatyhymy aõbo tetyhynytenyte, ixyby arãitxeredỹỹnykeò. Tiiboho raryberenyre: —Kohe Wanyrỹ, retyhynyre.

<sup>29</sup> Jesuisi rarybere: —Ainytyhynadireki arue tabita. Aõwesele robirenyre.

<sup>30-31</sup> Jesuisi heka rarybere tarurumy tamyreny uritere ijyyõmykremy. Tai tahe aõma ròirenyre ibutuko relyyrenyre.

<sup>32</sup> Idita tako-ò rexidorunymy reareki tasỹ kia hãbuõ-txi reare tyytybybina-di ratximyhỹò.

<sup>33</sup> Tahe Jesuisi-ò didydenyde hãbu irybeõna kia tyytybybina òraru-ki wahe. Jesuisi tuu òlòdỹỹnyre iribi. Iule tahe hãbu aõwesele heka rarybere iroo-ki. Kia iny ibutumy ribedeòtiidỹỹnyre. Timy heka rarybeõhyyre iko-ki juhUU raremyhỹu. Tuu rabiõhe iwesedỹỹnadumy.

<sup>34</sup> Idi tahe fariseu mahãdu rarybere: —Tyytybybina-di ratximyhỹre. Tai heka tyytybybinahakỹ reteònymyhỹre iny-ribi. Ihãrele heka Satanasi-di ihỹre. Tyytybybinatyhy wedu heka ratximyhỹre.

35-36 Idi tahe ibutumy hãwã hãwã-di Jesuisi rariamy rare ròbedeerydỹmy. Judeu mahãdu dohodỹna heto-ki relyymyhỹre, Rybewihikỹmy. Tai Iòlòna kia ritỹnynomy tuu relyomy. Ibutumy iny bina bina kia heka riteytenyre. Iny nade ihewo-ribi. Sõwemy heka iny aõna aõna bina binahakỹ riwinymyhỹre idi rỹimyhỹ. Titxibo rakre heka rieryõhykymyhỹre ta aõna aõna òraru-ki idinoduõreki wahe. Tai tahe Jesuisi riwotòenymyhỹre ibutumy tiiboho dori budoeni wese ratximyhỹre, itxeredu ihoõreki.

37 Tai tahe taerydỹnana mahãdu-ò Jesuisi rarybereri: –Iny heka maixõmo sõwehekỹ rỹira wese heka iny ratximyhỹre. Aõma ibutelemy heka arixidu rỹira.

38 Bexitòenyke Deuxu-ò. Tii heka bederomy maixõmo rỹira wedu rare. Bexitòenyke tamy aõbo maixõmo arixidu-ò kiditeònykemy. Irybe-di heka raaõmysỹdỹkre ibedero-ki. Ibutu bedero-ki heka idi raaõmysỹdỹkre.

## 10

<sup>1</sup> Ributunyre Jesuisi aõma tawa-ò inatxi reurò kia bede erydỹna mahãdu. Tamy heka ruru riwahinyre. Aõma tyytybybina riteònykemy. Tule tamy riwahinyre ibutu binana deytana heka riwahinyre tamy.

<sup>2</sup> Kia heka tadeòdỹmahãdurenynimy ararybekre. Juhuu heka Simaõ Pedro. Juhuu heka Simaõ inire, ihewomy tahe Pedromy naninide. Andre ijõ. Tii heka Pedro seriòre rare. Txiau, Joaõ-wana heka Zebedeu riòre rare:



<sup>3</sup> Filipi tasỹ ijõ rare. Idi tahe Bartolomeu ijõre. Tome ijõre. Mateu ijõre, jiarỹ wahe. Jiarỹ nieru tarasaduõ rare, imposto tarasadu wahe. Ijõ Txiau tasỹ Afeu riõre rare. Tadeu ijõre.

<sup>4</sup> Simaõ ijõre. Tii Kana bede luduõ rare. Judasi Isariõ ijõre. Tii heka Jesuisi tyhedỹỹdu rare.

<sup>5</sup> Jesuisi taerydỹỹna mahãdu waõinatxi reruõmy riteõnyre. Tamyreny rarybere: —Judeukõdu mahãdu-ò aõkõkre reteõnyre. Aõma Samaria mahãdu hãwã heka ralõõhyymyhỹre.

<sup>6</sup> Kaiboho heka bõibenyeke judeu mahãdu-ò so-hojile. Tiiboho Israeli riokore mahãduõ ihỹre. Aõma budoeni reõsamyhỹre mahadu wesemy tiiboho ratximyhỹreny.

<sup>7</sup> Aõma tamy marybebenyeke: —Deuxu Iòlõna biu-ki heka aõwesele kedehemynykemy ihỹre.

<sup>8</sup> Webinadu mahãdu heka biteytenyeke. Aõma iny rubu-wana witxi beakeki, biixixadỹỹnyke rubu-ribi. Tykybina yjy yjyhykỹ-ribi iny biteytenyeke. Tyytybybina inywo-ribi biteõnyke. Iwese aõ tetate wese iõwykõ heka ijõ-ò biwahinymahãke, iõwykõ wahe.

<sup>9</sup> Uritere nieru wydyõmy, womati tỹrỹrỹhỹkỹ nieru aõkõ, prata womati nieru aõkõ, cobre womati nieru aõkõ wahe.

<sup>10</sup> Aõma anieru hyna nihikỹ wydyõmy, awa ijõ wydyõmy, ijõ dera wydyõmy. Aõma òwòru arirana wiõhedỹỹna wydyõmy. Aõmysdỹỹdu taòwy riwykre. Kia õbitire.

<sup>11</sup> Hetoõ malõke. Kia heka arayrubunykre. Adee riwahinykre ibutumy aõmybo rarumyhỹkre. Iu hãwãõ-ò malokreu, hãbu ityhydỹỹdu mahãduõ bi-ijekre. Taihyy bonykrehy tahe iwitxira hãwã-ò

iribihyymy makre.

12 Iu hetoõ-ò malòkeu Deuxu ywina tamy marybekre, Deuxu deysanamy wahe.

13 Kai awimy ityhydỹđdu hetomy rỹike wana, biwahinyke aalàna tamyreny. Kai òbitimy aõkõ atxiteri wana tahe uritere tamy Deuxu deysanamy tamy wahidỹđõmy.

14 Aõma tii arybe-ò roholaõkeki, kai hãwã-ribi bexitake taheto-ribi wahe. Tahe iribi bõhònykeu tahe awabrybyxi biubýtỹnymy bõhònyke. Tii tahe tamyreny rioimyhỹre. Aõma tamyreny ibinatyhykre.

15 Inatyhymy heka adee ararybekre. Sodoma hãwã mahãdu, Komora hãwã mahãdu inatyhymy heka ibinare tamyreny tahe isiraõkre aõhõkỹmy dỹỹnana wahe. Aõma kia hãwã arybe-ò raholara heka kia ratyre heka tamy isiraõkre. Kia hãwã tahe aõnityhymy aõhõkỹmy rotỹỹnykre. Ywisidỹỹna txu heka rỹekreu wahe.

16 Iwese budoeni ijòrò aholay-ki rỹikre wese heka kaiboho boibekre. Hemylala erydỹỹna wese my heka maraykynykre. Idi tahe sõwemy aõma ywina-di maraykynybenykre bòtòewesena-di.

17-18 Uritere inatyhy heka aramykre araròtenykre dohodỹỹna hetowo-ò adi ralokre. Waòraru-ki heka bede dinodu mahãdu heka araywisidỹỹnyakre. Judeukõdu mahãduko Rybewihikỹ Tỹmyra rarybekre. Tiiboho arahãtenykre.

19 Aõ heka belyyke ikoreny ibutumy roholakemy. Aramykeu heka uritere nohõtiõmyke aõmybo marybekremy ywisidỹỹna-ki wahe. Bede

heka ariwahinykre rybe ibededỹnanau. Rybeõmyke, urile rybeõmyke.

<sup>20</sup> Kai ixivanale aõkõ marybeke. Aõma Deuxu Tytybytyhy arãwiðhenanymyhỹrenyre.

<sup>21</sup> Inyõ heka taseriõre rityhenykre. Tybyõ tule tariõre rityhenykre. Aõma iriõre tasỹ tyby-ò icky reakre idi rirubunykre.

<sup>22</sup> Ihyy ibyrymy heka aluu aõkõkre waðraru-ki. Ibutumy iny deramy rarehyyke waðraru-ki: Inyõ tule òbitimy rarekreki, ikonanatxu-u, Deuxu Iòlòna-ò ralokre.

<sup>23</sup> Tahe anatakre. Aõma hãwãhãkỹõ-ki atxikeki mahenykre ijõ hãwã-ò. Ihewoludu ikonana hãwã hãwãhãkỹ-ribi behemynyke-ribi tahe adòðsekre. Judeu hãwãhãkỹõ-ò behemynykrekõule tahe adòðsekre, jiarỹ Hãbutyhyhykỹ wahe.

<sup>24-25</sup> Aõma bederydỹdu mahãdu tahe aõma ierydỹna mahãdu ratyre rare. Tule iwedu deòdu ratyre heka ihỹre. Iwesereny tahe boibebenykre. Tahe awedu tate. Inyõ tahe riwarinimyhỹre Satanasi, Belisibu wahe raremy. Tahe iwesele heka iny araninykre waweselemy, ibinatyhyre wahe.

<sup>26-28</sup> Jiarỹ adee wiji relyreri. Biurasòmý heka tuu bedelyykre ibutu ijohonanamy adeereny relyreri. Wasimy wijirumy adeereny relyyre. Biurasòmý tahe ibutu ijohonanamy tuu belyybenykre. Uritere ilau brebuõmy. Aõbo wasimy rỹire heka ibutumy ratỹnykre. Uritere ilau brebuõmyke. Adeelekre rirubunykre atytyby ta rirubunyõtyhy. Iruruõre dori atytyby rirubunyké. Deuxule tahe bityhynyke. Tii dorihe iruru-di heka rare. Tii bede luru-txi heka atytyby bedeluru heòty-txi heka adi rehuke. Bityhynyke idile

maraykynyke. Hābu lau brebuōmy hābu aōbina bina riwinymyh̄re lau brebuōmy.

<sup>29</sup> Nawiiō iny riwymyh̄re womati nieru iyja-di, iōwy riōre iny heka riwymyh̄re. Ibutumy heka Deuxu nawii rieryre sohoji sohojimy. Tiu heka Deuxu rieryōhyymyh̄re nawii sōmo rurumyh̄reu heka tiu rieryrykōmy idi reteheōtyhy. Kia wese aōbo tahōtinymahāte. Aōkōre, inatyhymy idi retehemyh̄re. Ijō rurumyh̄reu heka tuu robimyh̄re. Aōma Deuxu heka anaerymyh̄re nawii sōmo ratyre heka aumy rierymyh̄.

<sup>30</sup> Ara erymy heka aōma arati-ki tiwesebo radeti r̄ymyh̄re heka rierymyh̄re.

<sup>31</sup> Breburenykōmykre, kaiboho dori nawii ratyre Deuxu-ō toite.

<sup>32-33</sup> Kai marybeke: —Jiar̄y retyhynyre dori tahe umy arelyyke. Jiar̄y heka umy ararybeke inynyrȳ dee biu-ki wahe. Iny sōwehek̄y-ki riwatxiōnykeki tule aratxiōnyke jiar̄y Wahako-ō. Jiar̄y heka suō anade.

<sup>34</sup> Aō ywina wydymy aōkōre heka anade. Jiar̄y heka ywina aōkōre diwyde. Bedejeijeid̄ȳmy anade iribi wadee wou r̄yikremy. Hābu heka tybe òludumy rarekre.

<sup>35</sup> Tule hāwyw tadi òludumy arisynykre. Tule iriokorese tariōrelahi òludumy arisynykre. Aōma inyō òludu heka tas̄y mahādu òludumy rarekre.

<sup>36</sup> Boluu adireny boreny heka boibekre. Kia lumy heka boibekre. Tai tahe iratyremy boibekre aōkōkeki tahe waluuōkeki tahe wahōrō mahādumy aōkō boibeke.

37-39 Kaweselemy boibeõkeki. Tai tahe kai wahõrõ mahãdumy aõkõhe mabekre. Aõma biyrurubunutyhykeki tahe kai ihãrele aõkre. Aõma kai waõraru-ki aõhõkõmy botõnykeki wadee waaõmysõdyõ òraru-ki inyõ anarubunyekeki aõhe adee rutõnykeki. Tai tahe aumy ròhõnykre inyõ tasõ-ò aradykeki iwese tii tasõ-ò riwadyra wesele heka aradykre.

40 Tii riwadyra wana Deuxu heka ridymhõre riwateõnyreki wahe.

41 Deuxu rybeduõ bidybenyekeki. Tii Deuxu-ò arãwahinykre. Deuxu adee uriiõno kadiwahinykre. Adeereny kidiwahinykre. Wahisidõyna ritakre wese heka tule kai bitakre. Adeereny ararybekre. Deuxu hõrõ mahãdu heka bimymahãbenye. Aheto-ò bidybenyeke hãbuwi ihõreny. Tiiboho dori wese uriiõno ritarenykre wesele kaiboho bitabenyke.

42 Kai uladu-ò bemonã biwahinykeki bedi imonamy. Tai tahe kanakre inatyhymy adee aõ kidiwahinykre. Kai waõraru-ki ityhydõdu-ò bee biwahinykeki, inatyhymy heka aõwy adee kanakre.

## 11

1 Jesuisi heka rexihure aõma taerydõyna mahãdu waõinatxi bederydõyna-ribi. Kia bede ywina tamyreny riwahinyre. Rexihureu tahe rare ròhõnyre iribi hãwã-di. Aõma rybe ritõnydõmy rakremy hãwã hãwã-ò.

2 Idi tahe ròtenywokile heka iu Joaõ roimyhõ. Aõbo Jesuisi tahe iu aõna aõna wiwihikõ ritxienymhõre heka Joaõ tamy roholare.

Ròtenywo-ki roimyhỹ-ribi. Idi tahe Joaõ taerydỹña mahãdu riteònyre Jesuisi-ò dỹñraximy:

<sup>3</sup> —Kohe, anaraòdenyde tate. Aõma Deuxu deòdỹña wahe kanakre aõbo ihewo-ribi. Ari-raòrenykre aõbo urihimyo.

<sup>4</sup> Tai Jesuisi rirawònyre: —Aõma bòòsebenyke ixybyle Joaõ-ò. Belyybenykre ikò aõna aõna wiwihikỹ rewinyre arureny-ki tule tabite wamyreny.

<sup>5</sup> Aõma iruetàhàkỹ heka. Reruedỹñnyny rare wahe. Itiere tasỹ retinywãhãre dinoduhukỹ ityy reytemyhỹre. Aõma ijõ Rybewihikỹ Tỹmyra roholãhyymyhỹre tasỹ tule reijohonadỹnyre. Aõma rubu tule rubu-ribi reixixadỹnyre. Rybewihikỹ Tỹmyramy heka retỹnydỹnyre ibutu iny-ò wahe, iny aõkõ mahãdu-ò wahe. Tule Joaõ-ò mary-bebenyke kaweselemy wahe.

<sup>6</sup> Maratyhybenykeki, beysabenyke.

<sup>7</sup> Iribi ròhònyreu tahe Jesuisi heka rarybere Joaõ bededỹñnanamy. Aõmybo wahe Joaõ-di rõhõtinyrenyrene aõmy tuu bedi nohõtinyrenyrene tamy itxereny bederahy ròirenyreki wahe. Otxirarade wese yhy-ki tahõtinyteri.

<sup>8-9</sup> Ada aõma hãbu urimynodutyhymy aõbo idi rõhõtinyrenyrene. Aõma butòre wesemy idi rõhõtinyrenyrene. Ada iwitxiramy aõbo idi tahõtinytenyete hãbu tyywihikỹdiremy idi rahõtinytenyete. Iòlò taheto wihikỹ-ki ratximyhỹre. Aõkõre, kia iny heka aõ Deuxu rybeduõmybo tahõtinytenyete. Inatyhy tii kia rare.

<sup>10</sup> Iratyre heka tii rare. Aõma dori Tyyriti-ki rarybemyhỹre:

—Tii heka wako-ki kadehemynykremy

ratximyhÿre, wamy relyykemy, wary  
riywinymyhÿre.

11-14 Inatyhy heka rare. Tii heka ibutu hãbu ratyre  
ratximyhÿre. Ihãrele tahe heka Deuxu Iòlòna-ki  
heka ijõ iny iratyre ratximyhÿre. Hãbu binahakÿ  
heka Deuxu Iòlòna-ò raaõbinanymyhÿre. Joaõ rex-  
idelenyre rybe itÿnydÿÿmy rexidelenyreuhyye  
heka ritelemy ralore. Tule wiji nalòmehÿde  
sõwemy. Iu Joaõ rehemynykõle heka tuu rarybe-  
myhÿre ibutu Deuxu rybedu mahãdu heka tuu  
rarybemy raremyhÿ. Tule Moisesi bede ywina kia  
rarybere. Tii Eliasi wesele ihÿre. Tetyhynytenyte  
aõbo. Iwese Deuxu rarybereri wesemy heka tii  
nade.

15 Inyõ ierysomy rurukeki, roholake wiji. Aõmybo  
ararybekre kainymy tiwesebo rÿimyhÿremy.

16 Tiiboho heka iwese weryry uladu risinymyhÿre  
wesemy ihÿrenyre. Kiamy heka tiinamahãdu-ò  
rarybemyhÿre:

17 –Jiarÿboho heka aõma wiunawi-  
hikÿ-di rawinymyhÿrenyre. Idi tahe  
teysatenyõhyymãhãtenyte. Tahe wiuna  
bederarysyna-di heka rawiunymyhÿrenyre. Ta  
bedewoõhyymahãtenyteri.

18 Joaõ Sebedÿÿdu heka riroxiõre. Vĩmy riõõre. In-  
ywesereny tai tarybetenyte: –Tii raitxÿtemy ihÿre.  
Tyytybybina-di ihÿre.

19 –Jiarÿ Deuxu Riòre heka rehemynyre  
Hãbutyhyhykÿ wahe. Jiarÿ reroximyhÿre.  
Reõmyhÿre tahe kiaboho heka waluu aõkõ heka  
toite. Urile heka wamy tarybemyhÿtenyte wabyre  
nihikÿremy wabemomohõkÿremy. Aõma òrarudu  
kia liinatyhy heka jiarÿ rare. Aõ ikõkõlemy heka

taraykynymyhỹtenyete ihãrele taheka òbitilemy  
ixi-di tanohõtímyhỹtenyete.

20 Jesuisi heka sówemy aõwíwíhíkỹmy  
riwiny my raremy. Ihãrele heka imahãdu  
rityhynyõhyymyhỹre heka. Kia Jesuisi heka  
rarybere kia hãwã mahãdumy.

21-22 Orasi hãwã aõ heka adee binatyhymy  
kanakre amahãdu-ò wahe. Besaida hãwã  
mahãdu, kaiboho aõna aõna wíwíhíkỹmy  
tabitenyete ahãwãreny-ki. Tiu heka ixi-txi õhõtireny  
reaõhykymyhỹre. Jiarỹ aõma Tiro hãwã-ki Sidõ  
hãwã-ki aõna aõna wíwíhíkỹ ariwinyre wana  
inihe heka ixi-txi tõhõtireny reare iniheka saumy  
tyky rexitynyre tule brybysi ixityreny heka  
rexihumy. Sidõ hãwã Tiro hãwã heka urihimyo  
adeereny isirakre.

23-24 Kafanaõ hãwã mahãdu! Kaiboho heka tule  
ixitxireny õhõtireny reaõhykyre. Aõma kaiboho  
heka awireny ixidireny tahoõtínymahãtenyete,  
awityhyremy. Kaiboho heka õhòtenamy  
bekoabenykre bedebina heòtyhykỹ-ò dori  
besebenykre. Sówemy dori aõwíwíhíkỹmy kaiboho  
tabitenyete. Deysana wíwíhíkỹ-di wahe. Tiu heka  
ixi-txi õhõtireny reaõhykymy aòrarureny-txi. Aõ  
wíwíhíkỹ Sodoma hãwã-ki rewinyre wana wahe.  
Tiu heka rabinaõhyre inihe heka wiji-ò. Aõkõ  
botỹỹbenykre aõma Sodoma hãwã ratyre heka  
aõhõkỹmy botỹỹnybenykre, Deuxu ywisidỹỹnatxu.

25 Tahe Jesuisi rexitòenyre Deuxu-ò: —Waha, biu  
bede-wana iwedu atximahãte. Kai uladu-ò aõna  
aõna tetỹnynte. Tewòmahãte heka kia ibedeery-  
hykỹ lau heka tewòmahãte. Kai ixi-di bedeery-  
hykỹmy rõhõtínymyhỹre lau wahe.



<sup>26</sup> Tii heka adeewinare.

<sup>27</sup> Ibutumy heka Waha wadee riwahinyre tii heka riwaeryre. Jiarỹ tule tii reeryre. Aõma ixidee wikeki inydee ariteòsinyke. Timybo Waha rare.

<sup>28</sup> Elehydỹmy buruke aõbo? Manake wadee. Jiarỹ heka araelehynkre.

<sup>29</sup> Walòtityreherina ixidee bitidibenyke. Tai tahe wawana maaõmysỹdỹbenyke. Arabederynykre heka ywina-di. Aritidiòtyhy heka aõ utxiehekỹ atyreneny. Elehyna adeereny ariwahinykre awo araykyreny-ò.

<sup>30</sup> Aaõmysỹdỹna adeereny rewahinymyhỹre isiraõre heka. Iutxiemy aõkõ rare.

## 12

<sup>1</sup> Sabado txuu, judeu elehynatxu Jesuisi rariamy ròirenyre maixõmoni oworu-ki. Tahe rekoarenyre aõma maixõmoni oworuro-di heka irenyre. Kia heka tahe Jesuisi taerydỹna mahãdu heka ri-arimyhỹre aõma riyrenykremy rama rahuraki.

<sup>2</sup> Iu-ki tahe fariseu mahãduõ retehemy ratximyhỹre. Tiiboho tahe rarybere kia Jesuisi-ò rarybere: —Kia hewa brebuna rare aõma sabadotxu riwinymyhỹre: —Aõherekibo aerydỹna mahãdu iu riwinyrereri.

<sup>3</sup> Tahe Jesuisi tamy rỹraxire aõma iyyymy iko-reny relyyre iwese Davi riwinyre wesemy heka riwinyrereri ramy rahureu.

<sup>4</sup> Davi riki heka ralòre Deuxu dohodỹna hetowo-ò heka ralore. Tai tahe rirỹsỹmyhỹ kia aõma xiwena-ki heka riymy. Kia orotxu heka aõma xiwena-ò hidỹna mahãduòle rỹimy. Tahe

ihãrele heka riyrenyre heka. Taijoi mahãdu-ò ri-wahinyre.

<sup>5</sup> Kia wesemy aõma tariakõte bedede ywina tyyriti-ki wahe. Aõma xiwena wahidỹỹdu heka rityynyõhyymyhỹre. Aõma sabadotxu kia wahisidỹỹna. Xiwena bedede ywina wahe. Iu dohodỹỹna hetowo-ki ratximyhỹu. Tii heka sabadotxu bedede ywina rityhynyõhyymyhỹre. Tahe heka aõbina bina riwinyrenyõhyymyhỹre. Kia tahe heka tule heka bedede ywina tyyriti heka ritidỹỹna roire. Idi tariatenyõte.

<sup>6</sup> Inatyhymy heka adee ararybekre. Inyõ kaki ratxikeki jiarỹ heka kaki heka inyõ ratximyhỹre aõma dohodỹỹnahakỹ heto-ki wahe. Dohodỹỹdu mahãdu ratyre heka watximahãre jiarỹ wahe.

<sup>7</sup> Kiamy heka ritidỹỹna rỹimyhỹre. Jiarỹ heka xiwena luure ihãre tahe sõwemy heka iratyre ruxetõena luure. Jiarỹ aõma xiwena luure ihãre tahe iratyre heka aõma ruxetõena luure sỹ. Kaiboho terytenyte wana. Aõma heka ibinamy tarybehyynehỹte inyõ teõsamy ratxikeò. Aõma aõ riwinyrenykõhyre. Kiamy wahe.

<sup>8</sup> Jiarỹ dori Deuxu Riòre Hãbu watximyhỹre. Jiarỹ tule aõma sabadotxu wedu wãhãre.

<sup>9</sup> Tai tahe Jesuisi nade heka ixyby aõma tohodỹỹnareny heto-ò. Ralòre heka sabadotxu.

<sup>10</sup> Hãbuõ ratximyhỹre debò binare. Debò rayjayja ihỹmyhỹre. Tahe fariseu mahãdu heka Jesuisi-di mynamy ratximyhỹre. Aõ rybebinamy rarybeke òraru-ki rimykemý. Tai tahe rỹỹraxire Jesuisi-ò: –Timyrebohe brebuna aõbo sabadotxu deytedyỹ ada aõkõre aõbo.

11 Tai ta Jesuisi rirariwònyre: –Kaweselemy rōkōhōtinyrenyke. Kai heka aōmy abudoeni sohojilere. Sabadotxu heka reseke hālooro-txi aribi. Timybo mohōtinyke aōma bitake hālooro-ribi. Inatyhyre aōbo. Sabadotxu hārele bitake. Kohe, inatyhyra.

12 Hābu heka budoeni ratyre heka iòwy rare. Aōma sabadotxu aōwaxinyre heka reyteke.

13 Tai hābu-ò rarybere Jesuisi: –Ebò biditytyke. Debò ritytyra ta wiwesele debò relere awimy.

14 Fariseu mahādu heka wii ributunyre, iribi rōhòrenyreu wahe. Widee raryberenyre: –Aōma timybo rikisỹnyrenykre rikimyrenykre rikirubun-nyrenykre.

15 Tahe Jesuisi rierymyhỹ kiamy rary-bermyhỹreny heka roholamyhỹ. Tahe Jesuisi rierymy heka. Iribi irehemy ratximyhỹreny hārele, rierymy heka. Iribi tahe rexitare heka hāwā-ribi wahe. Idi heka ihemy heka rare riheludunyre. Sōwemy heka webinadu ihemy rare. Ibutumy riteytenyre.

16 Teyteydỹna mahādu-ò rarybere: –Uritere itỹnydỹỹōmykremy tuu ijyyōmykremy inyko-ò.

17 Ihexiu Isaia tyryiti-ki heka kawesemy rỹimyhỹre. Tii heka Deuxu rybeduō rare.

18 –Kaheka Wadeòdu rare. Tuure heka jiarỹ, tii heka retare. Rehixinyre. Tii heka deysana wadee riwahinymyhỹre Tatyty-bytyhy tamy ariwahinykre. Ywisidỹna txuu heka ibutuko-ò relyykre.

19 Tii heka ryryōtyhy rebureōtyhy heka inyō-wana widee. Tiu heka inyō roholaōtyhy irybe dee.

Ryki heka inyõ irybe-ò roholaõtyhy.

<sup>20</sup> Aõma bòtòreõ irybòhòmý roikeki. Tii raòròõtyhy. Txuheòtyjurà loosòna urihimýòkeki heka tiu ruriõtyhy eleti-di. Tii ritakre iaõbinana, inatyhynaõ binana wahe.

<sup>21</sup> Ibutumy heka iraròsòna iribi ritakre.

<sup>22</sup> Hãbu rybeõ ruetàõ heka iny didydenyde Jesusi-ò wahe ralòmýhÿreki wahe. Tii tyytybybina iwo-ò ralòmýhÿreki wahe. Jesusi tyytybybina riteònyre. Tai irue heka awimy relere rarybere.

<sup>23</sup> Ibutu iny sòwe heka heka ribedeòtiidÿnyre. Widee tahe raryberenyre: –Ka heka Davi riore riòre òsana rare, Deuxu deòdÿna wahe.

<sup>24</sup> Tahe fariseu mahãdu-ò roholare. Tahe rarybere Jesusimý: –Tii inatyhymy tyytybybina riteònymýhÿre inywo-ribi. Aõma tyytybybina wedu ruru-di heka riteònymýhÿre. Belisibu ruru-di wahe.

<sup>25</sup> Jesusi heka rieryre iraykyreny. Tai tahe tamy rarybere: –Ijyymy heka tamy rarybere. Iòlòna mahãdu wiribi ibutumy rexihitxinykeki tahe rexihukre ibutumy wiribireny. Tahe hãwã mahãdu taijoiy-ribi rexihitxinykeki, awi aõkõ rare tai wahe.

<sup>26</sup> Wiribi rexihitxinyke wana. Tule awi aõkõ rare tai wahe. Aõma Satanasi rexideònykeki tahe tayreny-ribi rexitake.

<sup>27</sup> Belisibu ruru-di tyytybybina ariteònyke wana aõdibohe aheludu mahãdu riteònykemy ratximýhÿre. Tiiboho heka aywisidÿÿdurenymy ratximýhÿre.

28 Jiarỹ Tyytybytyhy ruru-di ariteònykeki heka kaiboho arurunareny Deuxu-ribi nade. Iòlòna adeereny rehemynyleri.

29 Inyõ heka hãbu rurutere hetowo-txi ralòõtyhy wasimy wahe. Tai rawasinomy ratximyhỹkeki tahe urile juhoo hãbu ritaataake. Idi tahe iheto-ribi aõdibo rawasinyke.

30 Inyõ wabiòwamy aõkõ ihỹre wana heka, waòludu rare. Inyõ wawana ibutomy ratxiõmyhỹre wana tahe raybàtàmỹhỹre.

31 Inatyhymy jiarỹ adee anarybekre. Ibutu òraruna kanaixãwididỹke. Hãbu aõtxile aõbina bina rarybemyhỹre. Sohojile taruxãwidỹõtyhy. Aõtxile inyõ aõbina binamy Deuxu Tyytybytyhy rarybekeki. Tii aòraru rataõtyhy. Kia heka òraruna tiiehymy rarekemy ihỹre.

32 Hãbutyhyhykỹ heka Deuxu riòremy aõbina binamy iny rarybekeki, wamy wahe, tii tahe ixãwidina dire. Deuxu Tyytybytyhyhymy rarybekeki, tii tahe iixãwidinyõhyre. Tiehyy kia òraruna-di rareke.

33 Jesuisi rawesenanyre iny òwòru wese rare. Òwòru awimy rỹike wana, tai heka iratywihikỹõ-ki iny rahake. Ruru rasunymyhỹre raruburerimy ihỹre. Kia tasỹ iratywimy aõkõ rỹike ibinamy. Aõma òwòru iny rierymyhỹre aõbo iribi iraty dejuxunymyhỹde òraru-ki iny rierymyhỹre, awire.

34-35 Kaiboho heka hemylala mahãdu wesemy atximyhỹtenyte. Kaiboho heka abinatyhymy ahãtenyte. Timybo heka kaiboho aõwihikỹmy marybebentyke. Arayky aõbina bina hakỹlemy tõhõtinyteri wana. Tai taheka ary tuu ròhònyke ary tuu rarybeke. Aõma hãbu wihikỹõ

ratxiremyhÿre wana aõnana wiwihikÿle tarayky-ki riyrubunymyÿre. Tii heka rarybemyhÿre. Hãbu bina tahe tarayky-ribi ibinalemy rarybemyhÿre.

<sup>36</sup> Ibutumy aõmybo iny rarybemyhÿre heka ywisidÿÿna txu tuu rarybemyhÿre rierymy timyk-ibo tuu rarybere wahe.

<sup>37</sup> Òrarukibo rarybere: —Arybe òraru-ki heka ywisidÿÿna-ki atxiteri. Bitakemy aõbo ada aõkõre aõbo.

<sup>38</sup> Bedeerydÿÿdu mahãdumy heka fariseu mahãduõ tamy rarybereri: —Erydÿÿdu, wadeereny biteõsinyke awiwihikÿõ.

<sup>39</sup> Jesuisi dirawyõnyde: —Iny kamahãdu heka ibi-natyhy rare aõ awiwihikÿ rexitõenymyÿre. Abina binale wahe. Aõ wihikÿle bobiõtyhy. Tahe sohoji aõwihikÿõmy heka mohõtinyke. Jonasi widÿÿna wahe.

<sup>40</sup> Jonasi Deuxu rybeduõ widÿÿna wahe. Tii inataõ txu inataõ rummy uturahakÿ wona-ki ihÿmyhÿwesemy. Iwese Deuxu Riõre Hãbutyhyhykÿ bede-ki rarekremyÿ wesemy inataõ txummy inataõ rummy.

<sup>41</sup> Ninive hãwã mahãdu heka roholarenytxi tõhõtireny reare. Iu Jonasi rybe ritÿnydÿÿreu wahe. Tahe inyõ kaiboho tamy taholatenyte. Sõwemy heka iny Jonasi ratyremy ihÿre. Ihÿrele kaiboho ixitxireny õhõtireny reaõre. Ninive tamahãdu tahe ibinany adeereny rarybekre. Ywisidÿÿnatxu wahe.

<sup>42</sup> Iolò Hãwyyõ heka ibòò irehe-ribi nade. Aõma Salomaõ bede erydÿÿna-ò roholakemy. Kaiboho heka inyõ-ò taholatenyte. Salomaõ ratyre heka sõwe inihikÿ ihÿre. Ihãrele ta ixitxi nohõtireny

reaõre. Ywisidỹnatxu heka Iòlò hãwyy ibinanamy kỹnarybekre umyreny wahe. Ywisidỹnatxu.

<sup>43</sup> Aõma tyytybybina hãbu-ribi rõhõnykreu tahe elehyydỹna riijekre. Aõma bedebinana tõehekỹ tahe tuu reakre. Ihỹre tahe tai rahaõhykre elehyna-ki wahe.

<sup>44</sup> Tai tahe ixidee rybekre: –Aròsekre kỹhe. Iribi ranywỹhỹreò anakre. Tai tahe kia hãbu-ki rahara. Tyyrahakỹmy iwo-ki iruxeramy.

<sup>45</sup> Tai tahe ijõ-txi reare. Debò inatxi reurò tyytybybina-txi iratyre tyhy wahe ibinare. Tai tahe ridyke tahãbu-ki rasỹnyrenykemy. Kia hãbu heka iwese juhu raremyhỹre ratyre ibinamy ratximyhỹre. Kaiboho heka kia tyytybybina wese atximyhỹtenyte.

<sup>46</sup> Jesuisi tahe ijõ-ò rarybere ijõ ijoi-ò, tai tahe ise rehemynyre, iseriòreboho-wana. Sõwemy iny mahãdu-ò heka rarybere.

<sup>47</sup> Inyõ tamy rarybere: –Inyõ heka arãijereri adi ahelỹna. Kie heka rehemynyreri adee rarybekemy adi ratxireri.

<sup>48</sup> Jesuisi dirawyònyde: –Mota heka nadireri, mota heka waseriòrereri?

<sup>49</sup> Tai tahe tebòhe riteòsiriteòsinyre taerydỹna mahãdu-ò. Ka heka nadi rare. Ka heka waseriòrere. Ka ijõ heka waseriòre.

<sup>50</sup> Wahadeewi riwinymyhỹreki tahe, tii heka nadi rare. Waseriòre rare. Waha dori biu-ki ratximyhỹre.

## 13

<sup>1</sup> Itxu taheka Jesuisi rare heto-ribi Kalileia aho ijà-ò. Tahe tai ronyre. Tahe rexiterenyre Jesuisi

iny ribedeerynomy.

<sup>2</sup> Tai ibututyhymy heka iny wirotyre. Tai tahe Jesuisi rexitareny urihimyò hãworo-ò ronony rexitaranyre. Iny sôwehekỹ mahãdu tahe aho ijàkile heka roholamy rỹimyhỹre.

<sup>3</sup> Tii heka relyymyhỹre aõma ijyyõ relyyre: —Aõna aõna wese ijyy rawesenanyre. Hãbu alòbòròmý rara. Tii heka alòbòròna dehuu rare.

<sup>4</sup> Ijõ heka idi rehumyhỹu heka ijõ ryro-txi resere. Nawii heka riròmýhỹre riore heka.

<sup>5-6</sup> Ijõ tahe rejuxunyre aõma manarutysu-txi. Tii tahe raumynyre aõwesele. Iraruxiõlemy heka rỹimyhỹ suu ibutureki. Idi bedetòtee rimoedỹnyre. Idi tahe rurure.

<sup>7</sup> Òwòrudỹ resere edey-txi. Idi ta ruhunyre edewanale. Idi tahe ede riòdesedỹnyre. Tai heka raratynyõlemyhỹre.

<sup>8</sup> Ijõ tahe resere suwitxirawihikỹ-txi. Tai tahe sõwemy raratynyre. Sohoji òwòruty-ribi tahe 30my raratynyre iraty wahe. Ijõ 60my raratynyre iribi. Ijõ ta 100my raratynyre.

<sup>9</sup> Tahe Jesuisi heka rarybere: —Kia bohولاتy-hymy bonyke. Òhõtirenýdikeki bohólabenyke.

<sup>10</sup> Tai tahe ierydỹna mahãdu Jesuisi rityỹraxinyre: —Aõherekibo kai ijyy-di bierynanykemy atxiteri, rawesenanyreri wahe.

<sup>11</sup> Tai tahe dirawyònyde: —Kaiboho aõmybo Deuxu reerynanyre kaiboho bierybenyke. Ijõ mahãdu tiu ijyy rieryõtyhy. Kaiboho dori Deuxu Òlòna teerytenyete.

<sup>12</sup> Hãbuõ iaõdikeki ijõ heka iratyre tamy ariwahinyke. Tai tahe sõwemy tamy rauhenyke. Tahe



hãbu ihoõkeki ibutelemy ijõdikeki heka kiale iribi ibutumy aritakre.

<sup>13</sup> Retehe my ihãre tahe robiõhyymyhỹrenyre tahe ririõhyymyhỹre. Tai heka ijyy-di reerynanymy watxireri.

<sup>14</sup> Iwese Isaia tyyriti-ki roire wese heka tiiboho ihỹrenyre:

—Roholamyhỹre, roholamyhỹre ihãre tahe rieryõhyymyhỹre. Retehe my ihãre tahe tiu robiõhykymyhỹre.

<sup>15</sup> —Irayky tererenyreki wahe rieryõre heka. Õhõtireny heka ritòbònymyhỹre ta ijohonana-ribi. Tarue ribrenymyhỹre robike lau. Tahe wadee ròõseõtyhy. Aõkõre heka ariteytenykemy idi watximyhỹre. Tibo heka terareny aõkõre.

<sup>16</sup> Jesuisi ijõ relyymyhỹre tamyreny: —Kaiboho heka eysamy atxitenyteri. Kaiboho heka bobibenyke tahe bierybenyke. Aõmybo kaiboho tabitenyteri heka, taholatenyteri wahe.

<sup>17</sup> Ihetxiu mahãdu, hỹỹna mahãdu wahe, tuu lobiximy riwisỹnymyhỹre. Aõma aõwobo kaiboho taholamyhỹtenyteò heka roholakemy riwisỹnymyhỹre tahe roholaõhyymyhỹre.

<sup>18</sup> Tahe boholake heka adee aritỹnynyke aõbo ijyy rare.

<sup>19</sup> Õwòrutu ryro-txi resemyhỹre heka iny ijoireny wesemy ihỹre. Ijohona tuuwesemy wahe. Tibo roholamyreny ihỹre tahe rieryõhyymyrenyre. Aõma Satanasi heka nade tai tahe warybe heka iribireny ritamyhỹre.

<sup>20</sup> Ijõ manarutysu-txi resemyhỹ mahãdu tahe ijõ ijohonadu wesemy heka roire. Tiiboho heka

deysana-di roholamyhỹrenyre.

21-22 Tai tahe urihimyòle rityhynymyhỹrenyre aõhõkỹmy dỹỹnana kanakeu tahe aõwesele riatyke ririmy reake. Kia edey-txi resera tasỹ aõma ijõ ijohonadu mahãdu wesemy heka rare. Tiiboho heka aõma 1000 nierule aõnityhymy idi rõhõtinyinmyhỹrenyre nierudile. Tai tahe rexibedewonymyhỹrenyre. Tiu heka Deuxu aõmydỹỹna riwinyõhyymyhỹre, Deuxu Rybe riwiõhenanyrenyre.

23 Kia suwitxira wihikỹ-txi resera wana tahe iwitxira ijohonadu mahãdu wesemy heka rare. Tiiboho heka roholamyhỹrenyre rityhynymyhỹre sõwemy Deuxu dee roholamyhỹreny heka. Ijõ 100my wesemy raratynyre. Ijõ 60my raratynyre ijõ 30my raratynyre. Iny sohoji sohojiõ heka Deuxu-ò aõ riwinyrerimy ihỹre.

24 Idi tahe iwitxira ijyymy relyyre Jesuisi tamyreny: —Deuxu Iòlõna heka kia wesemy ihỹre. Oworudu heka aõma alòbòròna wihikỹõ ritòbrònymyhỹre taoworuro-ò.

25-28 Tahe iòluduõ rummy heka tamy nade. Tahe iu ibutumy iny rõrõmyhỹreu, asibinaty-di tamy rehure. Tai tahe alòbòròna asibina-wana ruhunyre kia aõma ede wana wimy urilemy. Taiki tahe kia aõma oworudu kia aõmysỹdỹỹdu mahãdu. Tuu heka ijyy-di nade tuu ijyymy. Idinodu rarybere: —Aõma waòludu heka kia riwinyre wadee. Idi oworudu narybede: —Aõhebohe arotỹỹnyrenykre? Ta idile aõbohe arisiherenykre araxirenyre. Tai tahe rirawyònyre:

29-30 —Aõkõre wahe, kia ibutumy alòbòròna

rirarutxinykre. Ixinamy heka ratybiennykre tii-wana wiurilemy kia maixõmo arixina bededỹĩnamy bede relerekeu tahe iribi raarike. Ararybekre heka tamy kia aõma oworu-di raaõmysỹdỹĩkreò. Juhu delemy asi arisykre. Tahe ritoonykre. Idi tahe maixõmo heka riarikre kia maixõmo hetowo-ò riyrubunykre.

<sup>31</sup> Tahe Jesuisi ijõ ijyy witxiramy relyymyhỹre: —Aõma Deuxu Iòlõna heka aõma alòbòrõna sõmo sõmo wesemy ratximyhỹre.

<sup>32</sup> Aõma raumynyreeri heka aõma òwòru iyjatyhymy ibutumy òwòruty-ribi rariwesele relemyhỹre.

Taiki tahe kia nawiile tuu rỹtỹnymyhỹre kia òwòru-ò.

<sup>33</sup> Uri paõ uri ixiòlòdỹĩna heka Deuxu Iòlõna wesemy heka kia ihỹre. Hãwyy heka paõ riwinymyhỹreu, riurinymyhỹreu tahe ibutumy raubỹtỹmyhỹre kia ibemy.

<sup>34</sup> Tai tahe rexiòlònymyhỹre Jesuisi heka sõwemy tuu relyymy raremyhỹ. Iu iny ribedeernymy raremyhỹu. Tiiemy heka Jesuisi relyyhyy raremyhỹ iu ròbedeerydỹĩmy raremyhỹu.

<sup>35</sup> Deuxu rybedu dori ihetxiu rarybere: —Jiarỹ ijyy-di rebedeernymyhỹre. Aõma tuu relyymyhỹre heka ierykõna rare. Tiuhe rieryõhyymyhỹre. Iu bede rexideelenyrauhyyle.

<sup>36</sup> Idi tahe Jesuisi rexitare iny sõwey-ribi rexitare. Hetoõ-ò heka ralore. Tai tahe aõmybohe wakoreny inihe bedelyyke. Aòludu inybo arasỹnyremy. Kia ijyy heka aõma hãbu ede-di

rehure ioworu-ò, taòludu oworu-ò. Kia inihe wadee bitỹnynye aõbo rare wahe. Kia ijyy telyyté.

<sup>37</sup> Tai tahe Jesuisi tii dirawyònyde: –Kia hãbu alòbòròna wihikỹ ribòrònyre heka Deuxu Riòre Hãbutyhyhykỹ, rare wahe.

<sup>38-39</sup> Ioworu heka ibutu bede heka roimyhỹ wesemy roimyhỹre. Aõma alòbòròna wihikỹre heka ityhydỹỹdu iwese rỹirawesemy rỹira. Asi tahe kia ityhydỹỹdukõdu mahãdu wesemy heka ihỹre. Aõma kia iòludumy rarybereri tahe kia Satanasile heka ihỹre. Kia iyresynamy rarybereri aõbo bedekonana heka tuu rininimy heka tuu rarybereri. Kia ýju heka iyresydumyhỹ tuu rarybereri. Kia rimykre ede riorokremy rarybereri heka aõma ityhydỹỹdukõdu mahãdu heka tuu rininimy rarybereri.

<sup>40</sup> Ritakre heka rihitxinykre. Heòty bedehékỹ heka idi rehukre risõkre iu wahe. Iwesele taheka bedekonana heka rarakre.

<sup>41</sup> Deuxu Riòre, Hãbutyhyhykỹ heka aõma ýju riteònykre ibutu iny ributunykremy.

Ityhydỹỹdukõdu mahãdu ijõ iny òraruna-txi rityhedỹỹdu mahãdu heka ibutumy ributunykre widee. Ibutumy aõbina bina widỹỹdu wahe.

<sup>42</sup> Idi tii rihukre. Tai tahe ryrykre aõkỹmy rotỹỹnykre tai. Robumyhỹre taju.

<sup>43</sup> Kiau aõma

Deuxu hõrõ mahãdu tahe Waha Iòlòmỹ rononymyhỹre kie ronykre. Tiibohe loosòny wesemy heka ritoosònanykre txuu loosòna wesemy.

Õhõtirenidyekiki ibutumy heka boholabenyke.

<sup>44</sup> Deuxu Iòlòna tahe nieru wesemy ratximyhÿre. Aõma nieru heka hynaõ-ki rahara nieru-di tÿximy aõma surawo-ki idi hãbu ixyby riwore. Tai tahe tii reysatyhymy ròsere. Kia ibutumy taaõmydÿÿna-di heka rohonyre. Kia bedero riwykremy.

<sup>45-46</sup> Ijõ tahe tule Deuxu Iòlòna wesemy ka ratximyhÿre. Iwese ixiura wydydu ihÿre wesemy heka Deuxu Iòlòna ihÿre. Iwydydu heka iijese iijesemy riwumyhÿre. Aõwi riererimy riererimy heka tai rahamyhÿre iruxera-ki tii tahe riwumyhÿre. Kiau tahe tai rahare aõ òwyhykÿõ-ki heka rahare. Tii idi tahe rohonyre ibutumy taaõmydÿÿna-di idi tahe kia iwydymy idi ratxireriò riwyre.

<sup>47</sup> Riàõ wese heka tule Deuxu òlòna ihÿre. Aõma rià-di iny rehumyhÿre wana heka ibutumy utura rimymyhÿre.

<sup>48</sup> Kia aõma idi tahe idi raixÿnymyhÿre riarimyhÿre iky-ribi. Aõma awi-di awihe riarirerimy iky-ribi. Ibinare rihitxinymy iribi.

<sup>49</sup> Kia bedekonau tahe iweselemy heka rarekre. Kia aõma ÿju heka riarikre awi heka ibinau-ribi riarikre.

<sup>50</sup> Rehukre heòty bedebinakÿ-ò wahe. Tai ki tahe rirajuamyhÿkre ta aõhòkÿmy rotÿÿnymyhÿkre. Txuu rikyinyamyhÿkre

<sup>51</sup> Tahe Jesuisi tamy rÿÿraxire: –Kiamy ibutumy teerymyhÿtenyte? Tiiboho riraòwònyrenyre: –Kohe, reerymyhÿrenyre.

<sup>52</sup> Idi Jesuisi rarybere: –Inyõ bede ywina bedeerydÿÿna heka rityhynyreu, waheludu rarekreu wahe. Tii tahe iwese hãbu butudÿÿdumy ratximyhÿre wese heka ronumyhÿre. Tii heka

ibutudỹna heto-ribi ritamyhỹre, tasỹ mahãdu-ò riwahinykemy. Aõ tyby aõ tỹmyra. Ibutumy heka ritamyhỹre.

<sup>53</sup> Tahe iribi Jesuisi rexitareu,

<sup>54</sup> tahe tahãwã-ò ròðsere. Judeu dohodỹna heto-ki ribedeerynyre. Tahe ibutumy ribedeòtiidỹnyre. Tiribibo heka tii bedeeryna rierymyhỹre: –Timyrekibohe aõwiwihikỹ rierymyhỹre. Tii kỹny heka aõma òwòru besedỹwidỹdu riòre heka rare.

<sup>55</sup> Jyje riòre wahe. Marie heka tule rare ise wahe. Txiau, Simaõ, Jyje, Judasi-wana iseriòre ihỹre tule wahe inatyhy?

<sup>56</sup> –Iseriòre hãwyy heka tule kaki rasỹnymyhỹre inatyhy. Timyrakibohe aõna aõna ikòkò rierymyhỹre.

<sup>57</sup> Tahe rityhynyõhyymyhỹre heka tai wahe. Jesuisi tamyreny rarybere: –Deuxu Riòre Hãbutyhyhykỹ heka tiu tauludu wijirana hãwã-ki inyõ rityhynyõtyhy rybeduõ ihetomy ijirana-ki.

<sup>58</sup> Tai tahe aõna aõna wiwihikỹ heka tai riwinyõhyre, rityhynyõmyhỹreki.

## 14

<sup>1</sup> Kia bedeu tahe Herodi, Kalileia iòlò, Jesusini-ò roholare. Aõikòkò heka riwinymyhỹre.

<sup>2</sup> My heka rarybere teòdu mahãdu-ò: –Kia Joaõ Sebedỹdule aõbohe rubu-ribi riixixadỹnyre. Tai tahe tii aõikòkò riwinymyhỹre.

<sup>3</sup> Herodi tahe juhoo Joaõ ròtenawo-ki riteònyre. Tii taseriòre hãwyy òraru-ki kia wesemy riwinyre, Herodia òraru-ki wahe. Herodia heka Filipi hãwyy rare.

4 Juhuu Joaõ Herodi-ò rarybere: –Awi aõkõ rare. Kai dori aseriòre hãwyy-wana atxiteri. Uritere heriõmyke.

5 Tai tahe Herodi heka Joaõ rubudỹmy riwisỹnyre. Urile ruberumy judeu mahãdu lau. Tamyreny Deuxu rybeduõmy rỹiramy Joaõ Sebedỹdu rare.

6 Herodi kai beòramy bede reareu tahe worana bedehesi ritxienyreny. Herodia riòre ijadõma heka iko-ò resemyhỹre. Iixe-ki tahe awimy Herodi rahare, Ijadõma luure wahe.

7 Tii tahe tamy rarybere kanakemy. Aõmybo wadee bexitòenykre. Inatyhymy adee ibutumy ariwahinykre.

8 Tai ise ijadõma-ò rarybere: –Aõma bexitòenykre: Sebedỹkỹdu ratilemy tamy bexitòenykre. Tai tahe ijadõma tamy rexitòenyre: –Wadeke bidiwyke Joaõ Sebedỹkỹdu rati, pratoro-ki.

9 Tai tahe iòlòhe rabadewore. Ibutu ijohonaru-ò dori tuu rarybere ijadõma-ò. Tahe ibutumy riwinyke rỹire.

10 Tahe ihãrele iòlò heka soldadoõ riteònyre ròtenawo-ò kia Joaõ rati resymy.

11 Inyõ diwyde pratoro-ki. Ijadõma-ò heka riwahinyre. Tahe tii tadi-ò idi rare. Riwahinyre.

12 Idi tahe Joaõ erydỹna mahãdu dioryde iumy, riwykremy, rituunykremy. Iribi tahe roirenyre Jesusiko relyre.

13 Kia roholareu tahe Jesuisi ròhònyre ixisohojilemy bederahu-txi. Hãwò-di rexitaranyre rare. Iny sõwemy bede-di ròirenyre ihemy titxibo iru-ki

rakemy.

14 Rehemynyreu tahe iny sōwehekỹmy Jesuisi robire. Tai tahe Jesuisi riwotønyre. Ibutumy riteytenyre webinadu mahādu.

15 Tahe ratxioronyre. Tahe ierydỹyna mahādu tamy nade. Tamy rarybere: —Txuu ratxioronyra. Bederahy-ki dori atxiteri. Iny tahe biteònykre hāwāō-ò tai rỹsỹna ixidee riwykemy.

16 Tahe Jesuisi rirawyònyre: —Aōkōre, ariteònyòtyhy jiarỹ. Kaibohole tahe aō tamy bidiwahinybedenyke.

17 Jiarỹboho kỹny diwatxiðnyreri iruyre orotxu-di, utura inatxire.

18 Tai tahe Jesuisi narybede: —Bidiwahiny wadee.

19 Jesuisi tahe ibutumy iny asityre-ki ronykemy risỹnyre. Orotxu inaubiòwa, utura inatxi rỹire, utura-wana rimyre tahe ritehere biu-txi àlàna Deuxu-ò riwahinyre. Idi tahe paō riyreyrenymyhỹre teòdu mahādu-ò riwahinyre. Idi rare iny sōwehekỹ-ò.

20 Ibutumy iny riroxirenyre ihāre rihydyre. Kia iuhe-di ierydỹyna mahādu 12 weriri ritỹxinyre.

21 Hābumy 5000 òsana rỹimyhỹre. Ihāre tahe uladu-di rariaòhyre hāwyyboho-di.

22 Tahe Jesuisi taerydỹyna mahādu riteònyre aho kanawe-ribi ijā-ò reuròrenykemy hāwò-di. Jesuisi tahe rarire iny sōwehekỹ mahādu rirybedỹỹmy.

23 Jesuisi heka iny tahetoreny-ò riteònyremy rahudi tahe tii raòwònyre hāwālò ratyy-ò ixitòedỹỹmy. Taihyyle idi bede roronyre ixi sohojihyyle.



24 Kiaule hãwò ahotya-ki rare. Òbò nihikỹy-txi ixinalemy ratximyhỹre. Tiò tiò òbò riwelòrò riwelòròmý idi rehumyhỹ. Yhy deade txura-ribi.

25 Rudile tahe Jesuisi biura-di heka rare taery-dỹỹna mahãdu-ò, beratyredile heka rare.

26 Iu Jesusile betyredile tamy rarau tahe, ti-iboho heka ruberurenyre. Rirajuarenyre: – Worỹsỹ òsana inydee rareri.

27 Tai tahe Jesuisi rarybere: –Aworeny bita-madỹỹnybenyke. Jiarỹle watxireri.

28 Tahe Pedro rarybere: –Wanyrỹ, inatyhymy kai atxiteriwana heka wadee manyarybeke betyre-ki arariakemy.

29 Tahe Jesuisi tamy rarybere: –Manake wahe. Aõwesele tahe Pedro hãwò-ribi ròhònymy reare, Jesuisi-ò rakemy. Betyre-ki rariare.

30 Yhylemy tahe robure. Tii urile ruberure. Tai ijirahakỹlemy riwisỹnyra berahatxi-ò. Tai tahe Pedro rarybere: –Biwatakewa Wanyrỹ.

31 Tahe Jesuisi rimyre: –Ainatyhynakỹny ibutelemy atxiteri. Aõherekibo heka tiwatyhynyõteri.

32 Idi hãworo-ò wiwana rorukurenyre. Yhy ruhure.

33 Ierydỹỹna mahãdu Jesusimy reàlàre. Inatyhymy heka kai Deuxu Riòretyhy tate.

34 Tai tahe reuròrenyre Kenesare bedè-ò.

35 Ibutumy iny kowa Jesuisi rieryrenyre. Ti ibutumy webinadu mahãdu-ò relyyrenyre Jesusimy. Tahe hãwã ikòkò-ribi ritelenymy didydenyde.

36 Tahe Jesuisi-ò rarybere. Ixinamy watyky-ò rerike, awimy relerenykemy. Ibutumy tamy

rerire heka reytere.

## 15

<sup>1</sup> Jerusalē hāwā-ribi bede ywina bede erydỹna mahāduō dehemynyde Jesuisi-wana rarybekemy. Tiiboho-wana tule fariseu mahāduō dehemynyde. Tiiboho heka Jesuisi-ò rỹraxyrenyre:

<sup>2</sup> —Aōherekibo aerydỹna mahādu tebòreny risuhòkòreri roxiko-ki. Inydeereny kia bede ywina rare. Aōherekibo rityhynyōreri ihetxiu lahi rybe.

<sup>3</sup> Jesuisi rirawyònyre yỹraxina-di: —Aōherekibo kaiboho Deuxu rybe tetyhynyōteri kaiboho lahiry-bele tetyhynytenyte.

<sup>4</sup> Deuxu bede ywina kawesemy rarybere:  
—Boo adi-wana ibutumy heka bityhynybenyke. Inyō rybebina tadi-ò tyby-ò rarybekeki. Tii tahe ruruke, tuu bede ywina rybe wahe.

<sup>5</sup> Kaiboho tahe kawesemy tebedeerynytemy tewitxiranyte: Inyō tadimy tybymy rarybekeki Wanieru Deuxu-ò wahisidỹnamy.

<sup>6</sup> Tai tahe inieru-ei tyby tadi-wana riwiòhenanyōre kia bede ywina witxira tewinymahāte. Deuxu bede ywina rityhynyōreki.

<sup>7</sup> Kaiboho itxerenadu mahādu atxitenyteri. Isaia inatyhymy umy rarybereu:

<sup>8</sup> —Kia mahādu wadee rybe-di ri-wadeàlananyrenyre. Wowydyna wadee riwahinymyhỹrenyre. Inatyhymy aōkō heka kai tarybemahāte. Arayky dori Deuxu-ribi irehemy ratximyhỹre. Teertyhyōlemy heka atximahāte.

9 Iwowydyna heka wadee aõ aõkõ rare.  
 Wabede ywina ribedeerynyõtyhy.  
 Texibedeerynymahãtenyte abede  
 ywinarenydile.

10 Jesuísí rexidelenymy ribedeerynyre: —  
 Boholabeny warybe-ò.

11 Brebuna roxina-di biroxibenykeki, aõ adeeremy  
 ibinaõtyhy aõ aryrenymy ralòmhyhÿre aõkõ heka  
 ibinare. Ryribi ròhòmhyhÿre heka ibinare, arybe  
 wahe.

12 Tai tahe Jesuisi erydÿÿna mahãdu Jesusiko rary-  
 bere: —Fariseu mahãdu kÿny tamy awiõre kia wiji  
 tuu tarybeta wahe.

13 Tahe Jesuisi rarybere: —Aõhere aõkõ rare.  
 Timyre aõkõ rare. Ixinamy tuu raryberenyre.  
 Iorutere-di nohõtirenyõmy. Kia fariseu bedeeryna  
 lòbòròna wese rare. Waha ribòrònyõre. Ibutumy  
 waha ribòrònyõre suribi mahãdu ritakre.

14 Inatxi hãbu ruetà widee ryò ritÿnynymhyhÿre  
 wese. Hãwãry-ribi wiwanale hãloo-txi resekre.  
 Tiiboho ixinamy biribenyke.

15 Tahe Pedro Jesuisi-ò rÿÿraxire: —Wakoreny in-  
 ihe biditynynyke, roxina brebuna ijyy wahe.

16 Kaiboho ibutu wese atxitenyteri. Teeryõtenyte.

17 Ibutumy iny aõ rirÿsÿmyhÿre weryri-di  
 ramyhÿre tahe ròhònymhyhÿre.

18 Tahe inyõ rybebinamy rarybemyhÿre. Tii iwo  
 ibinare, irayky ibutumy ibinare tai wahe.

19 Raykywydyna binahakÿ-ribi heka òtaõtana,  
 rubuna, wasina, ruina ujõmo inyry-ribi  
 ròhònymhyhÿre.

20 Kia aõmydÿÿnana iny risurisumyhyhÿre, inydee  
 ibinare. Tahe roxinako-ki iny tebò risuhòmhyhÿré,

kia tahe aõ aõkõ rare, ibina aõkõ rare.

<sup>21</sup> Iribi tahe kia-ribi ròhònyreu tahe Jesuisi rare irehetytymy Tiro hãwã-ò Sidõ hãwã-ò.

<sup>22</sup> Kana bedede hãwyyõ tamy nade. Tahe tamy rexitòenyre: –Wahĩ, Davi riòkòre, biwaruxetoènyke hewa. Waritxòre heka tykytyby bina-di iwoku-ki ratximyhỹre. Anohõkỹmy heka idi rotỹkỹnymyhỹre.

<sup>23</sup> Tahe Jesuisi aõmy rarybeõhyyre tamy. Taerydỹyna mahãdu tahe rarybere: –Biteònyke hewa. Inyboho dori riixiranyrenyteri.

<sup>24</sup> Jesuisi tahe rarybere: –Jiarỹ Deuxu riwateònyre judeu mahãduòle, tabudoeni mahãdu iõre mahãdu wese wahe.

<sup>25</sup> Hãwyy ixityre nade. Tatiowotimy resere. TAhe ixityre tamy rarybere: –Biwawikòhenanyke hewa, Wahĩ.

<sup>26</sup> Jesuisi rirawyònyre: –Awiòhedỹyna kia wese rare aõma hãbuõ tariòre-ribi rỹsỹna riwyrã tahe idi rehura ijòròsaòle. Kiawese rarekre, jiarỹ arawiòhenanykeki.

<sup>27</sup> Hãwyy rarybere: –Inatyhy rare. Kuladu-ribi ano rỹsỹna resemyhỹre bedede-txi, tiki tahe itxòròsa ritxòre idi riwymy reakamy riròmyhỹre.

<sup>28</sup> Inatyhymy Jesuisi rirawyònyre: –Kai ainatyhyna sòwene. Adee ariwinykre aõmybo textitòenyteri. Iule iriòre reytemy rare.

<sup>29</sup> Tahe Jesuisi ròsere ixityre Kalileia ahohokỹ-ò. Raòwònymy rare hãwãlò-ò. Iratytyre ronyre.

<sup>30</sup> Sòwemy heka iny webinadu didyde: itiere mahãdu, iruetã mahãdu, irybeõ mahãdu, aõ ikõkõ

heka bina bina wixira wixira idi rare. Jesu-  
isiko-ò heka ritidirenyreki ibutumy riteytenyre.

<sup>31</sup> Iny ruetà r̃yira mahādu itxeretyhymy ri-  
winyre. Rarybekōmy r̃yira mahādu, rarybemy  
r̃yimyh̃y teysamy. Itiere r̃yira mahādu, rari-  
amy r̃yimyh̃y. Tai ibutumy iny ribedeòtiid̃ỹnyre  
heka tahe judeu mahādu Deuxu-ò wowydyna ri-  
wahinyre.

<sup>32</sup> Jesuisi rarybere taeryd̃ỹna mahādu-ò  
kanakemy. Tahe tamyreny rarybere: —Jiar̃ỹ  
k̃ny rewotònyreri kainy mahādu r̃yireridi.  
Inataõ txumy bedè riera waki. Aõ heka ihokõre  
rir̃s̃ỹrenykemy. Iòwed̃ỹkõlemy ariteònykeki heka  
ijõ reseke ryrowetyakile. Rama riatyke.

<sup>33</sup> Tai tahe ieryd̃ỹna mahādu rarybere: —  
Inyboho bederahy-ki, titxibo heka r̃s̃ỹna  
arimykre iny s̃owehek̃y-ò ariwahinyrenykremy?

<sup>34</sup> Tahe Jesuisi tamyreny rit̃ỹraxinyre:  
—Tiwesebo roxina-di atxitenyteri. Tahe  
rirawyònyre: —Debò inatxi reurò orotxu s̃omo  
s̃omomy idi watxireri utura deyre ijõ rare.

<sup>35</sup> Jesuisi rarybere ibutumy iny ronykemy.

<sup>36</sup> Tahe tíí rexitònyre Deuxumy reàlàre.  
Orotxu, utura-wana riereerenyre tahe taeryd̃ỹna  
mahādu-ò riwahinyre idi rakremy.

<sup>37</sup> Ibutumy riroxire heka kia iny s̃owehek̃y ta  
rihydyre. Tabyre rahudi tahe riarire ieryd̃ỹna  
mahādu. Tai tahe rahure t̃ỹxihik̃ỹlemy. Debò inatxi  
reurò weririmy heka rit̃ỹxinyrenyre.

<sup>38</sup> Tahe 4000 hābumy riòwenyre, kia txuu wahe.  
Uladu, hāwỹy-di rariaõhyre.

<sup>39</sup> TAhe Jesuisi iny-ò rarybere tas̃y-ò ròòsekemy

ixyby. Iribi tahe Jesuisi hãwò-di reuròm̃y rare Magadã hãwã-ò.

## 16

<sup>1</sup> Fariseu mahãdu saduseu mahãdu nade Jesuisi-ò iurihixidỹ̃my riitxenanyrenykemy: —Aõbedeerydỹ̃nabo heka biu-ki iribi rexitòenyre. Biwateòsinyke heka aõwiihikỹ̃-di biu-ò jiarỹboho arieyrenykre, kai inatyhy tate wahe.

<sup>2</sup> Idi tahe Jesuisi rarybere: —Kaiboho heka awirenyre biuwetyky erysy-ki. Jesuisi rarybere: —Kia rybe tarybemahãte. Txiorotxumy heka biuwetty isòhòkỹ̃ra-ki, biurasòm̃y tahe awim̃y txu kedeakre.

<sup>3</sup> Biurasou ibede lyby lybim̃y txu-di kedeakeki tahe biu ròahyyhy bedè txu rariakre. Myhe tarybemahãte. Kaiboho heka iwitxira aõhebo rotỹ̃nykre heka teerytenykõlemahãtenyte.

<sup>4</sup> Iny kamahãdu heka ibutumy ibina binare. Tiu heka rityhynyõhyym̃yhỹ̃renyre. Rexitòenym̃yhỹ̃renyre heka biu-ò rityhynykemy. Tahe riwahinyõtyhy heka aõma bedeerynaõ. Kia Jonasi-ò bedeeryna rareõle tahe tamy rakre heka. Tahe Jesuisi rexitam̃y rare iribireny.

<sup>5</sup> Idi tahe aho weribijã-ò reuròrenyreu tahe, tõhõtireny rosare tarỹsỹnareny-ribi.

<sup>6</sup> Jesuisi tamy rarybere: —Fariseu mahãdu, saduseu mahãdu iurina-ò bexiebenyke.

<sup>7</sup> Ierydỹ̃na mahãdu tahe widee rarybere: —Tii kia rarybere iny orotxu diwyõdeki.

<sup>8</sup> Jesuisi roholare aõmybo raryberenyre tahe tam̃yreny rarybere: —Aityhynareny urihim̃yòre.

Aõherekibo orotxumy jiarỹ rarybererimy tahõtinytenynte?

<sup>9</sup> Tiu kaiboho bierybenyõtyhy. Iruyre orotxumy remyre. Idi 5000 hãbumy reòwenyre. Ihãre tahe weriri txỹxi tỹxihikỹlemy rỹimyhỹre rauhenyre. Itxi aõbo õhõtireny reakõmyhỹre.

<sup>10</sup> Ixityreu tasỹ 4000my reòwenyre, debò inatxi reurò orotxu-di. Ixiyrubule rauhenyre.

<sup>11</sup> Jiarỹ orotxumy rarybeõre. Fariseu mahãdu, saduseu mahãdu urina-ribi bexiebenyke.

<sup>12</sup> Tai ierydỹỹna mahãdu rieryrenyre aõmybo rarybemyhỹmy Jesuisi heka fariseu saduseu be-deerydỹỹnamy rarybereri.

<sup>13</sup> Idi tahe Sesaria Filipi hãwã iòhòmy rehemnyre. Jesuisi rỹỹraxire taerydỹỹna mahãdu-ò: — Iny wamy rarybereri. Mobo heka jiarỹ raremy heka wadi rỹireri. Jiarỹ Hãbutyhyhykỹ rare, Deuxu Riòre wahe.

<sup>14</sup> Ijõ kỹny rarybemy rỹireri: —Kai riki heka Joaõ Sebedỹỹdu atxiteri. Ijõ riki Elia atxiterimy adi rỹireri. Ijõ tahe Jeremiamy adi rỹireri. Ijõ heka Deuxu rybeduõ riki heka atxiterimy adi rỹireri.

<sup>15</sup> Tai tahe Jesuisi rỹỹraxire taerydỹỹna mahãdu-ò: —Mowexe watxirerimy wexe wadi tahõtinytenyteri.

<sup>16</sup> Simaõ Pedro heka rarybere: —Kai Kristu atxiteri Deuxu deòdỹỹna heka tate. Kai heka Deuxu Riòre tate.

<sup>17-18</sup> Tahe Jesuisi rirawyònyre Pedro-ò: — Inatyhymy Pedro tate, Waha, biu-ki Mana ani rare. Boholake, ratximyhỹrele kia adee riteòsinyre. Iny aõkõ kia adee riteòsinyre. Wadohodỹỹna

mahãdu kia mana tyre-ò ariwinykre. Rubu dori heka tiu ituedeõna.

<sup>19</sup> Waiòlòna rayna heka adee ariwahinykre. Kabede-ki aõwidỹỹ adee binakeki tule biu-ki ari-ijõnykre. Aõtxiletxibo aõwidỹỹmy burukre tasỹ biu-ki tule adee ariwinykre.

<sup>20</sup> Jiarỹ inatyhymy Deuxu deòdỹỹna rare. Tuu ijyyrenyõmyke.

<sup>21</sup> Iribi tahe Jesuisi itỹny relyymy taerydỹỹna mahãdu-ò. Rurukremy heka relyyre: –Arakre heka Jerusalẽ-ò. Tai heka matuari mahãdu, õnosõna bederyna mahãdu, xiwena wahidỹỹdu mahãdu-wana riwarubunykre. Inataõ txu-di tahe ixyby rubu-ribi adexixakre.

<sup>22</sup> Idi tahe Pedro heka Jesuisi ridyre ijõ ery-dỹỹna-ribi tahe tamy rarybere: –Aõkõre, Wanyrỹ, tiu heka tiibohe ararubunyrenyõtyhy.

<sup>23</sup> Tahe Jesuisi rarybere Pedro-ò: –Waribi beXHITXinyke. Kai heka Satanasi weselemy atximahãte. Iwese kai taraykynymahãte heka aõ Deuxu deewinamy aõkõ tuu tahõtinyinmahãte hãbudeewile rare.

<sup>24</sup> Idi tahe Jesuisi rarybere taerydỹỹna mahãdu-ò: –Inyõ wawananomy rurukeki, ixi-ribi heka tõhõti rosake. Nomy rurukeki heka taitxeò rimyke idi tahe wahemy kanake.

<sup>25</sup> Inyõ wahemy rariakemy ixi-di rõhõtinyhyyke wana heka irumy inonana irehemy ixi-di ratxikeki heka tii ihãrele ruruke. Inyõ taumy riõnonykeki waõraru-ki tai tahe tii ròtake.

<sup>26</sup> Inyõ heka ibutumy aõna aõna bedeki ributunykeki. Tahe ihãrele heka tii ruruke. Tule umytuedeõna riõnonyre. Aõ tarasana tamy aõ aõkõ



rare. Iny iruna riòwynyõhyymyhÿre, ixiyby tamy kanake wahe.

<sup>27</sup> Jiarÿ, Deuxu Riòre, Hãbutyhyhykÿ dori kanakre wana aõwesele. Taÿju loosòna-ki tii kanake.

Iny ibutumy ariòwynykre bibutunymy aõbo iny riwinymyhÿré heka aõwiihikÿ aõbina bina.

<sup>28</sup> Iu jiarÿ, Deuxu Riòre, Hãbutyhyhykÿ, kanakeu tahe inyõ kaibohoõ tuu robikre, Iòlòmÿ kanakreu.

## 17

<sup>1</sup> Reare heka debò sohoji reurò txumy. Tahe Jesuisi ridyre Pedro, Txiau, Joaõ-wana. Joaõ tahe Txiau seriòre rare. Tahe raòwònÿre tiiboho-wana hãwãlò ratòhòkÿ ratyy-ò. Inyõ heka tii wana raõhyyre.

<sup>2</sup> Ikoreny-ki tahe Jesuisi rexiwixiranyre. Iòsana heka roosòre. Txuwesehekÿle relere iòsana heka ratÿrÿrÿnyre. Ityky tasÿ rauranyhÿkÿre. Tahe roosòna itoosònadihikÿre.

<sup>3</sup> Iu tahe tuu robire Moisesi rubu, Elia rubu, Jesuisi-wana widee rarybemyhÿreny.

<sup>4</sup> Tahe Pedro tamy rarybere: –Awire, Wanyrÿ, kawese watzixirenyreri kaki. Adee wikeki hetomy ariwinyrenykre ijõ adeekre, ijõ ta Moisesiõkre, ijõ Eliaõkre.

<sup>5</sup> Iu Pedro rarybereriule tahe biuwetyky urahakÿ relere. Iyribile rybeõ narybede: –Kia heka Wariòre waluu heka rare. Boholabeny irybe-ò.

<sup>6</sup> Idi tahe ierydÿÿna tamy roholareu, tahe ruberure. Tahe resereny iòsanareny bede-ò.

<sup>7</sup> Jesuisi tamyreny nade: –Breburenyõmyke hewa bodorukubedenyke heka.

8 Reteherenyre tahe Jesuisi sohojile tai rỹire.

9 Iribi tahe diberenydenyde hãwãlò ratyy-ribi, Jesuisi narybede: –Uritere waijyyõmyke inyko wiji tuu tabitimy. Iu jiarỹ, Deuxu Riòre Hãbutyhyhykỹ, rubu-ribi riixixanykreu tahe tuu belyykre.

10 Tahe ierydỹỹna mahãdu Jesuisi-ò rỹỹraxire: – Aõherekibo tarybetenyteri –Elia juhuhu kanakemy ako-ò juhuhu kanakemy.

11 Jesuisi rirawyònyre: –Inatyhy rare tii juhuhu kanakre. Ibutumy heka bede riywinykre.

12 Tule ararybekre kiamy: –Elia nade tahe ihãrele heka iny rieryõhyyre. Aõhõkỹmy risỹnyre. Iwese Elia aõhõkỹmy risỹnyre wesele tahe Deuxu Riòre Hãbu heka aõhõkỹmy risinykre, jiarỹ wahe.

13 Tai tahe Jesuisi erydỹỹna mahãdu rieryrenyre aõmybo Eliamy tii raryberemy Joaõ Sebedỹỹdule tahe Jesuisi rarybere.

14 Iribi tahe dòòsedenyde iny sõwemy riraõmy rỹimyhỹre. Hãbu-ò nade Jesusiko-ò tatiowomy resere:

15 –Wanyrỹ, ruxetòena wariòre-di biwahinyke. Irayky awimy aõkõ ratximyhỹre. Bera-txi resemyhỹre. Heòtyru-txi resemyhỹre. Ibutumy aõna aõna riwinyrerimy ihỹre.

16 Aerydỹỹna mahãdu-ò heka adidyde tahe tiu riteytenyõtyhy.

17 Jesuisi rirawyònyre tamyreny: –Kaiboho isira mahãdu atxitenyteri. Aõ heka inatyhyna heka akireny ijõkõre. Tiwese bede dỹỹnana bohe araòludunyrenykre. Bedese inihe bididy uladu wadee.

18 Tahe Jesuisi rarybere kia uladuwo-ki ratx-imyh̃yò: —Iribi wa bohonyke! Tahe uladu reytemy reare.

19 Idi ieryd̃ỹna mah̃adu Jesuisiòle rarybere: —Aõherekibohe jiar̃ỹboho tyytybybina iribi reteònykõreri?

20 Aõmareki kiehe ainatyhyna ibutetyhyreki òwòruty sòmowesele ainatyhyna dikeki heka kai aõwiihik̃y biwinyke. Kai h̃aw̃lò-ò marybeke: —Iribi bexitake! Tai tahe h̃aw̃lò rexitake iwitxira suò. Aõ aõkõ adee isirake, ainatyhyna direki wahe.

21 Kia tyytyby bina iwitxira rare. Isiratyhyre heka. Kaiboho bexitòenybenykeki, binarehebenykeki, ixiery tyytybybina biteònybenyke.

22-23 Kalileia bedeki Jesuisi taeryd̃ỹna mah̃adu-wana ributunyre. Tai Jesuisi rarybere tamy: —Jiar̃ỹ, Deuxu Riòre H̃abu, rare. Tai inyò riwahinykre h̃abubinaõ-ò warubud̃ỹmy. Inataõ txu-di tahe rubu-ribi adexixakre. Tai tahe ieryd̃ỹna mah̃adu rabedewo nihik̃ỹre.

24 Iu tiiboho heka Kafanaõ h̃aw̃-ò ritehemynyre, inyò Pedro-ò nade. Tii dohod̃ỹna òwy butud̃ỹdu rare. Tahe rarybere: —Awedu aõbohe tii rexiòwynykekõ.

25 Pedro rirawyònyre: —Tii riòwynymyh̃re. Tai tahe Pedro rakemy reare. Iu Pedro tuu Jesuisi-ò rarybekemy hetowo-ò raloreu, Jesuisi juhuu rarybere: —Moribibo iòlò rexitòenymyh̃re òwyd̃ỹnamy. Mynydu mah̃adu-ribi aõbo ada ta taijoiribile aõbohe rotamyh̃re.

26 Pedro tahe rirawyònyre: —Mynydu mah̃aduòle rexitòenymyh̃re. —Inatyhy rare, Jesuisi rarybere.

Ijoi mahãdu òsana riòwynyõhykymyhÿre. Jesuisi rarybere: —Ihãre tahe ròkòòwydÿÿkre.

<sup>27</sup> Òbitimy rakaòwònyrenykre. Kia Templo heto òwymy. Ibinamy kia iny-ò ariwinyõtyhy. Kai heka makre ahohokÿ-ò awaxi-di behukre. Juhu utura kanakrele heka bidimykre. Idi iry biraynykre. Tai nieruõ-ki mahake. Iribi biditymy tahe makre iny òwydÿÿmy.

## 18

<sup>1</sup> Iule tahe Jesuisi erydÿÿna mahãdu tamy rehemynyre rÿÿraxire: —Mobohe Deuxu Iòlòna-ki nihikÿmy rarekre.

<sup>2</sup> Jesuisi heka ratximyhÿ uladuõ ibire-ki.

<sup>3</sup> Idi tamy rarybere: —Kai uladu weseleõmy mabeõkeki, Deuxu Iòlòna-ò malòbenyõtyhy

<sup>4</sup> Uladu wese maraykynybenykeki heka, tii tahe Deuxu Iòlòna-ki inatyhymy rÿirakre.

<sup>5</sup> Kai waòraru-ki uladu kawesemy biwiòhenanykeki tiwawiòhenanymahãte

<sup>6</sup> Kai uladuõ òraruna-txi resekemy risÿnykeki, kai abinatyhymy atximahãte. Inyõ òy ritakamy reroti-di aratakemy heka inyõ adi rehuke bera-txi. Tii tahe awityhyre adee.

<sup>7</sup> Sòwemy heka aõna aõna rÿira wary-ribi iny ri-atykemy. Tii adee ibinatyhyre. Tiiemy heka tuhy rarekre. Inydee heka ibinakre heka. Wary-ribi riòlòdÿÿnymyhÿre heka tamy ibinakre.

<sup>8</sup> Ebò òraru-ki tahe wainatyhyry-ribi bexitakeki, ebò biòròmmy idi behuke. Awityhyre heka adee Deuxu Iòlòna-ò malòkre sohoji ebòdile. Inatxi ebò-di heòty bedebina-ò malòkeki, awiõre heka.

<sup>9</sup> Tule arue sohoji òraru-ki kia òrarunamy beseke lau, urile bitake idi behuke. Arue wiò-di heòty bedebina-ò malòheny arue-di wiòle. Biu bedewi-hikỹ-ò malòke tahe awire heka arueyremy.

<sup>10</sup> Iny nihikỹ ityhy iny yja mahãdu heka tuuõre. Uritere heka iweserenyõmy atxibenyke kaiboho bexiijebenyke tamy. Iny aõkõ mahãdu dori tii iỹju dire heka. Iỹjurenny heka Deuxuko tii ibutumy re-lyymyhỹre turenny. Idi õhõtirenny-ribi bosabenyõke.

<sup>11</sup> Jiarỹ Hãbutyhyhykỹ rare, Deuxu Riòre wahe. Ityhydỹỹdukõdu mahãdu ibutumy aritakemy anade.

<sup>12</sup> Rakawesenanykre heka kaijyy wesemy. Rakarybekre heka kahãbu 100 budoeni ijõdire wesemy. Sohoji heka iõre iy-ribi. Kia hãbu idi itxeredu tahe iy-ribi iõre rakre ijesemy. Iuhe tahe hãwãlò-ki riroximy ririre.

<sup>13</sup> Tai rahakre wana heka teysamy ratxikre. Kia sohoji òrarukile reysakre.

<sup>14</sup> Iwesetyhylemy taheka inyõ iõõtyhy Waha-ribi. Tamy dori kia ibinare.

<sup>15</sup> Inyõ adee rexiòrarunykeki tahe tamy makre rybemy. Uritere inywitxirako-txi rybeõmy tuu. Tahe tamyhyylemy marybeke. Aityhydỹỹdu seriòre heka arybe-ò roholakeki, tahe ixi-txi tõhõti reake wana, ixi dee ibinamy rõhõtinyinra wana, tai tahe kai ixyby tii-wana ityhydỹỹdu seriòre biòwamy beleke.

<sup>16</sup> Aõhe wana tahe arybe-ò roholaõhyykre, tahe ixityre make inyõ wana rexibiòwanymy.

Iny inatximy ixihe-ki bidyke. Tii tahe arybe-ò ijohonaduke inatyhy raremy arybera-txi

resekemy wahe. Iu dohodÿÿna-ki rarybekreu, tai tasÿ tii rarybeke teòsamy aõkõ ratximyhÿrelemy rarybeke.

<sup>17</sup> Tii irybereny-ò roholaõkeki, tai tahe dohodÿÿna mahãdu-ò belyyke. Tii irybereny-ò roholaõkeki, tai tahe biteònyke. Tii iwese òrarudu mahãdu heka adee rarekre, bede dinodu-ò nieru wydydu wese wahe.

<sup>18</sup> Iwese kaiboho waityhydÿÿdu mahãdu kabede-ki rõhõtinyre wesele, tule araykywesetyhyle Deuxu biu-ki rõhõtinkyre. Aõbo adee kabede-ki aõwidÿÿ ibinare ada awire heka tule biu-ki ibinamy rarekre, awimy rarekre. Arybe riwitxiranyõtyhy kowa biu bede-ki.

<sup>19</sup> Iwitxiraõmy adeereny ararybekre: —Ijõ titxibo inatxi ada inataõ ityhydÿÿdu seriòre wiweselemy raraykynykre. Waha-ò rexitòenymyhÿreki iwese rexitòenyre wesele heka tamy riwinykre biu-ki.

<sup>20</sup> Titxibo waniòraru-ki inatxi, inataõ wii ributun-kyre heka, jiarÿ taile watxireri.

<sup>21</sup> Tahe Pedro rÿÿraxire Jesuisi-ò: —Bede erydÿÿdu! Waityhydÿÿdu seriòre heka wadee rexiòrarunyekeki, tiwesebo sõwe ariixãwididÿÿnykre ixi-ribi debò inatxi reurò, my aõbo?

<sup>22</sup> Jesuisi rirawyònyre: —Aõkõre, debòinatximy aõkõre, 490 wesemy wahe. Ixityre ixityre bi-ixãwidÿÿnykre.

<sup>23</sup> Deuxu Iòlòna kawesemy rare: —Iòlòõ heka teòdu mahãdu kia contamy robikemy idi ratxireri. Tiwesebo inieru-di rasiranyre wesemy wahe.

<sup>24</sup> Sohoji teòdu juhoo dehemynyde. Sõwemy heka tevedÿÿna ratximyhÿre, 1000,000 womati tÿrÿrÿhÿkÿ nieru wahe.

25 Inieruõre heka iòwydỹña wahe. Idi ro-honykemy heka iwedu riteònyre deòdu mahãdu wesemy. Tariòre-wana tahãwyy-wana ibutumy deòdumy roirekemy. Aõbo tai rỹimyhỹ heka ibutumy idi rohonyre.

26 Tai kia deòdu heka tatiowotimy resere kia iòlòko-txi: –Waiòlòreny, txiointihe biwaraòkre ariòwinykre ibutumy.

27 Tai tahe iòlò riwotòenyre aõma ixinahykylemy ritusanyre.

28 Tai tahe kia hãbu he rare kia urihimyo tamy radevenymyhỹò heka rexinohõtiddynyre. Tai tahe hãbu lòtikile rimyre. Rierenymy resere ribòtòrarityxnyre: –Bidiwaòwinykre kỹnyhe wijityhyle.

29 Tai tahe tatiowomy resere, rarybere: –Txiokre inihe ariòwinykre ibutulemy.

30 Tai tahe rirutyre ròtenawo-ò idi riòtenyrene. Ri-wotòenyreòhyre.

31 Itxeredu mahãdu heka rabadewore tai tahe ibutumy relyyre iòlòko.

32 Tai tahe ixityre tamy rarariòwyre tamy rarybere: –Aõherewe, deòdu binahakỹ, jiarỹ araxãwididdynyre ibutumy inatyhy? Kai dori ixitòedỹña wadee tewinyta.

33 Aõherekibohe aleina kia adee nadevenymyhỹde kia teixãwidinyõta, iwese jiarỹ araxãwidinyre wese.

34 Tai tahe tii rimyre reburere itere iòlò, tai imynymy riteònyre rotenawo-ò riòwinykre xiery riòlòdỹnykremy. Tai aõhòkỹmy rotỹnyymyhỹre.

35 Jesuisi rexihura narybede: –Kiawesele heka adeereny rarekre. Ityhydỹdu seriòre taseriòre

riixãwidinyõkeki heka iwesele heka waha adi ri-wisỹnykre.

## 19

<sup>1</sup> Jesuisi ibedeerydỹna-ribi rexihureu, Kalileia bederibi rõhõnyre. Bero Jordaõ weribijà-ò reurore, Judeia hãwã bedekana-ribi ijà-ò rehemnyre.

<sup>2</sup> Tai tahe sõwemy iny webinadu mahãdu rỹire. Idi tahe ihemy rare. Ibutumy riteytenyre.

<sup>3</sup> Fariseu mahãdu imynomy idi riwisỹnymyhỹre aõbinamy rarybekeki rimyky. Tai tahe tamy dỹraxyimy namyhỹde aõsirahakỹmybo: —Iny bedeywinareny tahãwyy riteõnymyhỹre urirybelemy, wiribi reseky.

<sup>4</sup> Jesuisi dirawyõnyde: —Ritidỹnyamy aõbo tariaõmyhỹte idi? —Deuxu ibutu widỹydu heka juhoo hãbu hãwyy-wana riwinyre.

<sup>5</sup> Idi tahe rarybere:

—Hãbu heka tybyboho-wana tadiboho-wana wiribi rexihitxinymyhỹre tai tahe tahãwyywanale wii ributunomy rỹira.

<sup>6</sup> Inatxi heka sohoji weselemy rarekre, hãbu tahãwyy-wana. Deuxu heka hãbu tahãwyy-wana ributunyre, inyõ heka tiu rihitxinyõtyhy.

<sup>7</sup> Tahe ijõmy fariseu mahãdu ritỹraxyinyre: —Aõherekibo Moisesi kawesemy juhoo rarybere: —Hãbu tahãwyy riteõnykeki juhoo urile tyyriti tamy riwahinyke riteõnykekoki.

<sup>8</sup> Tahe Jesuisi kawesemy rarybere: —Kaiboho heka ieryna urihimyõlereki aõ isirareki heka kia riwinyre. Juhoo tahe kawese aõkõ rỹire.



<sup>9</sup> Aõmale tahe ixinamy riteònyke ixi-ribi òta òtadule heka aõwaxiny tuu riteònyre ixi-ribi.

<sup>10</sup> Tai tahe ierydÿÿna mahãdu rarybere Jesu-isi-ò: –Tahe kiawesekeki heka uritere heriõmy hãwyyõmy, hãbuõmy.

<sup>11</sup> Jesuisi tahe dirawyònyde: –Kaa bede eryna heka aõ ibutuhukÿ-ò aõkõ tureri aõma Deuxu bede eryna tamy riwahinymyhÿreòle heka tureri.

<sup>12</sup> Aõtxi-ki tahe tuu hãbuõ rÿira hãwyyemy heridumy aõkõ rÿira. Ijõ hãbuõ tahe tiemy tunodumy rÿirerimy ihÿre. Iwixira hãbu-ò rexiwahinymy rÿireriki heka tuu rÿirerimy ihÿre. Ijõ tahe tuu rÿirerimy ihÿre aõma Deuxu aõmysÿdÿÿna òraru-ki wahe. Kaa rybe tahe inyõ tahe rityhynykeki tii inatyhymy rityhynyke.

<sup>13</sup> Inyõ didyde uladuõ Jesuisi-ò tamy rexitònykemy tebò iraty tyre-ki roirerilemy. Ierydÿÿna mahãdu tahe uritere iixiradÿÿõmyke.

<sup>14</sup> Tahe Jesuisi rarybere: –Ixinamy kanamyhÿke uladu wadee. Uritere itinysÿrenyõmy. Uladu wesemy dori Deuxu Iòlòna ròtedu mahãdu ratx-imyhÿre.

<sup>15</sup> Jesuisi tahe iratytyre tebò ritidire tamy rexitònyre. Idi tahe Jesuisi rare.

<sup>16</sup> Aõu tahe hãbuõ Jesuisi-ò nade: –Erydÿÿdu, aõhebo arotÿÿnykre. Aõma, timykibo umytuedeõna aritakemy wahe. Aõwidÿÿ wiwihikÿbo ariwinykemy.

<sup>17</sup> Jesuisi rarybere: –Aõherekibo wadee aõwiwihikÿmy widÿÿ tÿÿraxiteri? Iny sohojile awi rare, Deuxule wahe. Kai bede ywina ibutumy bityhynyke, umytuedeõna hakÿ-ò molokre.

18 Aõbedeywinabo arityhynykre? Tahe Jesuisi rirawyònyre:

—Rubudỹỹõmy, Òta òta widỹỹõmy, wasiõmy, ruiõmy,

19 Adi boo-wana bityhynyke, iwese ixiluure wese heka abireludu mahãdu luuke.

20 Hãbu rarybere: —Kia heka aõu aõu jiarỹ retyhynyre. Aõijõmybo arotỹỹnykre?

21 Jesuisi rirawyònyre: —Kai òbitimy mabekekile aõmydỹỹna-di ibutumy. Kia idi bohonyke òwy tahe biwahynyke urimynodu mahãdu-ò. Tai sõwemy aõna aõna biu-ki ahõrõmykre. Iribi tahe biwahe-ludunyke.

22 Iu hãbu kia roholareu tahe rabadewonihikỹre inieru sõwerekì heka rabadewore.

23 Tai tahe Jesuisi taerydỹỹna mahãdu ribedeerynyre: —Isiratyhyre heka biu bedè-ò ralòke aõma ityhy nihikỹkeki.

24 Isirare heka aõma kamelo tyy rurena òtummy ralòke heka isirare, inatyhy? Tai tahe aõma ityhy mahãdu ralòke tarasanamy reake heka isirare.

25 Jesuisi erydỹỹna mahãdu ribedeòtiinyre kai-ò roholareu. Tai tahe rõhõtinyre: —Aõkõre isiratyhyre tuu ròte. Inyõ tarasanamy reaõtyhy.

26 Jesuisi tamyreny retehere tahe rarybere: —Inatyhy rare hãbu-ò isirare. Deuxu dee tahe isiraõle rare.

27 Tai tahe Pedro rarybere: —Jiarỹboho ibutumy aõmydỹỹnareny adiridenyde. Araheludunymy watxiwãhãre. Aõma ritarenykre?

28 Jesuisi tahe dirawyònyde: —Kiamy heka adee ararybekre. Jiarỹ Deuxu Rìòre Hãbu tyhyhykỹ wahe. Kaiboho heka tule borukubenyke

aiòlònaryna-ki iu ibutumy ratỹmyrakreu. Kaiboho iny sohoji sohojimy judeu ijoĩõ biywisidỹñnanybenykre, waijoi waòinatxi reurò mahãduõ wahe.

<sup>29</sup> Inyõ kia ibutumy aõbo waòraru-ki ririmyhỹre iwese taheto ririmyhỹre waòraru-ki, taseriõre, tadi, tyby, uladu, taoworu, ririmyhỹre. Kia sohoji sohoji-ribi heka aõ sohoji sohoji òwymy 100 ritakre. Tule umyuedeõna ijõmy ritakre.

<sup>30</sup> Inyõ nihikỹmy ityhymy ratxirerimy ihỹre, tii iyjalemy relekre, aõma aõkõ tai relekre. Tule iyja nihikỹmy relekre. Sõwemy urimynodu kaki rỹirerimy ihỹre tahe biu-ki inihikỹmy rarekre.

## 20

<sup>1</sup> Jesuisi tasỹ riteòsinyreri ijyyõ timyrebo Deuxu Iòlõna. Hãbu aõmysỹdỹỹdu heka oworu widỹỹmy heka riteranymy tamy rarybemyhỹre:

<sup>2</sup> –Aõmamy araòwynykre, sohoji prata womati nieru, iwese ibutumy raòwynymyhỹre wese, sohoji txuòwy wahe. Tai tahe tii raaõmysỹdỹỹre uva oworu-di raaõmysỹdỹỹmyhỹ.

<sup>3-4</sup> Idi tahe tii reare 9 horau tule, txutyeyu tule, titxibo iaõmysỹdỹỹna rỹireri titxibo hãbu teaõmysỹdỹỹmyhỹ. Tahe tuu robire urile ratximyhỹmyhe idi retehemyhỹ. Tai tahe tamy rarybere: –Maaõmysỹdỹỹke hewa, waoworu-ki. Ikonana txu heka òbitihyky araòwynykemy adi watxireri.

<sup>5</sup> Tiiboho raaõmysỹdỹỹre tule. Txutyeyu tasỹ ixiryubule ijõ riteranyre aõma iwese kia juhUU ijõ-ò rarybera wesele.

<sup>6</sup> Txuinyòbira-ò ijõ rimyre, tule ijõ txiorotxure.

<sup>7</sup> Iruyre hora-ò ijõ tasỹ riteònyre.

<sup>8</sup> Tahe txiorotxumy ròhònnyra tahe kia iòwydỹũdu tamy rryyre.

<sup>9</sup> Tahe 1 womati nieru tamy riwahinyre, sohoji hora raaõmysỹdỹũre mahãdu wahe.

<sup>10</sup> Tahe txusohojimy raaõmysỹdỹũre tahe iratyre ròtakremy ixi-di rõhõtinyre. Tahe tule riòwynyra iwese ijõ riòwynyra weselemy, 1 womati nieru, sohoji sohoji wahe.

<sup>11</sup> Tai tahe rimyre nieru urile tamy rexibinanymy rarybere:

<sup>12</sup> —Kowa heka sohoji horale raaõmysỹdỹũhãrele heka 1 teòwynyta. Jiarỹ boho tahe txuhyy raaõmysỹdỹũra, bede tòtee-ki wahe.

<sup>13</sup> Tahe iwedu rarybere: —Wabiòwa, adeereny rarybera. Wiji 1 womati nieru ariwahinykremy heka inatyhy? Tuheka adeereny rewahinyre. Aribi rawasinyora.

<sup>14</sup> Boibenykre heka ibutumy araòwynyreri. Wiwesetyhylemy heka araòwynyrenyreri, iwese rarybere wese.

<sup>15</sup> Hora sohojilemy raaõmysỹdỹũraò sohojimy wanieru ariòwynykre inatyhy. Tamy wanieru ariwahinykemy ixideewimy, aõhe inatyhy? Aõherekibo tebureteri? Jiarỹ urihimyò raaõmysỹdỹũraò wawiremy tarybetenyteri wahe.

<sup>16</sup> Jesuisi tahe rexihure kia rybe-di, kiamykre bede: —Ikoludu heka ihewoludu-ò resekre. Ihewoludu tasỹ iko-ò resekre.

<sup>17</sup> Tai tahe Jesuisi ròwònnyre Jerusalẽ hãwã-ò. Iny-ribi tawaò inatxi reurò mahãdu rihitxinyre. Tamy relyyre timybo aõhebo rotỹỹnkremy Jerusalẽ hãwã-ki:

18 —Jiarỹ, Hãbutyhyhykỹ adee ararybekre: — Inyõ riwawahinykre aõma-ò Xiwena wahidỹỹdu wedu mahãdu-ò. Tule diwatyhenykre judeu wedu mahãdu-ò. Tahe riwarubunykeny heka tiiboho wamy rarybekre ijõ iny-ò.

19 Tii heka riwamykre tahe riwawahinykre Roma iòlò-ò, judeukõdu mahãdu iòlò wahe. Ibinatyhymy aõhebo riwasỹnymy riwahetenyre. Itxeò nihikỹ-ò riwatamadỹỹnykre. Tahe txu inataõ-di rubu-ribi areixixanykre.

20 Zebedeu riõrese Jesuisi-ò nade. Tatiowotimy resere tahe rexitõenyre aõmybo Jesuisi-ò tariõre-wana nade.

21 Jesuisi tamy rarybere: —Aõbo rare hãwyy rarybere: —Waritxòre inatxi hãbu rare. Tik-iboho kỹnyhe, aikòlònykuna rynana-ki ronykre awana. Ijõ aruruna-txi, ijõ ahywe-txi wahe, kai aikòlòkuna-kò malokreku wahe.

22 Jesuisi heka iriõre-ò rarybere: —Kaiboho aõmybo textitõenyteri teerykõleter. Kai Txiau, kai Joaõ, teerytenyte aõbo aõhebo wadi rotỹỹnykre arurukre dori jiarỹ kaiboho tulekre? Tiiboho dirawyònyde: —Tulekre.

23 Tahe Jesuisi rarybere: —Inatyhy rare kaiboho tule aõhòkỹmy botỹỹnybenykre. Tahe mobo warora-txi ada waruruna weribi rynana-txi ronykre. Jiarỹ reerykõre. Wahale heka rieryre. Tiile tamy riywinyre.

24 Idi tahe debòwiò ierydỹỹna mahãdu kia rieryre aõmybo Txiaiku Joaõboho rexitõenyrenyrá. Tai tahe tiiboho rakyarananyrenyre.

25 Tahe Jesuisi ibutumy taerydỹỹna mahãdu tamy kanakemy rarybere: —Iny iòlò iruru dire.

Ibutumy dinodu tahe kia weselere –taijoi mahãdu riteònymyhÿre. Teòdu mahãdu riteònymyhÿre.

<sup>26</sup> Tahe aõ tuukre aõkõ heka rare ayreny-ki. Inyõ dinodumy ixidikre heka deòdumy rarekre.

<sup>27</sup> Kia iny nihikÿmy xixi-di rexinohõtinyreri tasÿ aõ aõkõ tii rarekre.

<sup>28</sup> Iwese jiarÿ riwinyre wesemy heka rarekre. Hãbutyhyhykÿ aõ dinodumy aõkõ anade. Iwese deòdu rÿira wesemy heka nade waumy riwahinykremy rubu-ò kabede-ki. Tai sõwemy iny ritakre.

<sup>29</sup> Iu Ijeriò hãwã-ribi ròirenyreu, tahe sõwemy iny riheludunyre.

<sup>30</sup> Inatxi iruetãmy heka ronymyhÿ iu Jesuisi ibire-di rareu. Tiiboho roholarenyre kia Jesuisi raremy. Rexitelenyre ryryre Jesuisi-ò: –Davi riokore, wadee hewa ruxetòena biwahinyke.

<sup>31</sup> Tai tahe iòhòmÿ iny iribi rÿimyhÿ rarybere: –Txiokre inihe, biyryke! Ixityre ryryre tarurutyhy: –Inynrÿ Davi riokore, Biwawotòenyke hewa.

<sup>32</sup> Jesuisi tamy rarybere: –Aõwexe adeereny ariwinykre.

<sup>33</sup> –Wanyrÿ, Kai wa bidiwaruenykre warue biraynykremy.

<sup>34</sup> Tahe Jesuisi riwotòenyre iruebymy reare tebò-di. Aõwesele tahe ruòmÿ reare. Tai tahe Jesuisihe riheludunyre.

## 21

<sup>1</sup> Jesuisiboho tahe rehemynyrenyre Jerusalë hãwã iòhòmÿ. Betabaji hãwã-ò heka rehemynyre. Kia Oliveira hãwãlò-ribi irehemy aõkõ ihÿre. Tahe

Jesuisi inatxi iny riteònyre hãwã-ò, taerydỹna mahãdu wahe. Tamy rarybere:

<sup>2</sup>—Juhu hãwã dele-ò malokreule aõma bobikre, jumenta tariòre-wana. Tahe bitaanalawekre ta bididykre kaò.

<sup>3</sup> Inyõ aratyỹraxinykre wana, tai tahe kiamy bisỹnykre aõma: —Wawedu hewa idi ratxikemy röhõtinyreri. Tai ki tahe ahemy kiditeònykre.

<sup>4</sup> Kia ihetxiu ritidỹna tuheka relemy roimyhỹre. Kamy rarybere:

<sup>5</sup>—Marybeke heka Jerusalẽ hãwã-ò:  
—Deuxu Iòlõna heka kanakre adeeremy wahe. Tii inihiky wesemy aõkõ kedehemynomy, jumenta tyre-ki heka kedehemynykre.

<sup>6</sup> Tahe ierydỹna mahãdu riwinyre iwese Jesuisi rarybere weselemy.

<sup>7</sup> Didyde tahe jumenta tariòre-wana. Ihetyreny jumenta tyre ritidire. Jesuisi ityre ronyre tahe idi rare.

<sup>8</sup> Tahe inyõ sõwemy-ribi tahetyreny-di rehumyhỹre iryko-txi idi rariakemy ityre-di. Ijõ tasỹ hereru-di iryko-txi rehure iryube hetymy ityre-di rariakemy.

<sup>9</sup> Sõwemy tai iny rirajuamy rỹimyhỹ iko-ò, ihewo-ò:  
—Iòlò Davi riokore heka sõwemy iny wowydyna tamy iny riwahinyreri. Tii Deuxu Riòre Hãbu rare. Deuxu deysana heka tamy biwahinyke!

<sup>10</sup> Jesuisi hãwãy-ki rehemynyreu, ibutumy iny ribedeòtiidỹnyre: —Mohãbuwe kia ralòreri Jerusalẽ hãwã-ki wahe?

<sup>11</sup> Tai tahe iny mahãdu rarybere: —Aõkõre, kia Deuxu rybeduõ rare. Jesuisi inire Kalileia

bede-ribi Nazare hãwã-ribi dehemynyde.

<sup>12</sup> Tahe ralore Deuxu dohodỹỹna heto-ò. Tai kia aõna aõna-di rohonyreri heka riteònyre. Kia aõma nieru wiuròna iòwòruwebese tahe riatyre. Kia aõma bòtòe dohodỹỹdu ryna ibutumy ritxiwire riatyre.

<sup>13</sup> Tahe Jesuisi rarybere: —Deuxu Tyyriti rarybere:

—Dohodỹỹna heto heka waha heto rare, ixitòedỹỹna heto rare.

—Kaiboho heka inywasidu mahãdu-di tetỹxinytenyta.

<sup>14</sup> Sõwemy iny itiere, iruetà, nade Jesuisi-ò dohodỹỹna heto-ò. Jesuisi taile riteytenyre.

<sup>15</sup> Tahe xiwena wahidỹỹdu wedu tuu robire. Tule judeu bede ywina bede eryna mahãdu robireu tahe, aõma uladu templo-ki ryrymy rỹimyhỹò aõma: —Davi riokore heka Deuxudeewina rare. Tai tahe kia rybe-ò reburerenyre.

<sup>16</sup> Tiiboho tahe raryberenyre Jesuisi-ò: —Kai aõbo taholate aõbo rarybereri. Jesuisi rirawyònyre: —Kohe, raholare. Kaiboho teeryõtenyte:

—Uladu dori wowydyna tamy riwahinykre. Tiu aõbo tariatenyõhyymahãte kia Tyyriti-ki.

<sup>17</sup> Tahe Jesuisi iribi ròhònyre Betỹnia hãwã-ò. Taile tahe ruu idi rỹire.

<sup>18</sup> Biurasò txumy tahe tii dòòsede Jerusalẽ-ò. Tahe rama risare iu.

<sup>19</sup> Òwòruõ tai rỹire. Tai tahe diaride figoraty-ò. Tahe iratyõre, txirule rỹire. Tai Jesuisi rarybere òwòru-ò: —Tiu heka kai maratynyõtyhy aõwesele tahe irade rairuxỹrure.



20 Tai tahe ierydỹna mahãdu heka ribedeòtiidỹnyre: –Timykibo heka aõwesele rairumyrõmy reareri.

21 Tahe Jesuisi tamy rarybere: –Kai ainatyhyna ijõdikeki heka iwesele biwinyke. Iratyre biwinyke. Kaiboho heka bitxiõnyõkeki kaa hãwãlò-ò dori marybekre kiamy: –Iribi bexitake tahe aho-ò boikre. Tai hãwãlò-ò aõwesele heka ahero-ò roikre.

22 Aõtxile kai bexitòenykre heka adee ijõ rỹikre. Bityhynytyhykeki, tahe ibutumy bitake.

23 Tai Jesuisi dehemynyde Deuxu dohodỹna heto-ò. Tai tahe ròbedeerydỹmy ratximyhỹ. Tahe xiwena wahidỹdu mahãdu, tule judeu bede ywina erydỹna mahãdu tule tamy dỹraximy nade. Tai tahe Jesuisi-ò rỹraxire: –Morurudibo heka kai aõmydỹnana tewinymahãte? Mobo heka arateranyre kia biwinykemy.

24 Tai tahe Jesuisi tamy rarybere: –Kai aõbo myraxikeki wadee tai ako tuu arelyykre. Kai dỹraxinaõmy bidiwatỹnynykeki tahe, adee tuu arelyykre.

25 –Joaõ Sebedỹdu heka morurudibo nade morybekibo tuu tadiwinymahãte wesemy. Morybekibo Joaõ iny risebenymyhỹre. Deuxu Rybe-ki aõbo ada iny rybe-ki aõbo. Tai tahe widee rarybe raryberenyre: –Aõma Deuxu Rybe-ki tuu ròsebedỹmyhỹre. Mykeki rakarybenykre taheka: –Aõherekibo tetyhynytenyõte myle tii risỹnykre.

26 Aõmamy rikisỹnyrenykeki: –Iny rybekile tii tahe nade. Myỹ rikisỹnyrenykeki tasỹ kia ijoi inydeereny rakyarananyke. Joaõ Sebedỹdu dori ibutumy iny rityhynyrenyre moma tii Deuxu deòduõ ratximyhỹre heka. Rakarybenyõkre tahe.

27 Tai tahe Jesuisi-ò raryberenyre: —Aõkõre, reeryrenyõre heka irawyòdỹỹ tixiribibo iruru nade. Tahe Jesuisi rirawyõnyre: —Tule jiarỹỹĩraxina adeereny aritỹnyrenyõtyhy.

28 Ijõ Jesuisi relyyre: —Timybo maraykyny-benykre ka ijyymy arelyykre. Hãbuõ heka inatx-imy iriõre raremyhỹ. Tariõre dela-ò rarybere: —Dàã, maaõmysỹdỹỹkre waoworu-ki, wiji wahe.

29 Tahe tamy dirawyònyde: —Waha, araõkre hewa. Ihãrele tahe tawo rirahòrere rakremy. Tahe rare.

30 Idi tahe tyby rarybere helỹỹna-ò: —Kai tule makre waaõmysỹdỹỹna biwinykremy: —Dei wahe, arakre araaõmysỹdỹỹkre. Ihãrele tahe tii raõhyyre.

31 Adeereny inihe araỹraxikre. —Tibohe weryrybò aõma tybyrybe rityhynyre? Tai tahe dirawyònyde: —Juduludule irybe rityhynyre. Tai tahe Jesuisi tamy rarybere: —Iny òrarudu tyhy heka wydena-wana ralòkre biu bede ròtena-ò. Ihãrele tahe kaiboho birònybenyõtyhy.

32 Joaõ Sebedỹỹdu dori adeereny rarybere. Ihãrele tahe kaiboho ixitxireny aõrarureny-txi õhõtireny reakemy Deuxu bityhynykemy. Kaiboho heka teramy tekoamahãte tahe sõwemy òrarudu mahãdu wydena mahãdu rityhynyreny. Kaiboho tuu tabitenyte ihãrele teerytenykõte.

33 Ijõ ijyymy arelyykre:

—Hãbuõ heka uva oworuhukỹle ritòbrònyre. Tahe òtityna riwinyre. Tai tahe utà riwinyre yrubudỹỹdu mahãdu itxerenamy.

Tai tahe rihuòtere oworu wahe hãbu mahãduõ-ò. Tii tahe rabetetỹiny my rare taheto-ribi.

34 Iu uva bederaty kia siredenamy bede reareu, riherehe txuramy ixidee ritxuakemy wahe.

35 Tai tahe huòtedu mahādumy heka teòdu mahādulemy raòhòtere. Ijō tahe rirubunyre ijō manadile tamy rehunanymy rỹimyhỹ.

36 Iribi tasỹ teòdu mahāduō didyde sōwetyhymy juhuna ludu ratyre. Tahe ixybyle tuu raòhòtere juhūu iwese tuu rotỹỹnyra wesele.

37 Tahe iwedutyhy rōhōtinyre: —Aōma wariòrele kòri ariteònykre. Tai tahe wariòre rityhynykre heka. Tahe tariòre diteònyde.

38 Tahe huòtedu mahādu weryrybòm̄y robireu, tahe wideereny rarybere: —Kaa heka iwedu riòrele rare. Aōma iwedu rurukreu iaōna aōna, ioworu heka ixideereny rikimyre nykre.

39 Tahe rirubunyre nyre iumy-di rehurenyre oworuro-ribi.

40 Tahe Jesuisi rarybere: —Adeereny araỹraxikre aōbo iwedu tamyreny riwinykre huòtedu mahādu-ò iu tii rehemynykre wahe. Timybohe tii riwinykre?

41 Tiiboho dirawyònydenyde: —Kia rirubunykre ibutumy hābu bina. Inywitxira-ò huòtenamy ele elemy wijuramy riatykre-ò riwahinykre.

42 Tahe Jesuisi tamy rỹỹraxire: —Kaiboho aōbo Ryberiti-di tariaōletenyteri:

—Mana-di heka heto widỹỹdu rehumyhỹre kia manale heto hàtxi-ki ritidimy roimyhỹre. Jiarỹ kia mana wese rare. Inynyrỹ Deuxu kia riwahinyre. Tai awi heka rare. Ijō riwiòhenanyre, mana wahe.

43 Tahe Jesuisi tamyreny rarybere: —Tule jiarỹ adeereny ararybekre: —Deuxu Iòlòna heka aribi

ritakre. Tahe inywitxira-ò aribi riwahinykre. Inyõ txura wylemy riwahinykremy Deuxu-ò.

<sup>44</sup> Kia iny mana tyre resemyhỹkre heka tii heka wiòròm̃y ixòdumy rare. Mana inytyre resekeki tasỹ iny risurusurunya.

<sup>45</sup> Inyõ roholakeki kia aõbo aõma xiwena wahidỹỹdu mahãdu roholamy rỹimyhỹ tule fariseu mahãdu. Tule rexierymyhỹrenyre tiibohe Jesuisi turenyle rarybereri heka rierymyhỹrenyre.

<sup>46</sup> Tai heka tii mahãdu rimykeny idi riwisỹnymyhỹ tahe iny sõwehekỹ lau ruberumyhỹrenyre. Iny mahãdu dori idi rõhõtiny tii Deuxu rybeduõ ratx-imyhỹremy.

## 22

<sup>1</sup> Jesuisi heka rexidelenyre ijyymy relyykremy:

<sup>2</sup> —Timybo Deuxu Iòlòna rare ijyymy heka relyykre. —Iòlòõ heka tariòre herinamy worana bedehesi riywinyre.

<sup>3</sup> Iaõmydỹỹnana ròrarukõmy rỹidi tahe teòdu mahãdu iòrysymy roire. Rexihumy rỹireriki iaõmydỹỹnana, kanakremy wahe. Tahe òrysyna noderamy reare.

<sup>4</sup> Ijõ riteònyre teòduõ iny ritobinykremy. Aõhere tahaka, wabroreni kỹnyhe rerubunyre heka. Ibutumy heka waaõmydỹỹna rehumy rỹireri. Tahe kedeadeake heka kòdòidenyke heka.

<sup>5</sup> Tahe timy heka irybe rityhynyrenyõhyyre. Iny sohoji sohoji tatyypresi-di ijohona-ò, ijõ taaõmysỹdỹỹna-ò rea reare, ijõ taoworu-ò reare.

<sup>6</sup> Ijõ lobidỹỹna reburere teòdu mahãdu dee. Tii teòdu dee heka rawobinare. Ijõ aõbina bina heka ritxienyre ijõ rirubunyre dori.

7 Tai tahe iòlò reburere lobidỹdỹna mahãdumy bina bina raòhòtedỹnyre, rirubunyre. Ihãwã ri-toonyre.

8 Tai iòlò rarybere teòduboho-ò: —Waworana bedehesi rexihumy rỹireri ibutumy. Kia iny mahãdu ijoi juhUU retobinyra heka aõ ibina heka roire. Urile riòmysanymhỹrenye.

9 Tai tahe ibutumy boibenykre hãwã-ò ibutumy iny-txi bekoabenybekre heka bitobinybenybekre ibutumy waworana bedehesina-ò kedeakremy.

10 Tai tahe didyde iny wiwihikỹ, iny ityhy iny bina mahãdu. Hetowo tahe ritỹxire tỹmyra mahãdu-di.

11 Tahe iòlò ralore hetowo-ò kia iny mahãdu dee rybemy. Tahe tii robire hãbuõmy kia worana bedehesi kia tykyõmy ratxirerimy.

12 Tai tahe tamy iòlò rarybere: —Waliiny, aõherekiwe worana bedehesi kia tyky-di aõkõ atxiteri? Kia tahe hãbu rybeõmy riijere.

13 Tai tahe iòlò aõma rarybere teòdu mahãdu-ò: —Bimybenyke kaa hãbu. Waa bitaataabenyke imy behubenyke tahe idi diòlòdỹmy idi rehukre luru hukỹ-ò. Tai Aõhõkỹmy dỹnana-ki tai txuraruti rikyikyiny. Tai rahinykre.

14 Tai tahe Jesuisi rarybere: —Sõwemy iny heka kidirahukre tahe ibutemy kanaarikre.

15 Tai tahe fariseu mahãdu ròhònyre wii rotyre. Aõbinamy Jesuisi rarybekeule heka rimykem yidi rỹimyhỹ.

16 Kia aõma fariseu ijoiõ heka riteònyre Jesuisi-ò. Tule Herodi ijoi mahãdu riteònyre. Rỹraxyre Jesuisi-ò: —Erydỹdu, kai heka hãbuwi tate, hãbu òbiti.

Kai heka tòbedeerydỹmahãte Deuxu deewinamy. Awire aõbo ariòwynyrenykre Roma hãwã mahãdu dinodu-ò.

<sup>17</sup> Kai heka ixinamy aõma adee iny rarybererimy ihỹre. Timybo iny raraykynynerimy ihỹre. Iny bede ywinareny aõbohe ixinamy nieru aõna aõna òwydỹnyamy ròhònyke aõbohe awire?

<sup>18</sup> Tai Jesuisi heka rierymyhỹ aõma awimy aõkõ tai rahareri heka rexierymyhỹre: —Kaiboho òbitimy aõkõ toite. Aõherekibo heka kai biwaitxenanybenykemy wamynomy wadi atxitenyteri?

<sup>19</sup> Timybohe nieru-ki rakaharenykre aõna aõna òwydỹnyamy. Biditeòsinyke kia-ò arierykremy. Tai tahe tamy riteòsinyre womati nieruõ.

<sup>20</sup> Tahe Jesuisi ritỹnyaxinyre: —Motyytybybo koa rỹire. Monibo ityre-ki koa roire?

<sup>21</sup> Tai tahe rirawyònyre: —Roma hãwã iòlònile tai roire. Tai tahe Jesuisi rarybere: —Tibo Roma hãwã iòlò nierubo heka tamy biwahinykre. Tibo Deuxu nierule tasỹ tamy biwahinykre.

<sup>22</sup> Tai tahe urile ribedeòtiidỹnyre. Tai ririrenyre ròirenyre.

<sup>23</sup> Tahe kia txule saduseu mahãduõ heka dòidenyde Jesuisi-ò. Rityhynyõhyymyhỹre kia aõma rubu-bibi ixixana heka rityhynyõhyymyhỹre, saduseu mahãdu wahe.

<sup>24</sup> Tamy rarybere: —Erydỹnydu, Moisesi tyriti heka kawesemy ribedeerynyre:

—Aõma hãbumy hãwyy heridumy roiukeki aõbohe timykibo hãwyy uladu-di ratxikeki. Hãbuõ iriòrekõ-di ruruukeki tai tahe iseriòre heka iriòrese tyby-wana roiuke. Tai heka kia hãbu

rubuweleu, kia deròwmy heka uladu rity-bienyke.

<sup>25</sup> Aõu heka debò inatxi seriòremy kaki rasŷnymy raremyhŷ. Telareny heka roire hãwyymy tahe iriòrekõlemy rurure. Tahe ihãwyytybyhe kia iseriòrewanale roire.

<sup>26</sup> Ihelŷŷna sŷ tule rurure. Kia heka ibutumy debò inatxi reurò tii-wana roihyre iriòrekõule.

<sup>27</sup> Tahe hãwyy heka tule rurure.

<sup>28</sup> Tai tahe kia ruru-ribi rexixakreu tahe, tiwexe ihãbukre? Ibutumy dorihe tii-wana heka roile-hekŷlera.

<sup>29</sup> Tai tahe Jesuisi rirawyònyre: –Kaiboho teery-tenykõlemahãtenyde timybo Tyyriti-ki roimyhŷre. Deuxu ruru tule teeryòte.

<sup>30</sup> Tiu iny rubu-ribi rexixakreu iwitxiramy rexixakre. Ŷju wesemy ronykre. Timy heka hãbumy hãwyymy roiòtyhy.

<sup>31</sup> Kaiboho heka tetyhynytenyòhyymahãtenyde rubu-ribi ixixana. Idi heka tari-atenyòhyymahãtenyde timybo Deuxu rarybere?

<sup>32</sup> Kiamy heka rarybere: –Jiarŷ heka Abraõ Deuxu rare. Ijai Deuxu rare. Ijaò Deuxu jiarŷ rare. Tii heka iru mahãdu Deuxu heka tii ihŷre rubu mahãdu Deuxu aõkõ wahe.

<sup>33</sup> Iu iny sòwe ribedeerynyreu, tahe urile iny ribedeòtiidŷŷnyre.

<sup>34</sup> Fariseu mahãdu doidenyde Jesuisi-ò wii rotyrenyde. Roholareki wahe aõma saduceu mahãdu ribedeòtiidŷŷnyrenydeki.

<sup>35</sup> Bede ywina erŷdŷŷna mahãduõ rŷŷraxire heka aõmybo Jesuisi-ò. Tii rimyky heka

idi riwisỹnomy kia rybebinaõmy rirawyònykeki rimykeny.

<sup>36</sup> Tahe rỹraxire: —Erydỹdu, tibohe aõbo bede ywina kia-ribi aõnityhymyhewe bedeòtiidỹĩnamy ratximyhỹre. Wakoreny inihe tuu bedelyykre. Tibo kidiòtiidỹĩnamy ihỹre.

<sup>37</sup> Tahe Jesuisi dirawyònyde: —Iny Deuxureny iny iòlòreny luuke heka. Ibutumy awo-ribi heka iluuke, ibutumy aruruna-ribi, ibutumy arayky-ribi luuke heka.

<sup>38</sup> Tii heka inatyhy bedeòtiidỹĩna tyhymy ratximyhỹre ibutu bede ywina-ribi.

<sup>39</sup> Ijõ ihelỹĩna tahe iwesele heka rare: Iwese ixiluure wese heka ibutu luuke.

<sup>40</sup> Ibutumy Moisesi bede ywina heka juhoo rare. Tule Deuxu rybedu mahãdu erydỹĩna heka iribile rare. Kia bede ywina inatxi-ribi heka ibutumy iny bede eryna ròhònyre. Kia inatxi bityhynomy bohonykeki iuhe heka tetyhynmahãte.

<sup>41</sup> Iu fariseu mahãdu iweroramy rỹimyhỹò tahe rỹraxire Jesuisi tamy:

<sup>42</sup> —Mobo Deuxu deòdỹĩnamy ihỹre, Kristu wahe? Moriòrebo tii ihỹre. Tai tahe tiiboho rirawyònyreny: —Moma Davi riokore òsana. Tahe ijõ Jesuisi rỹraxire:

<sup>43</sup> —Tai tahe aõherekibo Davi heka Wanyrỹmy rininire Deuxu Tyytybytyhy irybe riwiòhenanyreu wahe. Davi dori kawesemy rarybere:

<sup>44</sup> Deuxu wawedu-ò rarybere.

—Bodonyke warurunawe-ribi, jiarỹ heka aòludu mahãdu-di arawo-txi.

<sup>45</sup> Davi tawedumy Kristu rininirehãre, timykibo Kristu iriokore riokorekre.



46 Tahe inyõ heka Jesuisi rirawyõnyõhyyre. Tai tahe ruberumyhÿre tamy rÿÿraxike lau.

## 23

<sup>1</sup> Jesuisi heka iny sõwe nihikÿ ribedeerynymyhÿ taerydÿÿna mahãdu-wana. Tii rarybere:

<sup>2</sup> –Judeu bedeerydÿÿdu mahãdu heka Moisesi bede ywina bede erydÿÿna mahãduõ rare. fariseu mahãdu tule bede ywina riwinymyhÿrenyre.

<sup>3</sup> Iwese ribedeerynyre wese tahe bityhynykre. Uritere iwese tii riwinymyhÿre wese uritere iwidÿÿõmy. Aõwidÿÿmy rarybemyhÿrenyrehãre tahe aõwitzira heka riwinymyhÿrenyre.

<sup>4</sup> Tiibohe heka atyrereny riòdònynihikÿmyhÿre bede ywina. Ihãre tahe rityhynyrenyõhymahãrenyre.

<sup>5</sup> Aõma õbitimy ratxike sÿny heka iny tamy roholamyhÿre ixi-di ratxirerimy ihÿre. Aõma walabu riòreõ heka rÿimyhÿre axiò-ki bede ywina heka ritidimy roimyhÿre ityky ijeti retydyna bede ywina-txi tõhõti reakemy tuu riwinyrenyre. Sõwemy heka iretydyna riwinyrenyre.

<sup>6</sup> Ronymyhÿreu heka ikoòhòkÿle ronymyhÿre, worana bedehesina rÿi-wana wahe. Dohodÿÿna heto-ki heka tule ronymyhÿre, iko-ò tuu rexisÿnymyhÿ.

<sup>7</sup> Hãwãy-ki iny tamy ryrymyhÿre: –Waerydÿÿdu, Habimy, kia tahe irybe-ki bede erydÿÿdu rare. Tii tahe tamyreny awire.

<sup>8</sup> Tai tahe Jesuisi tamyreny rarybere: –Kaibohe heka uritere Habimy inyõ adeereny irykõmy ihÿke. Deuxu sohojile bede erydÿÿdu heka rare. Ibutumy kaibohe seriòre wesemy atximahãtenyte.

9 Kasu-ki taheka inyõ heka tiu wahamy inyõ widee rarybeõtyhy Deuxu biu-ki ratximyhỹrele tuu bininibenyke heka.

10 Uritere Wawedu myỹ inyõ kia nidỹỹõmy. Deuxu deòdỹỹnale heka awedu ratximyhỹre Mesia wahe.

11 Anihikỹmy ixi-di mohõtinykeki tahe, kia iny biwiòhenanyke.

12 Kia ityhy rare ixi-di rõhõtinyinmyhỹre, tii heka ihewo-ribi rabadewokre. Ihewo-ribi tahe aõma aõkõ relekre. Kia iaõkõmy ixi-di rõhõtinykre tahe nihikỹmy heka relekre.

13 Belàhàxe! Kaiboho itxenadỹỹluku. Ibina adeereny kanakre, kai bede erydỹỹna mahãdu, fariseu mahãdu. Kaiboho uritere iny ròtedỹỹrenyõmy Deuxu Iòlõna-ò. Kaiboho birõnybenyõtyhy tule iny ròtedỹỹ-ò biebenyke. Kaiboho bexisỹnybenyke òbitinamy.

14 Aixitòedỹỹna rehereheki wahe hãwã ube-ki. Kaiboho urile iny teitxenanymahãtenyete. Aõma wytese urimynodu heka iheto-ribi teteònymahãtenyete kaiboho heka abinarenyre. Tai heka kaiboho yla aõkõ aõhõkỹmy botỹỹnybenykre.

15 Belàhàxe! Kaiboho ibutumy iny aratyhynyrenykemy ixi-di tahõtinyinmahãtenyete. Tai heka iny tesỹnymahãtenyete òrarudutyhymy wahe ixiratyre heka teijiradỹỹnymahãtenyete. Aòraru-ki heka aõhõkỹmy botỹỹnybenykre. Iny-di atxikemy heka tahõtinyinmahãte.

16 Kaiboho ruetã mahãdu wesemy kai ahãte. Kaiboho heka kia wesemy tebedeerynytenyete. Inyõ heka Deuxu bede eryna heto riwawiòhenanykeki heka aõna aõna ariwinykre.

Myŷ marybekenykeki, heka aō aōkō heka rare. Deuxu dohodŷŷna heto womati tŷrŷrŷhŷkŷ-di marybekeki heka, tii heka rityhynyhy. Ibutumy heka kia bede ywina ōta ōta tewinymahātenyte.

<sup>17</sup> Kaiboho heka bede erydŷŷdu bede erytyhykō mahādu atxitenyteri dohodŷŷna heto kia-ò ralòkeki. Aōbo bedetiidŷŷna tyhyre womati tŷrŷrŷhŷkŷ aōbo ada dohodŷŷna hetole aōbo teeryōte, Deuxu Dohodŷŷna heto wahe.

<sup>18</sup> Kaiboho tule tebedeerynyte kawesemy. Inyō tarybe inatyhy-di rarybekeki, tai heka kia xiwena wahidŷŷna-di rarybekeki, tai tahe tii rityhynyōkeki, awira. Tahe tii xiwena wahidŷŷna tyre-ki rarybekeki tahe, tii òbitimy heka rarybeke.

<sup>19</sup> Kaiboho ruetà mahādu wese, kaiboho heka erydŷŷnakōdu mahādumy toite. Aōbo awityhyre? Xiwena wahidŷŷna aōbo ada ityre-ki wahidŷŷna roimyhŷre aōbo?

<sup>20</sup> Wahisidŷŷna heka wiwesele rare. Aōma xiwena tyre-ki roire wana tule wiwesele rare. Aōma xiwena tyre-ki roiōre wana wahe heka aō aōkō rare. Xiwena utàle heka rierymyhŷre inatyhy rare. Myheka kai mararybekeki heka tai tahe kai heka xiwena utàlemy tarybeteri. Ibutumy iny ityre-ki rŷire bohomy tule heka tai tuu tarybeteri.

<sup>21</sup> Deuxu dohodŷŷna heto òraru-ki kai koityhyxemy marybekeki heka tai heka kai dohodŷŷna hetomy tarybeteri hāre tahe Deuxu iwo-ki ratxirerilemy tuu tarybeteri.

<sup>22</sup> Biu òraru-ki ka koityhyxenyteri marybekeki, Deuxusŷmy tarybeteri. Tii dori tarynana-ki ronyreri.

<sup>23</sup> —Belàhàxe! fariseu mahādu! Kaiboho

heka itxenadỹỹdu mahãduõ toite. Tule bedede ywina bedede erydỹỹdu mahãdu. Adeereny heka ibinamy ratxikre. Arỹsỹna uri juraõ heka kai Deuxu-ò tewahinyte, hortelã, erva-doce, cominho wahe. Kaiboho heka aõninihikỹ tetyhynytenyõhyymahãtenyete. Iwese õbitina, ruxetõena, inatyhyna kia-ribi heka õhõti losamyhỹre ibutumy. Aõmydỹỹna jura wahisidỹỹna heka awi rare. Tahe tule uritere õhõti losaõmyke aõwixira-ribi wahe. Aõbo bededeõtiidỹỹnare bedede ywina-ki. Kaiboho heka bedede erydỹỹdu toite hãre tahe teerytenyõte.

<sup>24</sup> Belãhãxe! Kai hãbuõ wese rare. Tiiboho imona berareny-ribi ohoruxõmo riarimahãre. Ihãrele tahe tiiboho irõdu nihikỹ rirỹsỹmyhỹre. Iwesele kaiboho tule terỹsỹmyhỹtenyete.

<sup>25</sup> —Belãhãxe fariseu mahãdu, bedede ywina bedede erydỹỹna mahãdu. Amona deoreny tesuhõmahãtenyete iwe. Iwo tahe ka isuhukỹlemy rỹimyhỹre. Itxenadỹỹna rỹire. Aõma aumy weselemy heka kia ratximyhỹre. Aõma aumy heka webõrõsityy tyrare heka. Araykywo-ki tahe ibutu itxenadỹỹ heka tai rỹimyhỹre.

<sup>26</sup> Belãhãxe fariseu mahãdu! Kaiboho taruetã mahãdu. Kai mona hynawo bisuhõke heka biõtinyke. Aõma bisuhõke ihỹre tahe arayky bityranykre. Tahe ibutumy heka aumy ryranykre.

<sup>27-28</sup> —Belãhãxe fariseu mahãdu! Kaiboho heka koityhyxenyteri. Rubu heto wiwihikỹ ixideereny tewinymahãtenyete. Kaiboho heka iwesetyhylemy toite. Aõma webõrõsitylydu heka iruxeramy idi toite. Aõma aworeny-ki tahe aõma iny rubu idi rõhõkỹdileka atxitenyteri mahãtenyete.

Ibutumy aõbina bina awo-ki arayky-ki idi atxiteri mahãtenyete. Aumyreny-ki heka tykywihikỹ texitykyny mahãtenyete. Aõma hãbu wihikỹwesemy. Hãbu õbitimy matxibenyke myheka iny adi rõhõtirenykemy heka tuu texitykynymahãtenyete. Araykywo-ki tahe arimyrenywo-ki tahe ibutu itxenadỹỹna-di heka toite, òrarudu mahãdu toite.

<sup>29</sup> Belàhàxe! Tai heka kaiboho Deuxu rybedu mahãduõ rirubunyre. Kaa nohõti ijaranamy tuu tewinymahãtenyete. Awabederenywo-ki heka noijasa ruxerahakỹle tetidite.

<sup>30</sup> Kaiboho heka tarybemahãtenyete. —Tiu wahareny riwinyre wese heka ariwinyrenyõtyhy.

<sup>31</sup> Kiamy tarybeteu heka hãbu bina riõremy texininite. Bowesele toite. Iriõre toite.

<sup>32</sup> Iwese juhoo ibinamy riwinyre wese heka iwesetyhyle aõhebo tatỹỹnymahãtenyete.

<sup>33</sup> Iwese hemylala deborehekỹ wesemy heka kaiboho atximahãtenyete. Boreny tule iweselere. Timybo heka kaiboho heòty bede-ribi mahenybenyke? Kaiboho heòty bede-ò boibenyke.

<sup>34</sup> Adeereny ariteònykre aõma Deuxu rybeduõ hãbu erydu, tyyriti erydu wahe. Kaiboho bidirubunybedenykre. Ohodỹỹna heto-ki ijõ bidihetybedenykre awaru hetenaõ-di. Itxeòtyre-ki ijõ bidirubunybedenykre. Ijõ heka biheludumykre hãwã hãwã-ò tamy ibinamy riwinykremy. Aõhõkỹmy dỹỹnana heka tamy biwahinybenykre ijõ hãwã-ò rakreu.

<sup>35-36</sup> Kia heka hãbu ibutumy rurure tyby òraru-ki wahe. Dohodỹỹna hetowokile rirubunyrenyre. Kaiboho Abeli juhoo terubunytenyete ikonana

tahe Zacaria, Barakia riòre wahe. Òbitityhy juratya-ki heka tuu tewinytenyte. Wijinabòdu mahādu tai aõhõkỹmy rotỹnykre. Ibutumy ibinamy kai atyre-ò kedeseekre.

<sup>37</sup> Jesuisi ikonana tahe rarybere: –Jerusalē hāwā mahādu, kaiboho heka terubunytenyte Deuxu rybemy rybedu mahādu. Jiarỹ heka aramykemy adi rewisỹnyreri wariòre wesemy tahe waderarenyre kaiboho. Iwese hānieõ iriòre ridyre wese idewo-ki.

<sup>38</sup> Aheto heka ixisohojilemy rỹimyhỹre.

<sup>39</sup> Kaheka ararybekre adeereny: –Wamy heka bobiõtyhy ixityre. Kai heka Deuxu deòdỹna bidykreule wamy bobikre. Iu rarybereu, Deuxu deysanamy, wamy bobikre.

## 24

<sup>1</sup> Iu Jesuisi ròhònyreu dohodỹna-ribi, ierydỹna mahādu tamy rarybere dohodỹna heto itxeremy ròikemy, eleri-ò wahe. Tai tahe Jesuisi dirawyònyde:

<sup>2</sup> –Inatyhy rare, awi heka rare. Urile tahe kidixāwididỹnykre heka. Timy heka manaõ wityre-ki roiõhyykre. Ibutumy bede-ò idi rehukre.

<sup>3</sup> Iribi tahe Jesuisi rehemynyre Oliveira hāwālò-ò heka ronyre. Tai tahe erydỹna mahādu tii ritỹraxyre iny sõwe-ribi: –Tiubohe ibutumy kedeixixāwididỹnykre. Tiuboho ibutumy bede konanadỹnamy reakre. Timybohe rikierenyre kai bedehemyne aõma bede ibutumy rexihukre.

<sup>4</sup> Tahe Jesuisi tamy rarybere: –Uritere inyõ aitxenadỹõmykre.

5 Sõwemyhe iny itxenadỹỹnamy rỹirakre. Jiarỹ Kristu rare, Deuxu deòdỹỹna heka jiarỹ rare, myheka adee kanarybekre.

6 Kaiboho heka boholamy mabekre iny aõbina ròhònymyhỹkre: boholamahãkre. Ihãre tahe iny rarybekre aõma: –Karibi heka aõbina urihimyò ròhònykre. Myhe rarybemahãkre. Ihãrele tahe kòdòòseòkre aõma ikonana urihimyò. Ibutumy heka kia wesemy relekre.

7 Aõma kia wesemy heka bede roimyhỹ rarekre aõbo iny wixira wixira heka ibutumy iòlòna heka riteranymyhỹkre. Aõbinamy. Tai heka raaõbinanymy rỹirakre. Aõma rama ijara reakre. Bede ibutumy ramytatakre hãwãõ-ki.

8 Kia heka iwese hãwyy uladu dese wesemy robumyhỹre wese tukre.

9 Adeereny heka aõhòkỹmydỹỹnana tiiboho riwahinykre aõma wani òraru-ki wahe. Ijõ kaibohoõ heka ararubunyrenykre.

10 Sõwemy heka iny riatymyhỹkre wary-ribi heka riatymy ririmyhỹkre. Wii rityhenymyhỹkre. Widee rakyarananymyhỹkre.

11 Rybebina rybeduõ heka sõwemy kedehemynykre tahe kia heka sõwemy iny riitxenanymyhỹkre.

12 Iu heka òraru nihikỹ iu ròhònykremy roimyhỹre. Sõwemy heka luuna-di rỹiramyhỹ katahe wiji ixãwikre heka ihomy aõkõ relekre.

13 Kia idi hyy rỹirakre ikonana-ò. Tii mahãdu tahe tarasanamy reakremy rỹira.

14 Ibutumyhe kia iny-ò rybe tỹnydỹỹnamy reakremy rỹira, Deuxu Rybewihikỹ Tỹmyra

wahe. Ibutu iny wixira wixira heka roholakre rybe wihikỹ-ò. Kia rahudi hikỹle heka taheka kedehemynykre heka ikonana.

15 Aõbinahakỹ tyhybohe ibinatyhy rỹikre. Tii heka rỹikre heka aõma Deuxu ubetyre-ki, Deuxu isỹ-ki, kiaweselemy heka rỹikre. Bieryke aõbo kia rare. Bieryke aõbo kia rare Danieli heka Deuxu rybeduõ ihetxiu kiamy heka rarybere:

16 –Judeia mahãdu bede-ribi tahe kia biheny-benyke. Ibutumy heka bõibenkyre hãwãlò bede-ò biòturònykre.

17 –Kia bededỹnanau heka tiu aõ bimyoõtyhy ahetowo-ribi. Tiiemy heka ròhònyhykyle rakre aõwesele wahe.

18 Iu bedero raaõmysỹdỹkrey heka tiu kòdòòseõtyhy tatyky itxemy.

19 Tule aõma hãwyy bõtòmý rỹira kia bedeu aõhòkỹmy rotỹnykremy rỹira. Kia tohouã-di ratxireri tahe tamy isirakre heka itybiedỹ idi rakeò heka isirakre.

20 Bedejutytykòkemy heka bexitòenyke ahena mahenykeu. Tule sabado txu aõkòkemy bexitòenyke.

21 Tiu heka aõhòkỹmy dỹnanamy iny rotỹnyõhyymyhỹre kaa aõhòkỹmy dỹnana nihikỹmy. Tule tiu tuu robiõhyymyhỹre.

22 Kia Deuxu irokorehemynykre wana heka ibutumy iny ituekre. Kaa urihimyoìekre wana tahe kai Deuxu hõrõ mahãdule tuukre.

23 –Aõma Mesia heka kowa-ò rehemynyra, Deuxu deòdỹna wahe. Ihãre tahe kai heka inyõ adee rarybekeki tahe tetyhynyõhyte heka.

24 Kia iu kedehemynykrey tahe aõ Kristu tyhy aõkõ heka rarekre. Aõma rybedu itxenadỹdu



heka tule aõna aõna wiwihikỹ riwinykre. Aõma ityhydỹdu dori riitxenanykemy idi riwisỹnykre:

<sup>25</sup> Boholake, juhoo dori adee relyreri ibutomy aõhebo rotỹnykre.

<sup>26</sup> —Aõma arateòwarinyre dori tuu. Kia Mesia, Deuxu Deòdỹna heka ròòsereri. Beteheke beder-ahy-ki, tule hetowo-ki. Iu tahe timy heka tamy itxeremy raõtyhy inatyhy aõkõreki.

<sup>27</sup> Iu jiarỹ Deuxu Riòre Hãbutyhyhykỹ arehemynykreu ibutomy heka rierykre loosõna delaana wesele heka wadehemynyna heka rarekre biu ibutomy ritỹxinykre.

<sup>28</sup> Iwese aõ rubu roimyhỹre, rara heka tamy rabutumyhỹre. Kaiboho rierykre iu rehemynykreu.

<sup>29</sup> Iu kia bede dỹnanamy reakreu tahe txulyby heka kòdòhònykre. Ahãdu tule rybynykre. Taina tule ixewesehekỹle kanakre. Ibutomy ramy-tatakre biu-ki.

<sup>30</sup> Iule tahe kia wadehemynynamy iny robikre. Sõwemy heka hinana ibrunana bede bedemy rỹirakre. Ibutomy heka iny robikre wadehemynynamy biuwetyky-ki, jiarỹ dori, Deuxu Riòre, Hãbutyhyhykỹ rare. Loosõna ruruna sõwekreu, tahe arehemynykre.

<sup>31</sup> Tule wajurõna-di, ýju aditeònykre iu, ajurõna wodỹhỹkỹ-di. Tahe ibutomy wahõrõ mahãdu he ixidee aributunykre bede bede-ribi, ibutu re-hetyhy-ribi wahe.

<sup>32</sup> Jesuisi tule relyyre: —Ijyyõmy heka ako are-llykre. Kai heka ibede erynamy bimykre. Iu kia figueira òwòru hãbu wiji tybiehekỹ. Kia aõma iruru tỹmyra rurunymyhỹré. Tule aõma txirubò tỹmyra ròhònykre. Tiu tahe bierykre. Kai iòhòra bohe

wyra. Myhe tamy besekre.

<sup>33</sup> Iwesetyhyle taheka kai heka bierykre. Aõma wadehemynyna rõhõny relekre wahe aõbitikre wadehemynyna iu, aõhõkỹmydỹỹnana wahe.

<sup>34</sup> Tiu kia bededỹỹnanaule heka bedekõnyna rexi-hukre.

<sup>35</sup> Biu heka bede-wana ituekre warybe tahe aõu aõu heka rỹihyymy rarekre.

<sup>36</sup> Inyõ heka rieryõhyymyhỹre. Tiubo txuu ruu kai konany rỹimyhỹre wahe Ýju dori tiu rieryõhyymyhỹre. Aõma, jiarỹ Deuxu Riõre dori rieryõre. Aõma Waha Deuxule tahe rierymyhỹre.

<sup>37</sup> Noe bededỹỹnana wesemy heka rỹimyhỹkre iny risinykre kia bedeu.

<sup>38</sup> Ibutumy heka worana bedehesi rỹikre kiau. Lisisõ tahe rỹikre. Herina lisina aõma hãwyymy herina.

<sup>39</sup> Tahe Noe bededỹỹnana wesemy heka reakre. Iu heka beõra rariare. Tahe rityyhynyõhyyre tiiboho. Tahe heka raõwõnyre rariare ibutumy ituere. Iwe-sele tii heka rarekre heka, wadehemynyna Deuxu Riõre Hãbutyhyhykỹ wahe.

<sup>40</sup> Inatxi hãbu heka oworu-ki raaõmysỹdỹỹkre. Ijõ heka rakre dynamy reakre. Ijõ tahe rarikre.

<sup>41</sup> Tule inatxi hãwyy heka raaõmysỹdỹỹkre heto-ki ratxikre mai risyrenykre. Ijõ heka dynamy reakre ijõ heka rarikre.

<sup>42</sup> Tai heka iny rexiywinymy rỹimyhỹkemy rybe roimyhỹre awedureny kanakreki. Tiubo rehemynykre, teeryõte.

<sup>43</sup> Aõma hãbuõ kanakeki heka tiu aõma hãbuõ itxeredumy ronykeki heka, tiu hãbuõ iribi rawasinyõtyhy.

44 Bexiywinymy heka wadehemynyna biijemy bonyke, jiarỹ Deuxu Riòre Hãbutyhyhykỹ wahe.

45 Ijõ Jesuisi relyyre: –Inyõ tadinodu deòdutyhymy ratxikeki, tii aõmysỹdỹỹna riwinyhyy rononymhỹke tamy. Iheto riywinyhyyke. Teòdu mahãdu txuõ txuõlemy riywinymahãke.

46 Kia riwinykeki, deysamy rarekre teòdu rehemynykre.

47 Inatyhymy ararybekre: –Kia deòdu tadinodu aõmydỹỹnana ibutumy idi riywinykre, riyrubunykre. Tii ibutu wedu rarekre.

48-49 Ibinamy tahe tii rõhõtinykeki, kiawesemy riwinykre: Deòdumy raòhòtemyhỹ, lisilemy rononymhỹ, riroximyhỹ momodu mahãdu-wana riõmyhỹ. Tii ixidee rarybekre: –Wawedu kedehemynyõtyhy, aõtxile ariwinykre.

50 Iu rehemynyõkremy rõhõtinyreu, iwedu kiaule rehemynykre.

51 Tai tahe raòhòtebinakre. Heòty bede-ò riteònykre, Iwese itxena mahãdu tii riteònykre wese. Kia-ò rahinykre, robukre, txuraruti rikyikyiny my aõhõkỹmy dỹỹnana òraru-ki.

## 25

1 Jesuisi ijõ relyyre: –Kia txu heka Deuxu Iòlòna ka ijyy wesemy rarekre. Debòwiò ijadòma heka hãbumy herina riraòmyhỹrenyre. Iny sohoji sohoji heka toosòna riwyre iximynamyna.

2-4 Iruyrelle tahe tõhòti reare aõma adỹỹ-di ritỹxinykemy. Ihony tahe tõhòti rosare iruyre wasỹ, ijõ tule ihyna-ki riwykemy.

5 Weryrybò rehemynyõre, tai tahe ijadòma mahãdu ele rihynymy rỹimyhỹ themynyna

riiraðomyhÿrenyre. Iny sohoji sohoji heka toosòna riwyre iximynamyna.

<sup>6</sup> Tai tahe rarybera: —Tÿmyra mahãdu-ò wahe rehemynreri. Birybenybenyke ruwetya.

<sup>7</sup> Tai tahe ijadòma mahãdu he rituranymy rÿimyhÿre. Toosò itÿnytyhymy rookemy.

<sup>8</sup> Kia ijò tahe tòhòti rosare mahãdu tahe uritere riijere. Itoodÿÿmy idi riwisÿnymyhÿ. Aõma widee he rexitòenyre: —Urihimykò inihe wahòrò-kò bid-itxiwike karihukòtekre.

<sup>9</sup> Tai tahe kialemy risÿnyre: —Anokõre wadehunale dokuri rÿire. Bikòryke tahe ijò itxe tahe. Maa.

<sup>10</sup> Idi tahe ròireny iõbradÿÿmy. Tai titxi tai rohonomyhÿreò. Iòrysomy iõbradÿÿmy ròirenyra rookile tahe dehemynyde kia tÿmyra mahãdu wahe. Tahe rironyrenyre ibutumy riroxikemy. Riratòbònyrenyre.

<sup>11</sup> Tai tahe kia iruyre ijadòma iõbradÿÿmy rare tahe dehemynyde: —Wahĩ, itxòtòbòna wadeke bidirakynybedenyke!

<sup>12</sup> Tai tahe kialemy rirawyònyre: —Jiarÿ umyreny reeryõre. Kie riki ijyy.

<sup>13</sup> Tahe Jesuisi rarybere: —Tai kaiboho bexiywinymy ahãbenyke wadehemynyna biijebeny. Teerytenykòte dori tiubo addòsekre.

<sup>14</sup> Tii ijò rarybere: —Ijò ijyymy adeereny arabe-deerynykre timybo Deuxu Iòlòna raremy. Inyõ heka rakemy ratximyhÿre ijò bede-ò ratÿnykemy. Tii tahe taaõmydÿÿnana ririre teòdu mahãdu-ki.

<sup>15</sup> Tanieru tahe tamy riwahinyre timykibo isiraõmy nieru ritamyhÿre myheka tamy riwahinyre. Ijò-ò 5000 riwahinyre. Ijò-ò 2000

riwahinyre. Ijõ-ò 1000 riwahinyre. Idi tahe tii rare tabede t̃inamy.

16 Kia iruyre ritara heka aõna aõna riõbranymyh̃yre. Diwymyh̃yre tas̃y idi rohonyrerimy ih̃yre. Tai wylemy heka inieru rabuture. Ijõ ixityre iruyremy ritxienyre iratyretyhy.

17 Kia ijõ inatximy tamy riwahinyre tas̃y tulere aõwesele raaõmys̃d̃ỹre ta ròtare tule ijõ inatximy ixityre.

18 Kia sohojimy tamy riwahinyre tahe urile riyrubunyre inieru h̃aloole riare tamy tahe riyrubunykemy heka riare.

19 Sõwemy rabeledỹnana-ribi tahe iwedureny dehemynde. Tahe tamyreny rarariòwyre takõtareny riòbitinykremy.

20 Iruyre riwyre heka debòwiò diwyde: — Beteheiny wawedu ijõ iruyre anieru tyre rebutunyre.

21 Tahe tawedu sõwemy riwowydnyre iaõmys̃d̃ỹna wiwihik̃my ròhònyraki wahe. Kiamy heka tamy rarybere: —Òbitimy idi taaõmys̃d̃ỹteki heka. Sõwemy heka adee ariwahinykre riywinykemy. Aõwaxinyhe bitelenykre aõmys̃d̃ỹna. Kai heka wawana beysanidik̃kre.

22 Idi tahe kia inatximy ròtaré s̃y dehemynde: —Beteheke, inatxi tas̃y inaubiòwa ixityre adee rewinyra.

23 Tahe iwedu rarybere: —Awityhymyhe taaõmys̃d̃ỹta! Kai heka deòdu wihik̃ tate. Kai ibutedile sõwemy tewinyte tahe sõwemy ixityre

adee ariwahinykre riwahinykemy. Kai heka wawana beysanihikỹkre.

<sup>24</sup> Kia sohojimy tamy riwahinyre tahe rarybemyhe retximyhỹ: –Kai heka hãbu nieru tarasaery heka tate. Aõ taaõmysỹdỹteri-ribi aõkõ heka nieru tetamahãte.

<sup>25</sup> Tai heka jiarỹ raberumahã alau watzireri. Tai heka rewore iny lau. Tahe tii sohojidile ratxireri.

<sup>26</sup> Iwedu rarybere: –Kai heka eoruxerere, awi aõkõ heka tate! Inyõ tehuðtekõta heka idi urihimyò ityre ròtakelemy wahe. Kai tiwaeryte wahe.

<sup>27</sup> Aõherekibo banco-ki aõkõ tetidite. Kia huðteòwy wanieru-ribi ritarerimy ihỹre.

<sup>28</sup> Bitabohe kia nieru-di atxitere, tahe kia debòwiò ritaraò wahe biwahinykre.

<sup>29</sup> Kia òbitimy raaõmysỹdỹra heka sõwetyhymy ròtakre. Kia òbitimy raaõmysỹdỹõmyhỹre kia heka ròõnodỹỹkre.

<sup>30</sup> Kia deòdu bimybentyke. Tii dorihe ibinatyhyre inihe bede luruhukỹ-ò idi behubenykre. Tai heka tii aõhõkỹmy rotỹỹnykre rahinykre.

<sup>31</sup> Jesuisi tahe ikonana rarybere: –Iu jiarỹ, Deuxu Riðre Hãbutyhyhykỹ, arehemynykreu heka Waiòlònary-ò aronykre. Arehemynykre waỹju mahãdu-wana.

<sup>32</sup> Ibutumy heka bede iny mahãdu wako-ki ributunykre. Iwese budoeni itxeredu heka tabudoeni, budòe-wana wiribi rihitxinymyhỹre wese heka bede iny mahãdu wiribi arihitxinykre.

<sup>33</sup> Wabudoeni heka warurunawe-ribi arisỹnykre. Budòe tahe wahywe-ribi arihitxinykre.

<sup>34</sup> Idi tahe waruruna ludu-ò ararybere: –

Manake hewa, beysabenyke. Waha Iòlòna-ò rokonykre. Myheka tamy ararybekre. Juhuu bedeu ihetxiu heka ywimy adireny kia rỹimyhỹre.

35 Rama tahe riwasanyreu rỹsỹna wadee tewahinytenyete. Iu bemy rarureu, wadee tewahinytenyete. Jiarỹ heka tori rare asỹ-ò tiwadytenyete.

36 Jiarỹ heka watykyhoho aõkõu, kaibohole wadee tewahinytenyete. Binamy rỹimy rarewãhã, waroramy taddõitenyete ròtenawo-ò.

37 Tai tahe òbiti mahãdu rarybekre: –Wanyrỹ, tiu taheka ramamy heka wadeereny teate – Adee rewahinyrenyere? Tiubo heka bemy tarumy tatemahã adee rewahinyrenyere?

38 Tiubo heka kai torimy tatemahã idi wahetoreny-ò aradyrenyere. Tiubo atykyõmy tatemahã-di, tyky adee rewahinyrenyere.

39 Tiubo ròtena-ki tỹimy tatemahã-ò ada webinadumy tatemahã-ò, aroramy ròirenyere. Wanohõti atxi reaõhyymyhỹre.

40 Tai Jesuisi rarybere: –Jiarỹ, Iòlò, tamy ararybekre: –Iu kaiboho waityhydỹỹdu seriõre mahãdureny-ò waòraru-ki tewinymy toitemahãu, wadeele tuu tewinytenyete.

41 Idi tahe kia wahywenawe-ribi ludu tamy ararybekre: –Boibenyke karibi kaiboho heka abinarenyere heòty bede-ò ihyymy boibenykre ixi-di ariteònykre. Diabo tatyytybybinasỹ-ò idi boibenykre. Deuxu isỹ tamy riwinyere.

42 Tiu rama riwasareu rỹsỹna kaiboho wadee tewahinytenyõhyyta. Iu bemy rarureu heka ijõ wadee tewahinytenyõhyyte.

<sup>43</sup> Torimy rarewahãu, tiu tiwatobinytenyõhyyte. Tykyõ wadee tewahinytenyõhyyte. Binamy rãimy rarewãhã ròtenawo-ki wororana webinadumy tahe tòiõhyyte.

<sup>44</sup> Tai tahe kiamy rarybekre: –Wanyrỹ, tiubohe tuu rewinyrenykorẽ. Wanohõti heka reaõhyymyhỹre aramamy rubuna-txi, abemy rubuna-txi, torimy tatemahãu, atyykõmy tatemahãu, ròtenawo-ki webinadumy tatemahãu wahe.

<sup>45</sup> Tahe jiarỹ Iòlò tamy ararybekre: – Kaiboho heka waityhydỹỹdu seriòreõ tewiòhenanyõmahãtenyete tai heka ti-wawiòhenanytenyõte.

<sup>46</sup> Tahe Jesuisi ikonanamy rarybere: – Tai tahe tii tiuhyymy rakre heõty bede-ò, aõhõkỹmydỹỹnana-ò. Òbiti mahãdu heka umytedeõna-ò rakre.

## 26

<sup>1</sup> Kia taijyy rahudi tahe Jesuisi taerymahãdu-ò rarybere:

<sup>2</sup> –Ixityre inatxi txu-di tasỹ aõma Pascoa worana bedehesimy rỹikre. Kaiboho tahe kia teerytenyete. Iu iny riwatyhenykre Deuxu Riòre Hãbu wahe. Irahu-di tahe itxeònihikỹ-ò riwamatadỹỹnykre.

<sup>3</sup> Tahe aõwesele heka xiwena wahidỹỹdu wedu mahãdu ributunyre heka judeu wedu mahãdu-wana wahe. Kaifa heto wii rotyre. Xiwena wahidỹỹdu mahãdu wedu wahe.

<sup>4</sup> Wiwana heka raryberenyre: –Timybohe Jesuisi aõhebo rikisỹnyrenykre aõma teburemy ijiranakõnahakỹle. Timybo rikisiraõnyrenykre,



rikimyrenykre, rikirubunyrenykre. Urile iny tuu rierykõre.

<sup>5</sup> Pascoa worana bedehesi rỹireu tahe aõkõlemy idi rỹire. Kia worana bedehesiko-ki iny raaõbinanykeki dori ibutuhukỹlemy heka raaõbinanyke.

<sup>6</sup> Jesuisi heka rare Betỹnia hãwã-ò hãbu tykybinaõ-wana heka isỹ-ò rare, Simaõ heto-ò wahe.

<sup>7</sup> Iu iheto-ki riroximyhỹreu tahe hãwyyõ tamy rare aderõna lỹnyrehekỹõ-di manaurahyna-ki. Tai tahe Jesuisi tyre ritxiwire, iratityre.

<sup>8</sup> Ierydỹỹna mahãdu heka urihimyò heka rebure riõre iõraru-ki.

<sup>9</sup> Iõwy nihikỹtyhyre dorihe. Tai heka tanieru uriterehekỹle rahuraki heka tai rawobinamy. Idi rohonykewile heka rare aõma iõwy tahe iny aõkõ mahãdu-ò riwahinykewihikỹle tii rõhõtinyre.

<sup>10</sup> Tahe Jesuisi rierytyhymy aõmybo tuu raryberenyrerimy: –Aõherekibo kaiboho ibinamy tarybetenyteri hãwyy-ò. Aõwidỹỹnana wihikỹ wadee riwinyreri.

<sup>11</sup> Aõma kaiboho heka urimynodu mahãdu-wana ihyymy boibekre. Ibutulemy awanareny jiarỹ watxiwãhãde.

<sup>12</sup> Tii heka wahãloodỹỹna riwaywinyra aderõna watyre ritxiwireu. Kia tahe wadee riwinyre.

<sup>13</sup> Boholake, iny itxi tõhõti reahyy rỹirakre iõraru-ki. Rybewihikỹ Tỹmyramy ritỹnydỹỹmyhỹkre heka rierymyhỹkre bede bedemy wahe.

<sup>14</sup> Iribi tahe Judasi Isariò, tii waò inatxi reurõõ rare, tii heka ròhõnyre ierydỹỹna mahãduy-ribi. Tahe rare xiwena wahidỹỹdu mahãdu wedu-ò. Tahe tamy rarybere:

15 –Adeereny Jesuisi ariwahikre wana heka tiwesebo biwaðwynybenykre? Kiamy tahe 30 prata womati nieru myhe tamy riwahinyre.

16 Judasi kia ribile rarunymy raremyhỹ dohodỹnaõmy Jesuisi tamy riwahinykremy.

17 Pascoa worana bedehesi rỹireule rexidelenyre, Paõ iuridyỹkõ, kia txu rỹimyhỹ wahe. Jesuisi erydỹna mahãdu tai ritỹraxyre: –Titxiwexe rikirỹsỹkre Pascoa worana bedehesi jiarỹboho dori ariwinyrenykemy?

18 Tahe Jesuisi rirawyðnyre: –Hãbuõ hãwãhãkỹ-ki ratximyhỹre tii riwaeryre. Tahe tamy marybekre: –Wawedu kỹny rarybereri aõma aheto-ki heka Pascoa worana bedehesina rirỹsỹkremy taerydỹna mahãdu-wana. Ibededỹna dori iðhõre riki.

19 Tai tahe taerydỹna mahãdu kia riwinyre idi kowa worana bedehesi rỹsỹna riywinyre.

20 Bedesõmy tahe tai riroximy rorukumyhỹreny, taerydỹna wað inatxi reurð mahãdu-wana wahe.

21 Aõma inyõ heka riwatyhenykremy ratximyhỹre. Jesuisi heka tuu rarybere:

22 –Mowexe tii rarekre. Tiiboho rabadewomy roire, tai tahe widee rarybere: –Jiarỹ kãaõboka.

23 Tahe Jesuisi rarybere: –Kia wawana pratoro tebò rearerile taheka tiikre.

24 Iwese Deuxu Tyyriti-ki Rybe roire wese heka arurukremy jiarỹ Deuxu Riõre Hãbutyhyhykỹ watxiwãhãre. Kia hãbu riwatyhenykre tahe tamy heka ibinatyhykre. Ratybienykõre wana inihe awityhyre.

25 Tai tahe Judasi ityhedỹdu rarybere: –Erydỹdu, jiarỹ aõbohe rare? Tahe Jesuisi tamy

rarybere: –Kaityhy wahe tate. Kaile tarybeta.

<sup>26</sup> Tai tahe Jesuisi orotxu sohojiō rimyre ibutumy riroxireu, tahe riyreyrenymyhÿre tahe in-ysohoji sohoji-ò riwahinyre. Tai tahe tamy Jesuisi rarybere: –Kia biybenyke heka. Waumy wese heka kia ratxireri.

<sup>27-28</sup> Idi vÿi monahynaō rimymy rexitòenyre Deuxu-ò. Idi tahe tamy riwahinyre iribi sohoji sohoji riōrenykemy. –Biōrenyke kaa dori wahālubu wesemy ratxireri. Tai sōwemy iny biu-ò rahenykre Deuxu dee. Ibutumy òraruna ixāwididÿÿmy heka tuu ròhònyra. Wahālubu heka Deuxu, iny-wana wii riwoàxinykre rare.

<sup>29</sup> Tahe boholake warybe-ò. Awanareny heka ixityre vÿi monamy ariōōtyhy. Kia Waha Iòlòna-ò dehemynynahykyle tahe awanareny ixyby tuu ariōkre.

<sup>30</sup> Idi tahe wiuō rawiunyrenyre idi tahe Oliveira hāwālò-ò ròrenyre.

<sup>31</sup> Jesuisi tamyreny rarybere: –Wijiru heka ibutumy kaiboho biwaribenykre. Tyyriti-ki heka roire kiawesemy:

Budoeni-di itxeredu rirubunykre. Ibutumy budoeni raubÿtÿkre bede bedemy.

<sup>32</sup> –Waixixana kÿnyikreu tahe Kalileia bedeki awanareny aratxikre.

<sup>33</sup> Pedro tahe rarybere: –Ibutumy ararirenykre wana tahe jiarÿ aōkōre. Ararirenyōtyhy.

<sup>34</sup> Tai Jesuisi heka Pedro-ò rarybere: –Kai heka hānie dele robukōdile biwatxiō-ribi bexihukre, inataōmy wahe. Tuu wijiru rarekre.

**35** Pedro dirawyoñyde: —Aõkõre wa, arurukre heka tahe urile aratxiõnyõtyhy. Tule ibutumy ijõ iery-dỹña tule Pedro wesele rarybere.

**36** Tahe Jesuisi ridyrenyre bederaty oworuõ-ò, aõma Kesemani ninadu-ò ridyre: —Kakile bonykre arakre dori ixitõedỹmy kowa-ò.

**37** Tahe Jesuisi heka Pedro ridyre ixi-wana. Tule Zebedeu riðre wiwana ridyrenyre. Tahe Jesuisi rabedeõtidiỹre aõhõkỹmy rotỹnyre bedeõtidiỹ òrarukile.

**38** Tii tahe tamy rarybere: —Kaki wawanale atxibekre. Watyytyby heka tỹxihikỹlemy bedeõtidiỹ-di ratxireri. Waki bexiebekre.

**39** Urile tahe tako-ò rariareu tahe resere bede-ò. Jesuisi tahe tyby-ò rarybere: —Waha, rubu mona waribi bitake adeewikeki. Aõkõkeki tahe ariõkre, arurukre adeewilemy aõhebo arotỹnykre.

**40** Idi tahe dòðsede kia ierydỹña inataõ tai rõrõmyhõ heka ixyby dòðsemy nade. Jesuisi rarybere: —Pedro! Kai heka timy sohoji horamy adi bede rỹiõtyhy wawana.

**41** Bexixaruhyy atxibeke bexitõenymy. Aõkõkeki tahe òraruna kanamykre. Kai heka òbitimy matxikemy tahõtinyinmahãte. Aumy tahe ibinare heka arurukõre wahe.

**42** Ixityre rare rexitõenykemy. Tahe Jesuisi rarybere: —Waha, adeewinale ariwinykre. Aõhõkỹmydỹñana monamy heka ariõkre. Kia mona waribi bitaõkeki ihãrele heka arurukre.

**43** Tai dòðsede tai rõrõmyhõrenyõle heka nade. Tiiboho ixixamy rỹiõhyre.

**44** Tahe ròðsere ixybyle ikonanamy. Iweselemy rexitõenyre tyby-ò.

<sup>45-46</sup> Idi tahe dòòsede taerydỹỹna mahãdu-ò rarybere: —Bexielehynybeny. Watyhedỹỹdu naderi. Rexihumyhe rare. Hãbubina mahãdu rehemynyre. Jiarỹ Deuxu Riòre Hãbutyhyhykỹ, wahe. Bexixabeny, rakakre watyhedỹỹdu dori rehemynyneri.

<sup>47</sup> Tahe Judasi dehemynyde waòinatxi reuròò wahe. Jesuisi rarybereu, tii nade sòwemy hãbu-di mayrehe-di, òhòte-di tònori-di widotyde. Judeu mahãdu wedu tahe iteòdỹỹdure xiwena wahidỹỹdu wedu wana wahe.

<sup>48</sup> Juhuu Judasi tamyreny bede riywinyre. Kamy rexirybenymy: —Iòsỹny-ò aruwokrele heka tiikre. Tiile bimybenykre.

<sup>49</sup> Tahe Judasi rarybere: —Rareri, Wawedu. Iòsỹny-ò ruwore.

<sup>50</sup> Tahe Jesuisi rarybere Judasi-ò: —Iò, aòwaxiny aòbo biwinykre iwidỹỹmy tateri. Tahe Jesuisi imahãdu rimyre. Ritaataare.

<sup>51</sup> Tahe Jesuisi mahãduò mayrehe-di rimymy resere. Tai hãbuò-ò reare. Tai tahe tòhòtile rikòròmy idi reare, xiwena wahidỹỹdu wedu deòduò wahe.

<sup>52</sup> Tahe Jesuisi tamy rarybere. Aòkòre amayrehe birutyke irasirahanawomy. Kia dori inyò maydese rimymy resekre heka tule rurukre maydeselemy.

<sup>53</sup> Karibi ixitarasamy arurukeki dori wahaòle ararybekre. Tai tahe waha sòwemy ýju kiditeònyke, 12 aòbinadu ijoi mahãdu wahe. Kia teeryòtenyke.

<sup>54</sup> Ihãrele tahe ibutumy tuu bededỹỹnana relekre iwese ritidỹỹna-ki roimyhỹre wese.

<sup>55</sup> Tahe Jesuisi rỹỹraxire tamyreny: —Aòbo jiarỹ raremy wadi tahòtinytenyteri. Wasidu aòbo. Kai dori waòrysymy themynyte maydese-di,

tõnori-di. Aõherekibo wahe. Jiarỹ heka arabedeerynyrenyre txuõ txuõlemy wahe Deuxu dohodỹyna heto-ki. Aõherekibo taile tiwamytenykõte kowa watxiwãhãure.

<sup>56</sup> Kia ibutumy Deuxu Ritidỹyna-ki roimyhỹre. Tai tahe tuu bededỹynana relekre iwese Deuxu rybedu mahãdu rarybere. Ibutumy aõna aõnamy rotỹynymy raremyhỹ. Tai tahe taryberahu-di. Ibutumy iery mahãdu iribi tahe robỹtỹre.

<sup>57</sup> Tiiboho heka Jesuisi ridyrenyre Kaifa heto-ò, xiwena wahidỹydu wedu wahe. Tai ibutumy judeu mahãdu wedu ributunyre bedede ywina erydu mahãdu tule wahe.

<sup>58</sup> Pedro irehetyty-ribi riheludunyre. Iheto ube-ki tahe ronyre yrubu dỹydu-wana. Tahe rehere aõhebo rotỹynykremy.

<sup>59</sup> Xiwena dinodu mahãdu tahe ributunyre Jesuisimy raruikremy heka riijemy. Aõma rirubunykre òbirele heka tuu rarybemyhỹ.

<sup>60</sup> Tahe inyõ-ki heka rahaõhyyre turybedu wahe. Iny sõwemy tahe relyyre. Ihãrele rirubunyõhyyre. Iroona-ribi tahe inatxi hãbu dehemynyde.

<sup>61</sup> Tai tahe kiamyhe tuu relyyre: —Aõma Jesuisi rarybere: —Aõwesele heka Deuxu dohodỹyna heto ariatymy idi areake. Inataõ txudi tasỹ ixityre aditamadỹyke, ibutumy adiwinyke.

<sup>62</sup> Tai tahe xiwena dinodu heka Jesuisi-ò ryyraxire: —Aõbo marybekre kia umy ijyy rohonyreriki?

<sup>63</sup> Jesuisi tahe rybeõlemy ronyre roholare. Ixityre tamy rỹyraxire: —Kai heka inatyhy tyhymy Deuxu Riõremy kai atximahãte. Mesia aõbohe kai

tate? Deuxu riwaeryre inatyhymy rarybereri.

<sup>64</sup> Jesuisi dirawyònyde tamy: —Kaile kia tarybete. Ibutumy iny-ò ararybekre: —Kaiboho ibutumy bobibenykre

Deuxu Riòre Hãbutyhyhykỹmy, jiarỹle wahe. Tii heka Deuxu rurunawe-ribi heka ronykre. Iribi tahe kanakre biuwetyky-ki. Jiarỹle wahe tiire.

<sup>65</sup> Tai tahe xiwena dinodu tatyky riykare. Reburere kie: —Aõhere tahaka. Deuxumy heka ibinatyhylemy tarybemahãte. Ijõ iny-ò aroholaõkre, rexihura!

<sup>66</sup> Ibutumy kaiboho irybe-ò taholatenyteri, inatyhy? Aõbo rikiwinykre tii ibinatyhyre dori, rikirubunyrenykre tahe.

<sup>67</sup> Tahe iòsỹny-ò rarybexinyre. Rihetenyre.

<sup>68</sup> Tamy ihetedỹỹdu rarybere: —Marybeke Kristu, mobo arahetenyra inihe.

<sup>69</sup> Pedro tahe ube-ki rononymyhỹ. Tahe ijadõma heka deòduõ tamy rehemynyre: —Kai anõbo Jesuisi Kalileia ludu-wana atximahã. Kumymy rabire.

<sup>70</sup> Iny ibutuko Pedro rarybere: —Aõkõre, aõmybo arybe reeryõhykyreri.

<sup>71</sup> Tai tahe rare ijõ-ò. Ijõ ijadõma deòduõ rarybere kamahãduko: —Inatyhymy heka tiki Jesuisi Nazareludu mahãduno tiki rare.

<sup>72</sup> Ixityrele Pedro ritxiõnyre: —Reerykõre wahe hãbu. Tiu heka rabiõwãhãre. Inatyhy rare.

<sup>73</sup> Idi hãbuõ heka narybede tamy: —Inatyhy rare. Kakỹny irybe weselemy tarybeteri, Kalileia rybe wahe.

<sup>74</sup> Tahe Pedro rarybere: —Jiarỹ reerykõreri, tuu heka rabiõwãhãre. Deuxu riwaeryre inatyhymy

rarybereri. Iule taheka hãnie hãbu robumy reare.

<sup>75</sup> Tahe Pedro tõhõti itxi reare. Jesuisi rarybere weselemy heka tii riwinyra. Ritxiõnyre. Tai tahe Pedro rõhõnymy reare heka rahinyhyyre.

## 27

<sup>1</sup> Ijõ biurasò ruidile tahe rÿire. Xiwena wahidÿÿdu wedu ributunyre judeu mahãdu wedu-wana. Timywexe aõhe rikisÿnyrenykre. Rikirubunyrenykemy heka idi watxiwãhãre.

<sup>2</sup> Roma dinodu-ò òsana rikidyrenykre. Tahe tiibohe Jesuisi ritaataare idi ridyrenyre tamy, Pilato-ò.

<sup>3</sup> Judasi heka rieryre. Tai tahe tii rabadewonihikÿre rityhenyreki wahe. Tai tahe raraykynyre tawo-ò raòhõrere. Tahe nieru òkesedÿÿmy idi rõhõtynyre. Tahe nieru diwyde, 30 prata womati nieru tahe riòkesedÿÿnykremy judeu wedu mahãdu-ò, Xiwena wahidÿÿdu mahãdu-ò.

<sup>4</sup> Tahe Judasi rarybere: –Ixãwirahe, jiarÿ raòrarunyra hãbu òbitityhymy ratximyhÿrele retyhenyre heka. Tahe judeu mahãdu dinodu rarybere: –Jiarÿboho, kia aõ aõkõ rare.

<sup>5</sup> Tahe Judasi nieru-di bedetyrele rihure. Tahe rõhõnyre iribi. Tahe rare. Rerotihikÿ-di rex-ibõtõtaare. Rexirubunyre.

<sup>6</sup> Tai tahe xiwena wahidÿÿdu wedu riwyre nieru bede-ribi: –Aõwexe kanieru rikiwinyrenykre? Dohodÿÿna hetowo-ò rikirutyrenyke heka aõkõre. Aõma dori rare rubuòwymy iwahidÿÿ heka rare.

<sup>7</sup> Urile suõle rikiwyrenykre idi. Tai tamy wabede rikiwinyrenykre. Aõma tori kaki rurukreu tahe rikitoonyrenykre tamyle wahe.



Tai tahe tiiboho riwyrenyre aõma butxi widỹyna subede heka riwinyrenyre. Kia heka inire suni wahe.

<sup>8</sup> Kia bedero tahe rininire aõma Hålubu Bederomy heka rininire. Wiji tule ini rare.

<sup>9-10</sup> Iwese Jeremia tyyriti-ki roire wesele heka tii riwinyre:

Tahe 30 –Womati nieruõ-di heka bedero riwyre butxiwidỹydu-ribi. Iwese kai riwateõnyre wese. Kia iõwy rare judeu mahãdu-ò tamy riwahinyre wahe. Txiõdỹyna õwy wahe.

<sup>11</sup> Jesuisi heka Pilato, bede dinodusỹ-ki ratx-imyhỹ. Pilato tahe tamy rỹyraxire: –Kai aõbo judeu mahãdu iòlò atxiteri? Jesuisi dirawyõnyde: –Kai tuu tarybeta.

<sup>12</sup> Xiwena wahidỹydu wedu heka tamy rarybere: –Jesuisi rirawyõnyõhyre. Judeu mahãdu wedu-ò tule rirawyõnyõre.

<sup>13</sup> Pilato tahe tamy rarybere: –Kai aõbohe rybe-ò taholate.

<sup>14</sup> Tule tamy Jesuisi dirawyõnyõhyde. Byy! Urile Pilato ribedeõtiidỹnyre.

<sup>15</sup> Pascoa worana bedehesi bededỹynana tikiemy tuure. Ròtenawo-ribi heka sohoji beõra beõrahyyle ixinamy inyõ rexideõnymyhỹ, inysõwe rybe òraru-ki wahe.

<sup>16</sup> Kia beõra tahe hãbu ibinatytyre ròtenawo-ki rỹire. Baraba inire. Ibutumy iny tuu rieryre.

<sup>17</sup> Aõma Pascoa worana bedehesi rỹireu ibutumy iny ributumy. Tahe Pilato rityỹyraxinyre: –Tibohe ixinamy ariteõnykre Jesuisi Kõristu aõbo ada Baraba aõbo?

<sup>18</sup> Tahe iny heka ibutumy urile Jesuisi Kõristu luure

heka. Tai tahe judeu dohodỹỹdu wedu mahãdu tahe aõkõ tamy waritimy rityhenyrenyre. Pilato kia rieryre.

<sup>19</sup> Iu tabede ywina dohodỹỹna-ki Pilato rỹireu, ihãwyy tamy tyyriti riwahinyre. Kawese heka rarybere aõma: —Ixinamy Jesuisi bitekònykre. Anobinatytymybo dokuri rarasino txu wadi reakareri. Jikarỹ anohòkỹmy dỹkỹnana sòwemy ratỹkỹnyre Jesuisi kòraru-ki wahe.

<sup>20</sup> Iny sòwehekỹ-ò heka xiwena wahidỹỹdu mahãdu wedu rarybere: —Kaiboho mararybebentyke: —Baraba ixinamy bitekònykre. Tiiboho dirawyònyde: —Jesuisi birubunykre.

<sup>21</sup> Iribi Pilato rarybere: —Tiwexe ixinamy aritekònykre? Tiiboho dirawyònyde: —Baraba bitekònykre.

<sup>22</sup> Pilato tahe rỹỹraxire: —Aõhebo tahe arotỹỹnykre Jesuisi-di, Kristu-di? —Itxeò nihikỹ-ki bitamadỹỹnykre. Birubunykre.

<sup>23</sup> Pilato tamy rỹỹraxire: —Aõbinahakỹ aõbo riwinyraki? Tai tahe ibutumy iny rirajuamy rỹimyhỹ: —Birubunyke kia bitamadỹỹnykre.

<sup>24</sup> Pilato iny sòwe-di aõ riwinyòhyyre aõbinatyhy òsana ròhònykremy idi ròhòtinyre, tai tahe inyò rarybere: —Bee kidiwykremy baciario-ki. Tahe tebò risuhore iny sòwehekỹko-ki. Tamy rarybere: —Jiarỹ kỹny waòraru-ki aõkõ heka rurukre. Kai-boho heka irubudỹỹ erydumyhe boibekre.

<sup>25</sup> Tahe ibutumy iny rarybere: —Awire, iny-boho heka irubudỹỹdu erydumy rokoirekre, tule wariòereny òraru-ki wahe ihãlubu rejuxunykre. Soldado ridyre itxeò nihikỹ-ò ritamadỹỹnykremy

rirubunykremy.

<sup>26</sup> Tai tahe Pilato heka Baraba riteònyre ixinalemy. Iribi tahe Jesusimy raòhòtere.

<sup>27</sup> Pilato soldado mahãdu urile idi juhu risinyre, soldado tyamy ritidire. Pilato heto-ò ridyre.

<sup>28</sup> Ityky iribi ritare tahe aõma tykysò-di ritidire heka juhu rihetynyre.

<sup>29</sup> Iòdỹmy tahe idi ede lòrilòrihikỹ irati-ò ridekremy. Òwòruõ tebò-ò ritidire. Tai iko-ò resere tatiowotimy. Raryberenyre: –Awire, kai judeu Iòlòtyhy.

<sup>30</sup> Ityre rarybexinyre. Òwòru rimyre tahe iratimy tuu raòhòtere.

<sup>31</sup> Iribi ritarenyrenyre ihõrõ itykyle ixityre rirutyre ityre-ki. Idi tahe ryò ròirenyre.

<sup>32</sup> Iu ròhònyreu, hãbuõ Sireni bede luduõ-wana witxi reare. Tamyhe rarybere Jesuisi itxeò riwykemy.

<sup>33</sup> Tahe Kòkòta hãwãlò-ò rehemynyre. Aõma, rubu ratityby wesemy heka rare. Tai tahe Kòkòtamy heka rininimyhỹrenyre.

<sup>34</sup> Tii vỹ riurinyre bee ihyra-wana, idi tahe Jesuisi-ò kia riwahinyre.

Iurihi-di teramy reare.

<sup>35</sup> Tahe itxeò nihikỹ-ki ritamadỹnyre. Irahu-di tahe

ityy heka ritxuatxuarenyre wimy rarudeòsanyre tibo iwyydydukemy.

<sup>36</sup> Idi tahe retehemy rorukumyhỹrenyre.

<sup>37</sup> Irati tyre-ki tahe ritidỹnaõ roire:

–Kia Heka Jesuisi Rare, judeu Iòlò Mahãdu.

38 Tule wasidu brebunahakỹ tii-wana ritamadỹnyrenyire itxeò hòkỹ-ki, ijõ iruru-ribi, ijõ ihywe-ribi.

39 Iny ibire-di reamyhỹ idi risinymyhỹ kamy rexirybenymy:

40 —Kai inihe bexitake, kai Deuxu Riòre tateki. Bodobeheke itxeò nihikỹ-ribi.

41 Kai heka arurudiremy iximy tarybemahtë. Dohodỹna biatykemy heka iximy tarybete tahe inataõtxu-di heka biwinykemy tarybeta. Tule xi-wena wahidỹdu wedu mahãdu idi risinyre. Tii tahe rarybere:

42 —Tii heka iny iwitxira witxira aõbina bina-ribi ritamyhỹre ihãre tahe taaõbina bina-ribi rexi-taõtyhy. Tii heka aõ judeu mahãdu iòlò aõkõ rare. Myheka tuu rarybemyhỹ. Kia itxeòhòkỹ-ribi kedexiberesedỹnykekile tahe rikityhynyrenykre inatyhymy.

43 Tii heka iximy rarybemyhỹre Deuxu Riòre raremy, Deuxu rityhynymyhỹremy. Reketeherenykre inihe aõbo Deuxu riwiòhenanykremy wahe.

44 Wasidu mahãdu kia itxeò nihikỹ rỹire iwesele heka tamy rarybere.

45 Txutyeyu tahe bedede luruhukỹ bedede reare, tx-ioro tirehehekỹule bedede kamy reare.

46 Kiaule tahe bedede ratỹnyre Jesuisi iu rryryre:

—Eli Eli Lema Sabatani.

Kiamyhe rarybere:

—WaDeuxu, WaDeuxu, aõherekibo waribi õhõti rosare?

47 Tai tahe iny sõwe mahãdu irybe-ò doholade. Ijõ kiamy narybede: —Eliasi-ò hòwa rryryeri.

48 Kia ele elemy riwinyre noseõ. Idi tahe vïõ rirymy tamy idi riteònyre. Teòrehemy riwinyre bemy rimonykremy.

49 Ijõhe raryberenyre: –Txiokre inihe inatyhymy aõbo reketeherenykre inatyhymy aõbo Eliasi iwiòhenadyỹmy kanakremy aõbo inihe.

50 Jesuisi ixityre rirajuare. Rurure.

51 Kia dohodỹyna heto-ki heka ixiwòtenaõ rỹimyhỹre ierykõna. Tahe urile idi ixiwanale ruamy reare iratyre-ribi bede-ò. Suuhe ramytatare. Mana rabòhòbòhònyre.

52 Wabede hãlooõ heka riraynyre. Deuxu hõrõ mahãdu sòwemy rubu-ribi riixixanyre.

53 Wabede-ribi ròhònyrenyrene. Iu Jesuisi rubu-ribi riixixareu tahe Jerusalẽ-ò ròirenyre. Tai tahe sòwemyhe iny tuu robire.

54 Tai heka soldado dinoduõ ratximyhỹ idi retehemy. Tule soldado mahãduõ tii-wana ratximyhỹre. Ibutumy tuu robirenyre. Tai tahe tabrebu-ribi narybedenyde: –Tii inatyhymy Deuxu Riòre heka rare.

55 Hãwyyõ tule retehemy ratximyhỹre irehe-ribi idi. Aõma hãwyy Jesuisi riwiòhenanymy raremyhỹ heka idi retehemyhỹre. Tiiboho Kalileia bede-ribi doide.

56 Marie Madalena, Marie Txiause Jyjese, Zebedeu riòrese tule tai ratximyhỹ.

57 Bedesòmý Jyje rehemynyre. Tii ityhy heka rare Arimatea hãwã luduõ ratximyhỹre. Tii Jesuisi tyhydỹỹduõ ratximyhỹ.

58 Tai Jesuisi umy rexitòenyre Pilato-ribi. Tai tahe Pilato rarybere: –Tamy biwahinykre.

59-60 Tahe Jyje linho tyky rirahananymy. Tai tahe aõma wabede tỹmyrahakỹ riamy roireriò heka rituunykremy idi rara. Idi mana nihikỹ ritidire txiò. Idi ròirenyre.

61 Marie Madalena ijõ Marie-wana taile rete-hemy ronyre wabede-ki.

62 Ijõ txu tahe fariseu mahãdu wedu tule xiwena wahidỹỹdu wedu heka Pilato-ò sexta feira rahudi tahe, judeu mahãdu elehyna txu wahe ituere.

63 —Jesuisi irumy raremyhỹu tii rarybere: —Rubu-ribi heka ariixixanykre inataõ txu-di.

64 Ruimy rare tahe ihãrele tahe biyrubunyke iwabede. Aõkõkre-wana tahe ierydỹỹna mahãdu heka iumy riwykre. Tai tahe rarybere: —Tii rexiixixanyre. Tai tahe ibutu rityhynykre iruina. Kia ibinatyhymy rarekre.

65 Tai tahe Pilato riteõnyre soldado mahãduõ txiò-ki. Tamy rarybere: —Awimy biyrubunyke!

66 Kia bedede ernaõ heka tamy ritidire. Txiò-ribi resekreule heka rieryrenykre. Tahe soldado mahãdu riyrubunymyhỹre.

## 28

1 Ijõ txu rudile tahe Marie Madalena, Marieõ-wana rare ihãloona-ò itxeremy, domingo, nobiutxu wahe.

2 Aõwesele tahe iu suu ramytatare. Wanyrỹ ýju heka dobehede biu-ribi iu. Tahe hãloo ijõ-ribi mana ritamy ityre ronyre.

3 Iòsỹny heka urile ritoosõnyhỹkỹre. Ityky tasỹ iurahakỹre.

4 Idi itxeredu mahãdu heka aõma ruberunihikỹrenycre. Urile rõhõtiberemy reserenycre.

5 ÿju rarybere hãwyy-ò: –Uritere berebuõmyrenyke. Kai aõbo Jesuisi teijeteri, inatyhy? Aõma itxeò ritamadÿÿnyrenyre wahe. Reeryre kia.

6 Aõkõre kaki aõkõ heka ratxireri. Tii dori rubu-ribi rexiixixanyre iwese tii iximy rarybere wese wahe. Beteheke inihe iherina tyby-ò tai juhu roimyhÿò.

7 Make karibi ele elemy ierydÿÿnako belyykre tii rubu-ribi rexiixixanyraki. Tii heka rara Kalileia-ò tamy wirotyreriò. Matahe, relyyra dorihe adeereny.

8 Tai tahe rakòrunyrenyre, hãwyyboho. Ruberumy ròirenyre tasÿ reysamy ròirenyre. Ierydÿÿna mahãdu-ò heka riijemyhÿre aõma ÿju rybemy ikoreny relyykemy.

9 Iu rakòrunyrenyraule tahe wii reòbynyra. Jesuisiwanale heka itxi rekoare. Idi tamy rehemynyre iòhòmy. Iwa rimonyrenyre tahe riwowydynyre. Jesuisi tamy rarybere: –Toiteri aõbo!

10 Uritere breburenyõmyke. Boibeny tahe ijyymy waityhydÿÿdu mahãdu seriòre-ò heka Kalileia-ò aròirenykemy. Tai tiiboho-wana wii areòbynyrenykremy.

11 Tai tahe tiiboho ròirenyre. Kiaule tahe wabede soldado itxeredu rehemynyre xiwena wahidÿÿdu wedu-ò wahe. Tahe ibutumy relyyre iko.

12 Tai tahe nieruõ riwahinyre ruiõmy relyykemy.

13 Tamyreny raryberenyre: –Ierydÿÿna mahãdu heka ridyra watÿireny reòbylemy.

14 Tai tahe bede dinodu rierykreu heka aõ adee beleõtyhy aõbinahakÿõ.

15 Tai tahe nieru sōwemy riwyrenymy tahe tuu ròirenyre ruimy. Wiji dori tuu ijyy rỹira. Ibutumy judeu mahādu kia rybe-ò rityhynymyhỹre.

16 Idi tahe ierydỹỹna mahādu ròirenyre Kalileia-ò. Tiobo Jesuisi riteònyrenyremy juhutyhy.

17 Jesuisimy robirenyreu tahe tiiboho bede-ò reserenyre tahe riwowydynyrenyre. Ijō mahāduō riseōnylemy idi rōhōtinymyhỹre.

18 Tai tahe Jesuisi iòhòtyhymy tamyreny relere kiamy tamy rarybere: –Waruruna heka ibutu ratyre ratximyhỹre kabede-ki tule, biu-ki tule.

19 Tai kaiboho waha deòdumy boibenyke ibutumy iny bede bede mahādu-ò, bede bede konananahakỹ mahādu-ò ihyy behemynybenyke. Waityhydỹỹdumy heka bitxienybenyke. Wahanimy, tule Deuxu Riòrenimy, tule Deuxu Tyytybytyhynimy, tahe bòratisebedỹỹnybenyke wadeòdurenymy, Waha, Ityytybytyhy, Iriòre kaboho deròwymy wahe.

20 Ibutumy aōbo wabede ywina adee rewahinyredi bibedeerykre. Uritere nohōti losarenyōmy awanarenyhy dori ararekre bededỹỹnanahyy rekehemynykre.



## **Deuxu Rybe Tyyriti** **New Testament in Karajá (BR:kpj:Karajá)**

copyright © 2011 Wycliffe Bible Translators, Inc.

Language: Karajá

Translation by: Wycliffe Bible Translators, Inc.

Karajá [kpj], Brazil

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Karajá

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

---

PDF generated using Haiola and XeLaTeX on 18 Apr 2025 from source files  
dated 29 Jan 2022

55ce0bcd-101e-52a3-984e-847027efe150